


Reví
LALIT
 d e k l a s
 Enn Piblikasyon Lagazet Lalit deklas

Rs. 20.00

No. **147**
 ME 2022
 ZIN 2022
 ISSN 1694-3171



DOSYE

LAGER IKRENN

- ▶ LAGER NATO-LARISI-IKRENN: LAKOZ DIREK EK LAKOZ PROFON
- ▷ KISANNLA ENA KURAZ KRITIK ROL USA EK OTAN DAN LAGER?
- ▶ LORIZINN KONFLI DAN IKRENN
- ▷ REZIM PUTIN DAN LARISI: KLEPTOKRAT E DANZERE
- ▶ EXPANSYON OTAN
- ▷ KI EXAKTEMAN USA PE VIZE?
- ▶ LINDISTRI ZARM PE ANPOS PAR MILYAR PROFI AR LAGER
- ▷ BAZ MILITER USA: AVANPOST PU EXTANSYON LAGER
- ▶ IKRENN: FASISM GAYN TERIN
- ▷ SANKSYON EKONOMIK EK SO LEFE
- ▶ MENAS KONFLI NIKLEER
- ▷ DOKTRINN MONROE
- ▶ "OLIGARK": LARISI, IKRENN, MORIS, USA

PROPOZISYON LALIT PU BIDZE 2022


KAN LAMAS DIMUNN DESANN DAN LARI ...

Kan lamas dimunn desann dan lari, fer lemet, zot pa fer li pu naryin.

Ena problem deza pu buku dant nu: pena ase manze dan lakaz, e pri pe ogmante ankor. Pena travay stab ubyin pena travay ditu.

E, akoz nu imin, nu konn get pli divan, nu konn mazinn lavenir: nutruve ki Guvernman pena okenn "plan" pu asire ki nu gayn manze dan lavenir.

(Get lartik paz 5)



KONTENI

Nimero 147

Me 2022 - Zin 2022

EDITORIAL: Kriz ek Lager	3
Kan Dimunn Desann dan Lari	5
Jabaljas ek Bulbak	6
Nuvo Atak Israel kont Palestinyin	6
Bidze Padayachy: LALIT dir “Bizin Servi Later Tablisman pu Prodir Manze”	7

DOSYE LAGER LARISI-IKRENN

Pozisyon LALIT lor Lager	8
Lorizinn Konfli dan Ikrenn: Eleman dan Listwar Ikrenn	8
LALIT organiz Kozri ek Veye kont Lager	9
Rules-Based-Swa-dizan-International-Order? Ubyin Lalwa Internasyonal?	10
Lakoz Direk ek Lakoz Profon	11
Kisannla dan Leta Zini ena Kuraz Kritik rol USA ek OTAN	12
Tansyon Propagann USA: Komye Dimunn dan Lemond Vot Pur Rezolisyon USA	13
Rezim Putin: Kleptokrat e Danzere	14
Ki Exakteman USA pe Vize?	15
Ikrenn: Fasist Gayn Terin avek Sutyn USA	16
Oportunism Oligark Ikrenn	17
Doktrinn Monroe	19
Expansyon OTAN	21
Lager Ikrenn: Lasinn ek Larisi	22
Lindistri Zarm USA: Veritab Moter Lager Ikrenn	22
Konplex Militer-Indistriyel	23
Menas Konfli Nikleer	24
9 Leta: Arsenal Zarm Nikleer dan Lemond	25
27 Leta Enndors Zarm Nikleer, konplis dan Militarism	25
Trete lor Zarm Nikleer	26
Pei Lerop Eberz Zarm Nikleer USA	26
Baz Militer USA dan Lemond: Avanpost pu Lager	28
Lager: Lefe lor Lenerzi	30
Lager: Lefe lor Manze	30
Dolar kuma enn Zarm	31
Sanksyon Ekonomik ek so Lefe	32
Muvman Anti-Lager	33
Deklarasyon IWC ki LALIT inn Siyne kont Lager	35

INPRIME PAR LALIT,
153 RUT RWAYAL, GRNW,
PORT LOUIS, REPUBLIK MORIS.

RS 20/-

www.lalitmauritius.org TEL 208 2132 ek 208 5551 lalitmail@intnet.mu

YOUTUBE CHANNEL: lalitmauritius SOUND CLOUD CHANNEL: lalitmauritius

Facebook LalitMauritius

KRIZ ek LAGER

Sa premye Revi dan lane 2022 pe sorti dan enn moman kot nu pe travers enn dub kriz: persistans pandemi Covid-19 ek eklatman lager anreg Larisi-Ikrenn, su inpilsyon expansyon OTAN*. Sa dub kriz pe ena lefe lor sityasyon politik lokal.

Konfli Larisi-Ikrenn, ki ti deza pran form enn lager sivil dan Ikrenn lor frontyer Larisi depi 8 an, asterla finn vinn enn lager sanglan depi 24 Fevriye sa lane la.

Sa lager Larisi-Ikrenn, alimante par inperialis Leta Zini atraver OTAN ki furni zarm Ikrenn, li pe amenn buku sufrans pu popilasyon sivil dan Ikrenn, inkir par milyon dimunn ki finn vinn refizye, par milye solda ek sivil ki finn truv lamor. Revi 147 li dedye a differan laspe sa lager Larisi-Ikrenn. Li importan nu konpran, presizeman parsiki sa lager la li deza pe kumans afekte lemond. Par examp, pri item debaz dan pei, ki anparti rezulta lager, pe deza kree enn instabilite politik e mem provok lemet.

Sa lager la, ansam ar tu sa sanksyon ekonomik ki USA ek Lerop pe aplike kont Larisi, pu anmemtan riske afekte kondisyon lavi travayer ek dimunn mizer dan lemond antye, inkir Moris.

Pei pli domine par inperyalism, e dimunn pli explwate dan tu pei, pu sufer plis. Manze pu kumans manke. Seki for pu fer dominer. Tu kalite populist pu profit sa veritab sufrans la.

Kote Moris, malgre nu lwin zeografikman depi sa lager la, nu deza pe kumans sibir so lefe. Larisi ek Ikrenn prodire, par examp, 30% dible pu lafarinn dan lemond. Alor, pu manke lafarinn. *Seplay-mem* pu limite. Delwil kwi-manze pu marse mondial, sa osi, buku sorti laba.



Desin Fernand Leger, The Constructors, 1950

Fertilizan, parey. Pri tu danre debaz pu monte, si lager prolonge. Ena danze ki tu pei prodikter manze kapav met restriksyon lor zot exportasyon, gard stok pu zot prop popilasyon. Moris expoze net a sa danze la. LALIT finn donn mil warning. Guvernman finn per pu obliz tablisman plant manze, met dibut lizinn prezerv e transform manze.

LALIT ti predire sa kalite danze la. Nu finn fer kanpayn anfaver prodiksyon alimanter lor gran lesel, e sa depi 1984. Me tu Guvernman pro-kapitalist, inkir Guvernman aktyel, finn refiz get li kuma enn priorite pu asir suvrennte alimanter dan enn tel lepok kriz tu kalite, enn tel lepok tu kalite kriz *previzib*. Tu Guvernman finn, kuma ti-tutu, swiv politik ki dan lintere akur-term gran patrona. Enn Minis Plan mem, pena.

Dimunn Moris deza pe fer fas depresyasyon drastik valer Rupi. Sa vedir, dan enn pei ki pena prodiksyon, problem deor prodire ogmantasyon pri lokal.

Sif inflasyon finn duble dernye enn an. 5% finn vinn plis ki 10%. E sa, avan-mem gayn lefe lager ek lefe sanksyon anti-Larisi.

Finn ena enn kaskad ogmantasyon pri bann prodwi kuma gaz, manze, lesans, materyo

konstriksyon, fertilizan ek lezot lartik ki nesesite debaz pu dimunn. Sa finn responsab pu amenn enn bes drastik dan puvwar-dasa ki rann li difisil pu travayer ek dimunn mizer fer de but zwenn sak lafin dimwa. Dimunn pe viv dan langwas e pe exprim lakoler lor terin kont Minis ek Depite Guvernman. Nu finn truv mini-sulevman deza dan Vakwa, Plenn Maynan ek Kan Dyab, avan mem gayn ti lemet dan enn dizenn landrwa. Sak fwa, risponns Guvernman se represyon.

Fas-a sa sityasyon kote pri la, Guvernman Jugnauth pe met anplas mezir kuma sibvansyonn Rs1.2 milyar lor pri alimantasyon importe. Li bon, me li pa sifi pu grander problem.

Labank Moris finn inzekte \$200 Milyon (Rs8.6 Milyar) dan sirkwi Labank Komersyal, e met a disposizyon STC, pu re-ekilibre valer Rupi. Me, ena spekilasyon ki pe anpes sa kalite mezir la trape. Detutfason, se mezir kolmataz, kot pe itiliz fon publik pu kontiyn gard enn sistem ekonomik ankriz ki depandan totalman lor importasyon, e san fer naryin pu prodire kiksoz dan pei. Li pa posib, sa. Fode tutswit met enn lalwa pu tablisman alwe enn pursantaz so later (dizon enn-

tyer) pu prodiksyon alimanter avek so infrastruktur pu lizinn prezervasyon ek transformasyon manze debaz.

Guvernman so priorite se lavan vila-delix ki kapitalist ule fer dan sekter imobilye pu konble so det – sa vedir betonn later agrikol pu de-bon, kot ti kapav lans nuvo prodiksyon alimanter, e vann pu de-bon later pei, ki esansyel pu prodiksyon lokal.

Anmemtan Guvernman pe kontiyn move politik, sibvansyonn sekter lekonomi ki ankriz e ki pena lavenir kuma kann, ubuin ki frazil kuma turism ek textil, ubuin ki kareman ilegal ubuin imoral, kuma ofshor.

Sa politik ekonomik la, li enn *cul-de-sac*.

Li pu amenn revolt ek rebelyon parski dimunn riske pena manze sak fwa enn kriz leve.

Fas-a sa realite la, e sityasyon riske agrave, rezim Jugnauth pe deza azir avek plis represyon ankor. Sak fwa, kan li pe akile divan kritik lor so inkapasite reponn lapel kote ekonomik, li ena rekur ar servi lapolis pu fer arrestasyon arbitrer. Ti-mama li servi ICTA. Ti-mama li servi IBA. Ti-mama li servi PGA. Ti-mama li servi *Rogue and Vagabond*. Ti-mama li servi *Utraz kont Ofisyen Piblik*. Ti-mama li servi lalwa kont sedisyon. Anmemtan MSM pe kontiyn rekiper bann pros MMM, rod ris tu kalite militan drwa imin, ekrivin, artist dan ziron puvwar. Kumsa, li imobiliz zot.

Guvernman MSM pe per pu fer fas Eleksyon Minisipal, ki li ti bizin organize an mwa Zin. Li finn plito ranvway sa eleksyon la pu rezon “pandemi”, dan enn moman kot nomb ka Kovid pe plito diminye. U pa kapav ranvway eleksyon zis akoz u krwar u pu perdi.

Alor, tusala pu dir, reyn MSM pe vinn deplizanpli represiv e anti-demokratik.

Reyn kapitalist li tuzur al fini kwinse kumsa.

Konsernan Lopozisyon, kozkoze ant Ramgoolam ek Bérenger paret finn friz pu lemoman, ondire li ti ONN e asterla li OFF, swit-a konfli uver ant dirizan differan konpozant dan lopozisyon ki sipoze pe inifye. Ena lager Roshi Bhadain v/s Shakeel Mohamed lor Radio. Ena deklarasyon Bodha kont Ramgoolam. Antretan, *L'Entente L'Espoir* ti fini met lekip dan sak lavil pu kanpayn Minisipal, e Parti Travayis ti pe kumans organize enn kote, li. Me asterla avek ranvwa, zot finn perdi sa tigit momenntum ki zot ti kapav pe gayne.

Lopozisyon obsede ar evennuman elektoral, Minisipal ek Zeneral, sanki li vinn delavan avek okenn program serye.

Zot pa dir kuma zot propoze pu sorti dan kriz ekonomik grav ki pe afekte sirtu travayer ek dimunn mizer. Ondire zot finn blyie ki enn parti politik li enn lorganizasyon *otur enn program pu sanz sisyete*. Zot finn ariv krwar zot reyni pu met Guvernman deor, se tu.

Dan lopozisyon andeor Parlman, mem son. Nuvo parti *Linyon Pep Morisien* (LPM) ki finn forme kan 100% Citoyens (Dev Sunnasy), Linyon Sitwayin (Bruneau Laurette) ek GRE (Rama Valayden) finn fizyone, finn gayn difikilte pu decole.

Apenn zot demare, zot premye vre aksyon, se Bruneau Laurette met ka domaz Rs25 milyon kont Ivann Bibi ki ti ar zot avan.

Antretan, Laurette inn anons so plan pu al Ikrenn lor kontra! Asterla, li paret finn al Sesel pu antrenn gard prizon laba.

Bann LPM, zot pa pli koeran ki Lopozisyon Parlmanter.

Onivo LALIT, nu finn aktif politikman atraver enn Seminar

Enn Zur pu manb lor sityasyon politik lokal ek internasyonal, enn manb Rajni Lallah finn met enn konplint Police Complaints Bureau akoz lapolis ti malmenn li ek enn lot manb, Roland Fozoo. Nu finn fer demand formel ki Minis Finans pran mezir drastik anfaver svurennte alimanter. E nu finn prezan lor terin atraver trak ek lafis pu amenn kanpayn kont lager Larisi-Ikrenn; pu ki Larisi retir so larme depi Ikrenn; pu revandik demantelman OTAN; pu aret fabrikasyon zarm, e pur fermtir tu baz militer etranze, ikonpri baz Diego Garcia. Nu finn osi zwenn nu lavwa avek rezo internasyonal bann lorganizasyon ki kont lager e ki kont expansion OTAN.

Nu finn konstaman propoz an publik, e dan Let Uver a Guvernman, atraver Deklarasyon Komin ek sindika, ki kalite nuvo lekonomi bizin kree pu fer fas a kriz ekonomik la. Kan asir sekirite alimanter – atraver investi dan later ki tablisman okipe, e osi dan lamer 2.4 milyon kilomet kare, plis dan lizinn, sa pu kree anplwa, asir manze, e osi stabiliz deviz. Anmemtan ki servi later pu prodire manze, enn parti later bizin servi pu konstrir lakaz pu tu dimunn.

Dan kontex Fet Travay, nu tem santral sa lane la, li liye sa de pwin la ansam: Kont lager e nesesite enn program ki anfaver sekirite alimanter pu fer fas a kriz ki travayer ek dimunn mizer pe traverse.

25 April 2022.

* OTAN, ubuin l'OTAN ubuin NATO, zot tu abrevyasyon pu *North Atlantic Treaty Organization* ki enn lalyans militer ant Leta Zini Lamerik, Kanada, UK ek enn seri pei Lerop. (Get map lor kuvertir par deryer.)



KAN DIMUNN DESANN DAN LARI

Kan lamas dimunn desann dan lari, fer lemet, zot pa fer li pu naryin.

Ena problem deza pu buku dant nu: pena ase manze dan lakaz, e pri pe ogmante ankor. Pena travay stab ubyin pena travay ditu.

E, akoz nu imin, nu konn get pli divan, nu konn mazinn lavenir: nu truve ki Guvernman pena okenn “plan” pu asire ki nu gayn manze dan lavenir, e ki pri sa manze fitir la li pu stab. Guvernman pena okenn “plan” pu kreasyon anplwa stab pu lamas dimunn.

Reaksyon Guvernman

Alor, initil Premye Minis Pravind Jugnauth ubyin Vis-Premye Minis Steeve Obeegadoo vinn dir ki pri pe monte “akoz pandemi”, ubyin “akoz lager”, ubyin vinn dir kumkwa dimunn desann dan lari “akoz politisyen lopozisyon pe fer konplo”.


Ena pandemi, *ena* lager, *ena* popilist. Li vre. Me, pli gran verite se leswivan:

Napena, e napa finn ena, okenn plan guvernman MSM pu fer fas ni pandemi, ki la depi plis ki 2 banane deza, ni “lefe lager” ki LALIT finn predir depi plis ki 2 banane dan nu trak, lartik, editoryal. E li sa mank enn plan koeran, mank enn program pu sisyete pu pli divan, ki vreman alabaz tu sa seri dezord ki ena inpe partu dan Moris, ki permet popilist kuma Rama Valayden, Bruneau Laurette e lezot lev latet.

Alor, nu akiz guvernman MSM ki li finn promet sekrite alimanter *an parol selman*. Li pa finn fors tablisman ras mem enn sel arpan so kann, plant manze debaz. Li pa finn fors tablisman re-organiz so karo pandan sa 2-3 an, pu plant prodwi alimanter dan totalite antre-liyn kann.

Nu akiz MBC, *koz* “sekrite alimanter” e lerla dan mem item nuvel vinn koz mezir guvernman MSM pu met ankor plis sibsid pu plant plis kann ankor!

Nu akiz, totalite lapres ek radyo ki zot tro per pu dir sa 2 mo “ras kann” ubyin mem “fors tablisman”, akoz zot kapon divan puvwar larzan. Oligark Moris pli for ki oligark Ikrenn, pli for ki oligark Larisi, relativ a sisyete dan lekel zot truve – e sa ziska zordi.



Klas oprime

E nu dir, lamas dimunn, klas travayer organize, sak dimunn dan Moris-Rodrig-Agalega ki konn reflesi, nu bizin realize, enn fwa pur tut, e azir lor sa realizasyon ki “desann dan lari”, par li tusel, li pa marse; zame li kree enn pli bon sisyete, par li tusel. O-kontrer, li kapav anpir lavi pu lamas dimunn oprime. Mem, avek bon lintansyon, “desann dan lari” par li tusel, li pa fer enn pli bon sisyete: okontrer, sime ver lanfer li pave ar pavaz bonn-intasyon. Seki neseser se aksyon, inkir desann dan lari, inkir eleksyon, inkir petisyon, inkir tu kalite aksyon protestasyon, inkir lagrev kot napa al travay an-gran-gran-grup mem zur mem ler, me fode li aksyon ki baze lor enn konpreansyon an-komin enn program pu sanz sisyete.

Kimanyer nu anvi sisyete ete? E kimanyer nu sorti kot nu ete zordi, ariv laba? E ki bizin fer pu amenn nu laba. Setadir, par ki stratezi nu ariv laba?

Kan dimunn finn desann dan lari dan Kan Levy, dan Valijee, dan Gran Rivyer, dan Sint Krwa, dan Tru-do-dus, Bobasin, Mangalkan, Bwa Marsan, Semin Grenye partu, li ule dir zot pe viv dan enn angwas akoz 2 zafer: dabor lamonte fles pri danre-debaz, answit li pe arive dan kad enn mank enn tel *program*

e mank enn tel *stratezi*. Ala travay divan nu: kree enn tel program an-komin, e fasonn enn tel stratezi.

Me, sa li dimann pasyans. Pasysans revolisyoner. Li dimann reynion. Li dimann refleksyon. Li exziz kuraz. Li dimann konpreansyon ki kalite sisyete nu viv. Li dimann kapasite konpran ki sakenn li pa zis enn sakenn, me li dan enn klas sosyal – kot an-gro swa li anplway dimunn ki travay pu li, li met profi dan so pos. Swa li travay ar enn kikenn pu li viv, pu li sirviv, li ek so fami. Li dimann kapasite konpran flo listwar, e kimanyer rant ladan. Li dimann kapasite ekut nu prosen ki kone par natir so travay, kimanyer lemond marse. Samem dan LALIT, nu ena enn Revi sak 2 mwa depi otan lane. Nu rekrit dimunn lor baz sa kalite program-an-formasyon la, lor baz sa kalite stratezi-an-vwa-developman la.

Sanzman, kan vini, vinn vit

Tu kapav sanze vit. Me, pa pli vit ki nu degre refleksyon an-komin, pa pli vit ki nu kapav tom dakor lor enn program. Enn program, li simp. Li pa enn seri ve-pye, kuma “valeurs” ek lezot mo vag. Li pa enn lalist karne rasyon nonpli, kot liste zafer miner enn apre lot – bes tel pri, tir tel lalwa. Non. Enn program li enn konpreansyon an-komin ki bizin fer – ki bizin fer pu amenn sanzman akurterm, ki al dan direksyon sanzmanalonterm ki nu pe vize. E sa konesans “ki nu bizin fer”, li baze evidaman lor nu kapasite, ansam, pu analiz sisyete zordi, so differan klas, e dan ki muvans li pe ale dan listwar. Lerla nu pu tom dakor ki “demand”, ki seri revandikasyon prinsipal, pu amenn nu ver nu bi: enn sisyete egaliter, enn sisyete san klas differan, enn sisyete lib, enn sisyete san represyon ni militarism ni dominasyon par patriarsi, ni explwatasyon par dimunn ki swaf profi lor travay so prosin.

Jabaljas ek Bulbak



Jabaljas: Dir mwa enn ku, Bulbak, eski li vre ki ena enn lalwa ki dir ki to kapav apel nimport ki dimunn enn gopia, me si to apel enn Minis enn gopia, tutswit to fini dan kaso?

Bulbak: Anfin, Jabaljas, mo ti pu byen etone si ena enn tel seksyon lalwa dan nu Kod Kriminel.

Jabaljas: Purtan, pa samem ki pe arive?

Bulbak: Abe kot to finn tann dir ena enn tel lalwa? Dan enn Republik, tu dimunn egal divan lalwa.

Jabaljas: To kone akote mo lakaz, ena sa vwazin ki enn mari laryaz. Abe li enn o-grade, sa. Limem ki finn dir mwa sa.

Bulbak: Mo sir li pe fer erer, Jabaljas. Li pa posib ena enn lalwa osi bankal: kitfwa to pu bizin re-koz ar to vwazin, anka to finn mal konpran seki li finn dir twa.

Jabaljas: To kone, kan li finn dir mwa sa, mo pa finn ule krwar. Alor mo finn fini diskit sa ar li an long ek an larz.

Bulbak: Alor li finn persiste ki ena enn tel lalwa?

Jabaljas: Anfin pa ekzakteman.

Bulbak: Abe ki li finn dir twa, ekzakteman?

Jabaljas: Li dir mwa ki se pa enn lalwa, me enn taktik ki lapolis servi pu ferm twa si enn Minis santi ki to finn insilte li.

Bulbak: Abe si pena vremem enn tel lalwa, ki manyer lapolis kapav aret twa ek ferm twa?

Jabaljas: Abe mo finn dimann li sa kestyion la. Lerla li finn explik mwa ki taktik zot servi pu fer plezir sa minis la: kan to finn fini pas lanwit dan kaso, lerla zot reflesi ki vre lalwa kapav servi pu purswiv twa divan lakur.

Bulbak: Be si to finn zis tret enn Minis de gopia e to pa finn fer nanye ankor, ki lot sarz zot pu mete kont twa?

Jabaljas: Mwa usi mo finn truv saizar: alor kan mo finn kestyion mo vwazin lor la, li dir mwa ki ena enn lot lalwa ki zot servi dan bann ka kumsa, e sann la enn vre lalwa.

Bulbak: Alor si mo pe konpran twa byen: lapolis aret twa parski enn minis finn ofanse, lerla zot met enn lot sarz kont twa kan al lakur. Be ki sarz zot pu mete kont twa si to pa finn fer nanye?

Jabaljas: Zisteman: li finn eksplik mwa ki sa mem ena sa lalwa "Rog ek Vakabon".

Bulbak: Abe dan lakur zot pa bizin dir ki to finn fer demal? Mazistra pa poz zot kestyion?

Jabaljas: To kone, Bulbak, bann mazistra ena buku travay, e de tut fason mo vwazin finn eksplik mwa ki sa sarz la li zis provizwar, me pu to sort dan kaso bizin al get avoka e rod lamone kosyon.

Bulbak: Jabaljas, to pe dekrir kimanyer enn leta polisye devlope. San ki to truve kupab par lakur, lapolis fini fer twa pas par tu kalite pinisyon. Kan mo ti sey eksplik twa ki manyer bann zafer kuma Kart ID biometrik ek tu sa bann kamera sirveyans la reprezant enn deriv ver enn leta polisye, to pa ti ule krwar mwa.

Jabaljas: Laverite do, mo rapel mo ti dir twa to pe rod lipupul dan fesbuk.

NUVO LATAK ISRAEL KONT PALESTINYIN

Anmemtan ki lager dan Ikrenn pe kontiyne, Israel pe kontiyne perpetre so politik destriksyon kolonyal kont lepep Palestinyin. Ipokrizi Leta Zini, li flagran, kan konpar so pozisyon lor sa 2 konfli la.

Palestinyin pesibir enn kolonizasyon ek lokipasyon militer ki pe dire plizir deseni avek ful baking Leta Zini e sutyin pei Lerop. Zordi lemond antye pe truv okler politik de pwa de mezir ek ipokri sa bann mem pei la. Kimanyer zot finn lor vites aplik sanksyon, boykot, dezinvestisman kont Larisi. me zame ziska ler zot finn aplik sanksyon kont Israel. Tultan dan medya meynnstrim Palestinyin ki gayn letiket teroris. Israel ki koloniz teritwar Palestinyin gayn led militer.

Depi semenn dernye Israel finn reprim Palestinyin ki viv dan Lest Zerizalem e finn bombard Gaza. Lapolis Israel finn lans gaz e tir kut bal kautsu lor Palestinyin ki ti rasanble pasifikman Lesplanad Moske Al Aqsa dan Zerizalem. Finn ena 300 arrestasyon ek 158 blese parmi Palestinyin. Azisman guvernman Israel form parti enn kanpayn pu expilse tu Palestinyin depi Lest Zerizalem.

Israel finn anfet invahir kote Lest Zerizalem an 1967. Mem li finn dekret lavil la an antye kuma so kapital, Isreal refiz akord Palestinyin ki rezid dan Zerizalem zot ful drwa kuma sitwayen. Guvernman Israel finn mem pas enn seri lalwa ki anlev drwa tu Palestinyin pu viv dan Zerizalem e dusma dusma expilse zot tu depi antye teritwar Zerizalem.

Anmemtan ena grup kolon Israel, avek baking Leta, finn amenn kanpayn pu expilse Palestinyin e apropriye zot lakaz ek zot kartye.

LALIT kondann leta Israel, e nu form parti muvman internasional Boykot, Sanksyon, Dezinvestisman dan Israel. ■

LALIT dir BIDZE PADAYACHY
“BIZIN SERVI LATER TABLISMAN
PU PRODIR MANZE!”

Nu pe pibliye enn kopi sumisyon propozisyon LALIT a Minis Finans Padayachy lor kestyon sekirite alimanter. Li enn size ki pe vinn telman grav, li merit enn let lor la:

Ser Minis Finans,

Dan LALIT nu finn, pandan buku lane, met angard danze – danze existansyel, kuma nu pe truve asterla – enn lekonomi ki pa asir suvrennte alimanter. Dan kumansman premye lokdawn kan Koronaviris ti pe atak lemond, u pu rapel ki nu ansam avek sindika finn fer apel a u pu truv bann mezir fiskal ubyen lezot fason pu fors investisman kapital dan prodiksyon manze – an-partikilye dan prodiksyon agrikol ek lapes – e dan tu sa infrastruktur ki neseser pu prezerv e transform sa prodwi debaz la. Kumsa kapav travay ver asir sekirite alimanter. Si ena enn refleksyon apropriye deryer sa kalite mezir la, sa pu anmemtan asir kreasyon lanplwa e stabilite Rupi vizavi lezot deviz. LALIT finn pandan buku lane fer apel pu ki sekter prive sezi lokazyon pu dezinvesti dan “lelefan blan”, kuma kann ek disik, kuma imobilye (ki patron tablisman servi pu fer “windfall gains” enn sel kut fini), usi byen ki sekter turis ki enn sekter frazil - ki depann lor buku faktor extern e mem lor kapris sertin websay Anbasad – anmemtan ki zwenn dan muvman mondal pu ferm sekter ki maske larzan ilegal ek immoral, setadir sekter “off-shore”, ki finn sey lav so repitasyon par sanz so nom, apel li “biznes global”.

Oliye aret oryant kapital andeor sa bann sekter “lelefan blan” la, Guvernman – atraver MIC – finn sibvansyonn zot ablo pu res kole ladan. E aster avek dub lefe lager dan Ikrenn ek sanksyon aplike kont Larisi, avan-mem ki pandemi fini, lemond antye so infrastruktur alimantasyon menase. Dayer Sekreter Zeneral Nasyon Zini finn fer li kler. Moris sirman parmi

bann peyi ki ena mwins sekirite alimanter dan lemond. E nu finn perdi buku letan.

Bizin dir ki Guvernman finn fer buku diskur lor nesesite sekirite alimanter. E se nek resaman ki Guvernman finn met anplas dan Wootton enn ‘hub’ pu prezervasyon ek prosesing manze.

Me kimanyer nu ena enn Leta Morisyin ki telman per pu fors tablisman pu servi enn proporsyon zot later agrikol – ki anfet sel later Lepep ena – pu rann prodiksyon alimanter posib dan sa pei la? Ki telman sakre lor kestyon kann ki li enn tabu pu Guvernman pran ninport ki mezir? Kifer li pa konn fer naryin apar sibvansyonn kann? Mem kan kann pe vinn de pliz-anpli non-viab? E si zame kann sed so plas monopol lor tu bon later agrikol, alors kifer li selman pu proze initil ek destrikter pu lelep Moris, proze tip-IRS ki zot batir deryer gro-gro geyt, enn kalite developman ki kuma selil kanser ki pe metastaze dan pei? E usi, kuma li ti ete, zot vinn vann sa bann proze IRS la pu debon, vann vila a seki miz plis kas? Eski li pa enn nuvo form kolonizasyon?

Alors, bidze bizin adres sa problem la par:

1. Reklam ki enn-tyer tu later tablisman alwe imedyatman pu plant prodwi alimantasyon de-baz. Sa bizin fer swa atraver konverti manyer plant kann, pu permet antreliyn dan totalite zot later kann, setadir dan 100% zot karo, e fer sa dan, dizon, prosin 5-an, lane par lane. Swa enn-tyer totalite zot later, ras kann, plant manze! Enn kanpayn massif, baze lor argiman de-klas, pu neseser pu batir sutyen popiler parmi lamas travayer, kan fors proprieter tablisman fer sa.

2. Fors sak sa 4-5 gran tablisman fer investisman ‘stil Wootton’ pu prezervasyon ek transformasyon prodwi alimanter la, setadir Terra, ENL, Omncane, CIELek Medinn; ansam avek sa, li usi neseser pu Guvernman asir resers ek devlopman pu prodiksyon semans lokalman, pu prodiksyon nuritir bio e san OGM, pu prodiksyon dile, pu transportasyon ek stokaz, e pu marketing lokal ek dan larezyon Losean Indyen, presiseman pu tu marse nish e marse ki pli lwin.

3. Tutswit met enn interdiksyon lor konversyon later agrikol an prodwi imobilye pu marse imobilye, e kumans ranvers sa prosesis bayant later pu vila milyoner la.

4. Guverman bizin tutswit pas komann pu 2 gro bato lapes ki pu lansman kreasyon enn laflot ki anmemtan lapes pwason dan nu teritwar maritim EEZ dan enn fason sutenab, anmemtan aplik lalwa kont bato lapes pirat depi lezot pei. Alor, bizin fez-awt tu permi ki Guvernman ti pe donn laflot etranze pu lapes dan dilo Republik Moris.

Dan bann lane ki pe vini, nu riske sibir lefe extrem lor nu lekonomi akoz persistans pandemi Kovid, e nu pu sufer lefe lager-e-sanksyon, mem riske sufer lefe advers lager nikleer, ubiyin lefe advers sanzman klima ki otan serye ki li fini depas “pwin debalansman” (“tipping points”) ki riske extinksyon spishiz. Etan done Moris li enn Leta avek buku zil e avek enn ase gran letandi lamer kapav, si li kumans aplik sa bann demand la asterla dan Bidze 2022-2023, nu pu kapav amorti sertin sa bann katastrof ki iminan.

LALIT,
25 Mars 2022

Pozisyon LALIT lor Lager

Larisi bizin retir so larme depi Ikrenn, aret bombardman. Anmemtan OTAN bizin angaz li pu aret so expansyon, pu bat retret, pu rann li posib pu Larisi retir so larme deswit. Nu realize sa pu difisil parski OTAN finn trayir so langazman 1991. Me, pa kapav kontiyne sakrifye lepep Ikrenn a laswaf expansyon OTAN.

Sa retre Larisi ek OTAN bizin arive, e pu arive, lor baz enn mobilizasyon popiler mondal deryer enn program an 3 gran lax:

1. Fermtir tu baz militer etranze, inkilir baz NATO! Konversyon sa bann baz la an yunit resers e prodiksyon lenerzi renuvlab, sant meteo pu monitor klima; sa pu asir anplwa non-militer imeda. Sa pu asir swin imeda nu planet ki andanse polisyon ireversib. Sa inkilir fermtir baz USA lor Diego Garcia. Tu dimunn oprime, tu dimunn ki reflesi, partu kot nu reste, nu angaz nu pu travay pu ferm baz ki prekot nu, ubyin ki tom su nu responsabilite.

2. Politik fermtir tu lepor e tu ayopor a bato deger ek avyon deger etranze. Sa vedir fermtir tu lepor ek aryopor Republik Moris – inkilir Port Louis, Port Mathurin, Agalega, Diego Garcia, St. Brandon, Tromlin.

3. Fermtir tu lizinn armaman, inkilir lizinn ki fabrik zarm nikleer. Konversyon an lizinn ki prodir lekipman pu lenerzi renuvlab e prop, ubyin an yunit ki devlop lagrikiltir de-santralize, bio, sutenab; sa pu asir kreasyon anplwa tutswit e enn sime direk ver sekirite alimanter, e uver sime pusov planet. Interdiksyon lavant zarm. Demantelman tu zarm, inkilir zarm nikleer.

Nu slogan li leswivan:

- * Lager, non! Zarm nikleer, non!
- * Baz militer, non!
- * Fonn tu zarm, kree nuvo masinnri pu lagrikiltir ki rule lor lenerzi prop!
- * Larisi retir li deswit, OTAN aret

expansyon deswit, pran langazman demantel limem, apartir asterla.

* Fixe enn proses demokratik, dapre enn taymtebl, pu negosyasyon pu demarkasyon ant Ikrenn ek Larisi, ki pu pli fasil kan OTAN fini bat retret.

E tusala pu selman posib si nu viz pu fini, anmemtan, ar sistem kapitalist, e pu ranplas li par enn sistem veritableman demokratik, ki asir egalite deklas, liberte pu dimunn pa zis pu klas kapitalist ek so kapital, epannwisman limanite.

LORIZINN KONFLI DAN IKRENN ELEMAN DAN LISTWAR IKRENN

Depi preske enn syek, popilasyon Ikrenn, sirtu klas travayer ek peyzannri, finn sufer atraver tu kalite kriz politik ek mem konfli arme. Me sa pa finn anpes devlopman enn klas “oligark” dan Ikrenn, parey kuma dan Larisi apre disolisyon Linyon Sovyetik.

An 1922, Ikrenn integre Linyon Sovyetik ki ti forme apre revolisyone Ris. Me deza dan bann lane 1930, politik Stalin pu fors kolektivizasyon finn amenn lamizer ek lafaminn pu agrikilter dan Ikrenn. Sa finn fer enn bon parti abitan dan Lwes Ikrenn sutenir Lalmayn Nazi kan Dezyem Ger Mondyal finn deklare. Sa parti Ikrenn la finn panse ki Larme Nazi pu liber zot depi dominasyon Stalin. Pandan Dezyem Ger mondyal finn ena sa divizyon ant enn muvman nasyonalist anfaver Lalmayn Nazi ek *partizan* anfaver Linyon Sovyetik.

Apre lafin lager mondal e defet rezim Nazi, sa divizyon la finn persiste, me sann fwa la su form kumansman “Lager Frwad” e an 1949, USA atraver CIA, finn sutenir enn muvman rezistans kont Linyon Sovyetik, enn muvman rezistans arme su ladireksyon enn lorganizasyon ki apel *Lorganizasyon Ikrenn Nasyonalist* (OUN) ki ankor exziste ziska zordi.

Depi lerla Ikrenn finn truv limem divize malgre ki plizyer dirizan Linyon Sovyetik (kuma Krushchev ek Breznev” ti anfet sorti Ikrenn. Me Lager Frwad ant USA ek Linyon Sovyetik finn aksantye sa

divizyon la, parey kuma li ti fer dan lemond antye.

Zeografikman Ikrenn finn truv limem kwinse ant USA ek so OTAN ek Pak Varsovi otur Linyon Sovyetik e sa finn persiste mem apre disolisyon Linyon Sovyetik an 1991, kan Ikrenn vinn enn leta indepandan.

Dan Eleksyon Prezidansyel dan Ikrenn an 2004, kandida Yanukovych, ki ti anfaver enn raprosman ek Larisi, gayne kont Yushchenko ki ti anfaver enn aliynman ek Lerop. Me ti ena enn kanpayn pu denons eleksyon trike, enn mobilizasyon ki apel Revolisyone Oranz ek ki gayn sutyen Lerop ek USA. Sa ti presipit enn nuvo eleksyon ki Yushchenko (pro-Lerop) gayne: me an 2006 ena enn guvernman koalisyon ek Yanukovych kuma Premye Minis. Me dan sa peryod 2006 a 2010 ena enn seri kriz ekonomik ek finansye otur pri ki Ikrenn peye pu gaz depi Larisi, e kan eleksyon prezidansyel vini an 2010, sann ku la ena 3 kandida: Yanukovych ki gayn 48% vot, Yushchenko (zis 6%), ek enn nuvo madam ki apel Yulia Tymoshenko ki sorti segon ek 45% vot. Kan fer dezyem tur eleksyon, Yanukovych gayn eleksyon e vinn Prezidan. Me, li tuzur anfaver enn raprosman ek Larisi, e sa lakor ant Ikrenn ek Linyon Eropéen pa sinye: nuvo gran mobilizasyon ek sutyen Lerop ek USA, lokipasyon sant Kyiv (Maidan) e lokipasyon plizyer batiman guvernman: konfrontasyon e lapolis vinn ase vyolan e plis ki 80 dimunn truv

lamor an Desam 2013 ek Zanyye 2014. Tu dimunn dakor, sa vyolans la ti furni par sa bann regrupman fasist ki nu finn mansyone. Me sa finn destabiliz guvernman Yanukovych, prodir enn kudeta. Apre ku deta, li oblige abandonn puuvwar, kit Kyiv.

Se apre sa ki an Fevriye ek Mars 2014, gayn anexasyon Krime par Larisi e apre proklamasyon Repiblik separatist dan Donecksk ek Luhansk. Me konfrontasyon arme avek Larme Ikrenyen amenn plis ki 13,000 mor, laplipar separatist, e kitfwa 1.5 milyon refizye ki travers frontyer ek al dan Larisi.

Apartir Zin 2014 nuvo Prezidan Poroshenko ek nuvo Parlman deklans enn seri nuvo lalwa pu konbat tandans pro-Larisi, e nuvo mezir pu akseler integrasyon avek Linyon Eropein e mem dan OTAN.

An Avril 2019, dan dezyem rawn eleksyon prezidansyel, Zelen-sky, enn ansyen komedyen, vinn Prezidan, e so premye muv se raprosman ek Prezidan Trump. Sekreter Zeneral OTAN fer enn long vizit dan Odessa, prinsipal larad Ikrennen dan Black Sea. 1 Septam 2021, Biden tir enn kominke ki dir Ikrennen pe deza travay ar USA antan ki “enhanced opportunity partner of NATO”, setadir “partner OTAN lasans ogmante”. Sa ti sinnyal pu al ver lager, si OTAN pa met aryer. ■



Alberbo Beltran, Poster pu Lape

LALIT fer KOZRI ek VEYE KONT LAGER

Vandredi 15 Avril LALIT ti fer enn kozri avek trwa orater e apre sa, enn veye ar labuzi divan kartye zeneral LALIT Rut Rwayal GRNW lor tem “Lager Non!” ant 5:30 ek 7:00 pm. Li form parti nu long travay kont militarism ek kont lager.

Enn trantenn dimunn ti reyni pu rezet rezolisyon konfli imin atraver zarm ek lager. Li neseser tultan rod minimiz sufrans imin ek lamor, kuma nu pe truve ena dan konfli avek zarm ant Larisi ek enn Ikrennen ki arme par OTAN, sirtu par USA. E sa lager la, li vinn apre 8 an lager sivil ki ti swiv apre enn ku-deta ti tir Prezidan eli, enn 8-an lager kot deza 14,000 dimunn ti fini truv lamor.

Dan sa rankont kot LALIT, ti ena trwa orater, Alain Ah Vee, Lindsey Collen ek Ragini Kistnasamy. E lerla ti ena veye lor bor Rut Rwayal divan bis, minibis, motosiklet ek loto ki ti pe pase dan 2 direksyon divan laport, ki ti ralanti, e ena ti kriye zot sutyin.

Prezan ti ena manb diferan Brans LALIT ek manb *Muvman Liberasyon Fam*, osi byin ki enn reprezantan *Confederation des syndicats du Secteur Privé* Reeaz Chuttoo, *All Civil Service Employees Federation*, Vinod Seegum, plis enn delege *General Teachers' Union*. Evennman la ti organize dan kad respe 2 lalwa – enn konsernan COVID ki limit a 50 dimunn enn reynion, e enn rezi par lalwa represiv Public Gathering Act, kot dan lespas publik pu veye, a nerport ki moman nu finn limit prezans a mwins ki 12 dimunn. Nu finn byin metikile dan respekte sa 2 lalwa la, premye la parski li enn lalwa saz etan done leta pandemi Koronavirus, e dezyem la akoz lapolis pe azir brit e partizan dan aret dimunn, sirtu dan dernye enn semenn.

Tem – pu Deba

LALIT ti partaz enn ti trak ki reprezant nu laliyn politik ki nu

tuzur pe debat, amizir nu prepar publikasyon nu Revi LALIT No 147 ki pu sorti dan 10 zur, e ki pu konpil enn 20-enn lartik lor diferan laspe lager dan Ikrennen. Ala konteni trak:

“Non a Lager! Tansyon Lager Nikleer!

“Larisi bizin retir so larme depi Ikrennen!

“OTAN bizin aret expann ver Lest! Bizin kumans demantel OTAN!

“USA bizin aret “sakrifye” lepep Ikrennen. USA bizin evit provok lager nikleer!

“Sa vedir Ikrennen res ‘neut’, pran langazman pa zwenn OTAN, Larisi retir so trup net, e Larisi ek Ikrennen met enn taymtebl, apre 8 an lager sivil ar 14,000 mor, e 2 mwa lager-mem, negosye frontyer.

“Anmemtan, bizin:

“Ferm tu baz militier etranze! Sa inkir ferm baz Diego! Nu responsabilite, sa!

“Konverti tu baz militier an stasyon meteo, biro pu monitor klima, fer resers lor lenerzi renuvlab.

“Ferm tu larad ek ayropor a navir e avyon deger etranze! Dan Moris, sa vedir: P. Louis, P. Mathurin, Diego, Agalega, St Brandon, Tromlin.

“Aret prodir armaman! Konverti lizinn zarm an prodiksyon otur lenerzi renuvlab.

“Re-negosye trete anti-nikleer ki Leta Zini finn responsab kase, e demantel tu zarm nikleer.”

Alain Ah Vee ti sitye sa kozri ek veye la dan kad enn seri aksyon LALIT – lafis, trak, e Revi ki pu sorti sa mwa la – aksyon ki viz pu aprofondi nu konpreansyon e analiz lor lager ant Larisi ek Ikrennen, osi byin ki pu opoz li dan enn fason serye. Alain ti apel OTAN, ki so expansyon san-ses deryer sa lager la, enn nom apropriye: li enn “lalyans militarist”.

Lindsey Collen ti liye roman *War and Peace* par Leo Tolstoy avek manyer ki nu bizin anmemtan kont lager, kuma Tolstoy ti ete, e osi, kan nu truv nu omilye enn lager, kuma enn so personaz enn Zeneral dan larme Larisi kont Napoleon, ki ti tultan rod kimanyer minimiz sufrans imin ek lamor imin, ki li kote vilazwa kot zot traverse, ki li kote so prop zom, ki li kote solda

ubyin LALWA INTERNASYONAL

Pandan dernye 30 an, pu kasyet tu so krim-deger, Leta Zini ti finn kasyet konsep kle "lalwa internasional" dan fon enn tirwar.

E li ti finn tir enn nuvo konsep, plito enn *fos* konsep, depi enn sapo kuma mazisyin fer. Alalila, enn nuvo konsep: "Rules-Based-International-Order" (RBO) swa "Lord Internasional Baze lor Regleman". Sa "regleman" la, li fer par dirizan Leta Zini, amizir li vyollalwa internasional, pu kasyet li. RBO sey kuver tu gabzi Amerikin, tu so infraksyon lalwa internasional. Sa RBO la li ekivalan reyn Neo-Liberal inpoze par kapitalist internasional apre 3 kolaps ammemtan apartir 1991: kolaps laspe "welfer steyt" dan Leta dan Loksidan, kolaps lekonomi Linyon Sovyetik, kolaps "sosyalism stil Tyer Mond" – tu ranplase par reyn kapital *finansye*. Pa nerport ki kapitalist ki reyne zordi, me kapitalis ki fer larzan ar larzan ki o-puvwar. E se li ki finn amenn sa konsep RBO la.

U pu remarke mo ti servi term "ti finn". Sa li parski, asterla, kan leta U.S.A. inn deside pu dormt dabor Larisi, e answit Lasinn, li pe bizin re-tir "*lalwa internasional*" depi dan fon so tirwar. Sinon, li pa pu gayn ase sutyin. Sa kuyonad "Rules-Based insi-deswit" la, li klerman pena okenn sinifikasiyon. Li initil, kan asterla Leta Zini pa pe zis sey defann li-mem, me osi atak dabor Larisi, answit Lasinn – militerman. Kifer? Parski depi plis ki 300 an "enlightenment" (lepop "eklere"), enn zafer minimem ki nu partaze, se sa: moralite ek lalwa aplik parey ar tu dimunn, e pu tu pei.

Me, RBO finn permet USA ek NATO fer nerporte-kwa, setadir donn nerport zistikasyon pu lager, ki alor li riske permet Larisi ek Lasinn fer nerporte-kwa, zot usi. Si Leta Zini finn zet konsep "lalwa internasional", li realize ki li futi kan li rod atak Larisi, e answit Lasinn.

RBO finn servi pu maske krim ki USA ek NATO finn komet dan zot lager dan Yugoslavi, Irak, Lalibi, e Lasiri, e pandan 20 banane bombard Afganistann – san kont so "loperasyon spesyal" dan pa kone komye pei. Wi, Putin finn ramas sa term "loperasyon spesyal" la depi dan vokabiler larme Leta Zini so "Special Operations Forces" – enn 70,000 "zom" par la partu dan Lamerik Latinn ek Lafrik kot Lamerik avoy so larme an katimini, bom par isi, eklat par laba, asasinn par isi, kokin dimunn par la, al tortire lor Diego Garcia, ferme lor Guantanamo, tu kumsi-ryin-ete.

Dan Lerop, sa bann bandi la apel par enn sig regretab, SOCEUR (Special Operations Command – Europe), e zot ki pe opere par deryer larme Ikrenn, an tandem avek batayon fasist kuma C14, Azov, etc, pandan 8 an dan Dombas e zordi zot antrenn solda Ikrenn.

Me, ki diferans ena? Ki diferans ant RBO ek "lalwa internasional"?

"Lalwa internasional" li pa plis ki lakerite anterm "trete internasional" ki finn deza tom dakor. Angranliyn, lalwa internasional li inkriste dan konvansyon internasional, depi Konvansyon Zenev an 1949, e mem avan, e ki zordi aplike par instans Nasyon Zini – so Konsey Sekirite ek so Lasamble Zeneral tu Pei Manb. Alor, li pa pli bon ki lakerite lansanb guvernman dan lemond. Ammemtan, li ase kler pu tu dimunn ki exakteman li ete. Par exanp, pu deklar lager бизин swa gayn lotorizasyon Konsey Sekirite Nasyon Zini, ubyin bizin pe azir an self-defenns. Par kont, RBO li pena okenn konteni apar seki Leta Zini so lebra lager – setadir Pengatton – ek so lebra medya – kuma CNN – donn li dan nerport ki moman done.

Alor, enn ku dirizan USA finn aret tro servi lexpresyon RBO. Me, so tutu pankor realize. Alor, pandan invazyon Larisi lor Ikrenn, Minis Zafer Etranze Kanadyin koz Larisi pa pe respekte RBO!! ■

lekip opozan. Konsernan lager dan Ikrenn, nu osi, nu bizin gete kimanyer propoz kiksoz ki al ver lape, e ki antretan eparyn lelep Ikrenn e solda ordiner de kote, depi tu sa sufrans inimazinab la. Apre Lindsey ti analiz OTAN, depi so bi exprime par Sekrete Deta USA lepok so fondasyon: "USA in, Russia out, ek Germany down!" Sa tuzur so bi. Larme USA alatet OTAN, li protez investisman USA dan Lerop, depi Plan Marshall ziska zordi, atraver rant "andan" (*in*) ar so misil li-mem, asire ki li gard Larisi "andeor" (*out*), e ki li gard Lalmayn "ater" (*down*). Trwazyem but diskur la ti lor ki "rezon" pu lager dapre lalwa internasional: swa enn Rezolisyon Nasyon Zini, swa self-defenns. Pena rezolisyon Nasyon Zini. Klerman Ikrenn kalifay pu "self-defenns". Larisi klem self-defenns. Li dir, e li pa manti, USA pe anserkle li militerman ar misil lor so frontye. E etan done ki mem lalwa aplike pu tu pei, USA finn fer buku lager ki pa self-defenns, kuma kont Irak, Afganistann, Lasiri, Lalibi.

Ragini Kistnasamy ti koz lor linportans ki nu konpran kimanyer sa rezo 800 baz militer USA ek OTAN zot enn menas konstan kont lape, e kimanyer nu responsab pu fer ferm omwin enn ladan: baz militer USA lor Diego Garcia, ki finn deza servi pu atak lelep dan Afganistann ek Lirak, e ki enn baz *nikleer*. Enn baz *nikleer*, li finn explike, li enn menas pu lemond net, pu limanite net. E sa lager dan Ikrenn la, si kontiyne, li riske enn konflagrasyon nikleer. E USA e Larisi posed plis ki 90% zarm nikleer dan lemond. Alor, ena enn menas extinksyon limanite.

Nu bizin realiz sa, e rod enn fason met presyon pu negosasyon pu fini sa lager la, dan kad enn demantelman tu zarm nikleer, dan kad enn fermtir tu baz etranze partu dan lemond. Se sa ki pu amenn lape. ■

Lakoz Direk ek Lakoz Profon

Lager Larisi finn deklare kont Ikrenn, li pena okenn sans si nu pa get li dan enn pli gran lennz.

Anfet Leta Zini avek so NATO ki li kontrole, pe fer enn bild-ep militer kont Larisi depi pre 30 an, e sirtu dan Ikrenn-mem depi 2014. byin vit apre lager deklare, Prezidan Biden larg lakle: li dir Prezidan Putin bixin ranplase – kumsidire sa bi USA dan lager ki li pe fer Ikrenn amene. Biden finn sey re-aval so parol apre, me li ti fini dir li dan diskur ofisyal.

NATO li enn lorganizasyon pirmen *militier*. E NATO kontrole par Leta Zini. Li-mem profit lavant zarm ki NATO exzize ki so manb aste. Dayer, enn solda Amerikin pa gayn drwa travay solda su lord enn non-Amerikin! Ki sa vedir pei Lerop ete?

Tu sa lezot manb NATO apar Leta Zini Lamerik – Kanada, UK, pei Lerop – pe anfet travers enn moman kot Leta Zini pe dornt zot, par expre. Kan Leta Zini impoz sanksyon kont Larisi, Larisi sufer. Me pei Lerop osi sufer. Leta Zini par kont profit lavant so prodwi petrolye, so dible. Biden pe servi sa lager, e sufrans lepep Ikrenn, pu relans lekonomi Leta Zini apre lepidemi Koronaviris e apre lafin lager Afganistann. Dan OTAN tu manb bixin servi 2% zot PIB pu zarm, e kot zot aste? Ar Leta Zini.

Tusala pu dir ki sanksyon ek lager, li pe viz sirtu pu “fatig” Larisi, me anmemtan afebli Lerop vizavi Leta Zini Lamerik.

Anfet depi 20 an, NATO finn kumans lager andeor Atlantik Nor e.g. li finn bombard e militerman okip pei osi lwin depi Losean Atlantik ki Afganistann. NATO finn vyol lalwa internasional par bonbard Yugoslavi. Anfet USA fer tu manb NATO partaz “tor” sa vyolasyon lalwa internasional la. Ena zis 2 rezon kapav fer lager: swa avek konsantman Konsey Sekirite Nasyon Zini, ki pa ti gayne pu

bombard Yugoslavi, Lirak, Lalibi, Lasiri, swa dan self-defens, ki tu sa bombardman pa ti kapav dir existe. NATO, kan li degrad respe pu lalwa internasional, Larisi finn sezi lokazyon, fer parey kan li santi li menase par NATO.

Si ekut zis enn televizyon kuma CNN – “lebra propagann” militer Amerikin - u pu krwar ki lakoz lager li le swivan:

“San okenn provokasyon, Prezidan Larisi Vladimir Putin, finn bez fu, finn invayir enn pei vwazin pezib, Ikrenn. So bi, dapre CNN, se batir enn lanpir Larisi kuma lepok Tzar, ubyin kuma lepok Linyon Sovyetik. Rol Lamerik se pu ed Ikrenn ki ena ‘enn brav tilépep’”.

Me, si nu gete ki finn arive avan invazyon, nu konpran. Larisi truve ki ena expansyon OTAN san-ses depi 2000 (get map kuvertir deryer), e ena ku-deta formante par Leta Zini dan Ikrenn kont Prezidan eli an 2014, aksyon finn swiv: Rebel anti-sa rezim ku-deta la dan Ikrenn dan rezyon Donbas rod separe depi Ikrenn, e truv zot atake sirtu par batayon fasist, kuma Azov, ki fer masak civil. Krime, ki ti dan Ikrenn depi li separe depi Larisi anexe Krime. Dimunn Krime dakor.

Kan byin gete, Larisi finn imit Leta Zini ek OTAN dan ka Yugoslavi. Kot u gayn enn mazorite, u nuri separatist, u form enn nuvo pei. Yugoslavi finn vinn 7 pei, e ankor pe kontiye fraktire.

Me, anfet Leta Zini finn antrenn “Special Operations forces” dan Ikrenn depi avan ku-deta 2014. Depi 2014, “US and Western special-operations forces have trained Ukrainian troops to conduct unconventional warfare” (www.businessinsider.com). Leta Zini ena so “U.S. Special Operations Command Europe” ki organiz tu sa antrenman la depi Stuttgart dan Lalmayn. (Remarke

ki Prezidan Putin, kan li apel so lager kont Ikrenn enn “operasyon spesyal” e pa enn “lager”, li pe sikann Leta Zini ki depi 8 an pe prepar lager la, me apel li “operasyon spesyal”. Larme Ikrenn pe amenn enn lager avek zarm ki finn tuy 14,000 dimunn, laplipar civil, dan rezyon Donbas akote Larisi.)

Sa lekip Leta Zini la ki antrenn larme Ikrenn, ki finn tuy buku sa 14,000 dimunn, li ena enn sig revelater “SOCEUR” (Special Operations Command Europe). Ladan lepep Ikrenn pey lepo kase. Li sufer. Li riske mor. So pei rwine.

Ena enn 100-200 solda Amerikin depi *Florida National Guard* ki ti dan Ikrenn dan enn rol ‘konseye’, dapre port parol Pentagon John Kirby an Zanvye. Antuka, kan Larisi ti pre pu invayir Ikrenn, Biden finn donn lord pu zot sorti Ikrenn. Kumsa, les Ikrenn debruye tusel anterm solda. Les popilasyon civil mor dan Ikrenn.

Leta Zini pu zis furni armaman ek larzan. Leta Zini pu zis furni propagann pu kontiyn lager-mem, ziska Larisi epwize, ziska Lerop feb, e ziska Ikrenn aneanti. Apar sa, zot pena “bi”.

Anfet le 1 Septam 2021, setadir 6 mwa avan Larisi invayir Ikrenn, ala get sa “Lakor Konzwin” Leta Zini ek Ikrenn ki Biden met lor so websayt White House: “*We [USA] intend to continue our robust training and exercise program in keeping with Ukraine’s status as a NATO Enhanced Opportunities Partner.*” Sa deklarasyon la ki lakoz direk lager.

Sa konfirmasyon ki Ikrenn pe zwenn NATO, se sa ki finn vinn lakoz profon deryer sa lager la.

Pu anpes lager, tu seki Leta Zini ti bixin fer se dir NATO pa pu expann dan Ikrenn. Se tu. ■

LC ek LY

Kisannla dan Leta Zini ena Kuraz Kritik rol USA ek OTAN?

Li vo lapenn nu dres enn ti lalist dimunn dan Loksidan ki finn kritik Leta Zini, ki moter expansyon OTAN ki asontur finn met Larisi su menas atak militer. Li enn lalist dimunn ki finn predir konsekans grav si Leta Zini puse pu expann OTAN ziska dan Ikrenn, viz instal zot misil laba.

Kriz la ti kumanse dimoman Leta Zini kumans antrav langazman formel done par James Baker so Sekreter Deta an 1990 kumkwa OTAN pa pu expann “mem enn sel pus” ver Lest. Kriz la ariv so pwin buyant, ariv 1 Septam 2021. Sa zur la, *White House* anonse ki etan done Ikrenn enn “partner OTAN ki so sans avanse” (“enhanced opportunity partner of NATO”) ki Leta Zini pe antrene militerman.

Nu tu kone ki dimunn dan lagos dan Lamerik finn opoz expansyon NATO, kuma enn eleman santral dan enn program kont militarism e kont nikleer. Ena Prof Noam Chomsky, intelektyel degos pli koni dan Leta Zini, par exanp. Ena muvman klas travayer. Ena muvman pu lape. Ena kuran politik dan UK, kuma Bertrand Russell Peace Foundation, ki pe averti lor danze sa expansyon OTAN la depi lontan. Sa pa vedir zot pe sayd ar Larisi. Lagos pe averti ki Leta Zini pe avantire dan enn fason danzere.

Seki buku dimunn pa realize, se osi boner ki 1997, 50 top diplomat Amerikin ti avoy enn let uver Prezidan Clinton, akiz li, kan li pe rod pu premye fwa expann OTAN ver Lest: “Sa,” zot finn ekrir, “li

pu enn erer polisi monimantal dan enn proporsyon istorik.”

Zordi nu pe viv konsekans.

Jack Matlock ansyin Ambasader US dan Mosku ti dir an 2022, “Expansyon OTAN ti enn erer monimantal, pli gran erer dan listwar US depi Lager Frwad”. An 1997 li ti deza dir divan Kongre, “Rekomandasyon ladministrasyon pu OTAN pran nuvo manb, li malzize (*misguided*).”

Ansyin Sekreter Deta USA, Henry Kissinger finn averti kont sa. Si kikenn kapav zize, se li.

Dan so liv memwar, sef aktyel, la, la, la, CIA, William Burns, exper dan zafer Larisi, ansyin Anbasader USA Mosku, finn donn mem avertisman. Napa kontiyen expansyon OTAN! Li danzere.

Diplomat experyanse, George Kennan, depi an 1997, ti pran enn pozisyon pli sever, “Expansyon NATO pu erer pli orib dan polisi USA dan totalite lepop apre Lager Frwad.”

Anbasader Chas Freeman, diplomat Amerikin ti byin sever lor rol danzere ki USA pe amene.

Ansyin Sekreter Defans, William Perry, ti averti kont expansyon NATO, li osi.

Lezot gran peto kuma Malcom Fraser, ansyin Premye Minis Lostrali (pa mwins) finn averti e re-averti kont met NATO dan Ikrenn. Owen Harries, exper politik etranze Ostralayin ti opoz expansyon NATO, e so lager dan Bosni ek Kosovo, e plitar opoz Bush so doktrinn invante pu

zistifye enn nuvo swadizan “lakoz akseptab pu lager” apel “lager prevantiv”.

Profeser syans politik meynstrim John Mearsheimer, parey. So argimantasyon byin an-ord.

Oliver Stone, sineas, akter, ero lager Vietnam ki ti gayn meday tu, finn blam Lamerik buku pu sa provokasyon militer kont Larisi. Ena de so dokimanter lor YouTube. (Bizin ranpli enn form akoz zot finn met enn limit laz 12-an pu fim.)

Zot bizin kuraz, selman. Parski gran mazorite Amerikin ek intelektyel Oksidental, zot krwar Leta Zini ek Loksidan an rezon. E gran, gran mazorite krwar Lamerik *tultan* ena rezon. E, zot “an rezon” pu expann OTAN, pu plas misil ki menas Larisi tutolong so frontyer. Zot truv sa normal. E kan Larisi reazir, zot dir, “Alalila, mo ti dir u! Larisi sovaz!” Li vinn enn profesi ki u provoke pu fer li vinn vre.

Ena mem enn bann ki ti ariv realize ki invazyon USA-UK dan Irak ti baze lor mansonz, ki lokipasyon Afganistann ti enn krim, me ki tuzur krwar ki zordi USA an rezon. Zot met zot konfyans dan so Blinken, so Biden, so Mme Nuland, so Boris Johnson, so Mme. Truss ek sa Misye Jens Stoltenberg, ki vinn zigile lor TV lor kimanyer OTAN ena rezon, ena rezon. Sirman, ena parmi ki niye ki kolon Amerikin ti fer zenosid kont tu sa lepep ki ti res Nor Lamerik, niye ki lekonomi Amerikin ti baze lor travay gratis esklav ti oblize furni, alor mansonz pa nuvo pu zot.

E pu zot, pa fer naryin si Lamerik tuzur ena so “Doktrinn Monroe”, ki dir kumkwa li-mem, Leta Zini, li gayn “drwa” domin totalite Lamerik Latinn; lot pei pa gayn drwa met lipye. Lir nu lartik dan sa Revi la lor la. ■

LC



Leon Bibel, War Casualty, 1937

Komye dimunn dan lemond Vot pur Rezolisyon USA kont Larisi?

Dan LALIT, u pu truve par nu lafis, lor nu trak, e dan tu nu lartik, nu pe dir Larisi bizin bat an-retret, sorti dan Ikrenn. Me, nu pe osi dir ki nu byin kone kisannla responsab pu sa lager la: Leta Zini. Leta Zini e so expansyon konstan militer atraver OTAN ki finn provok sa lager la.

Kan medya kuma CNN, BBC, France 24 rapporte ki "gran mazorite" ubyin "tu dimunn dan lemond" finn vote kont Larisi dan Lasanble Zeneral Nasyon Zini, eski sa vre?

Nu bizin rapel ki guvernman Leta Zini napa kontan sarye fardo lager ki li provoke. Li tultan sey ris lezot pei ar li. Kumsa li reysi partaz blam pu tuyeri ki li responsab. Parfwa li gayn OTAN ar li e.g. pu bombard Yugoslavi, swa pu bombard lepep Afganistann pandan 20 an. Parfwa li gayn Grand Bretayn tusel, kuma pu fer tuyeri dan Lirak. Zordi dan lager Larisi kont Ikrenn, Leta Zini pe sey pretann li pa vreman dan lager la ditu – li "zis" furni antrennman dan "loperasyon spesyal" larme Ikrenn, e li "zis" furni zarm "mortel" (*lethal*) depi so lizinn armaman kuma li vante lor television – e anplis, li ena "lemond antye" ar li. Mem si li sipozeman pa dan lager la ditu. Konpran sa, u!

Me, seki manti se kan li dir li "pa" dan lager. Enn furniser zarm ek antrennman, li dan lager. E li osi manti ki "lemond antye" pe sutenir sa Rezolisyon Nasyon Zini ki U.S.A. finn fer vote kont Larisi.

Seki vre se 141 pei ti vot anfaver lor enn total 193 pei dan Nasyon Zini. Li enn gran mazorite "pei", pa enn mazorite *dimunn*. Zis 52 pei ki *pa* finn vot anfaver. Zot finn vot *kont* (5 pei), *abstenir* (35 pei), swa deside pu *absan* (12 pei). Li enn gran, gran mazorite *pei* ki finn vot anfaver rezolisyon. Enn minorite *pei* ki finn vot kont. E sa ki konte.

Me.

Me, kan get anterm *popilasyon*



pei ki finn vot anfaver, u pa kapav dir gran mazorite "*dimunn*" dan lemond anfaver. Li pa zis pa vre. Li kareman fos.

Kan u kont nomb dimunn reprezante dan sa vot la, ena 4.5 milyar dimunn ki napa finn reprezante dan vot anfaver pozisyon Leta Zini, lor enn popilasyon mondal 8 milyar par la. Sa vedir enn mazorite "konfortab" *pa* finn vot ar Leta Zini. Mem Leta Zini so nuvo alye, Lind, pa finn vot ar Leta Zini. Pli presizeman, laplipar *dimunn* dan lemond finn refiz vot ar Leta Zini. Antuka, zot *PA* finn dakor sifizaman pu ki zot mem vot enn rezolisyon ase tyed kont Larisi pu dir Larisi bizin retir so larme depi Ikrenn.

Alor, kifer tu sa gran, gran stasyon televizyon kuma CNN ek BBC ale-mem, "gran mazorite dimunn dan lemond" ubyin ale-mem ar preske ena "linanimite", kumsa? Bizar, non? Zot ena matyer griz?

Repons se sa: Li seki an Angle apel enn "*tumbril*". "Enn *tumbril*" enn fason parle kot kikenn dan enn klas sosyal pwisan ondire uver enn vann e vit-vit larg kiksoz orib enn kut, normalman enn prezize, parey kuma saryo lontan ti uver so vann par deryer vit-vit pu baskil malpropte, sipa nayt-soyl dan enn demp. Enn *tumbril* notwar se kan defin Princess Margaret dir, "Mo ador al Bahamas parski *pena personn* laba". Enn dimunn se enn dimunn ki konte pu *li*. Ubyin, pli presizeman, dimunn laba pa *dimunn* pu *li*.

Sa vedir tu sa dimunn ki zot reprezantan finn refiz vot anfaver rezolisyon Leta Zini, napa konte.

Pli presizeman, zot "pa dimunn". Sa permet tu sa televizyon, lagazet, radyo ale-mem ar "tu dimunn", "gran mazorite", "a linanimite" dimunn dakor ar "nu, bann Amerikin". Me, zot napa a-lez. O-fon de zot-mem, zot kone ki zot pozisyon antan ki inperialist pe permet zot fer "*tumbril*", parey kuma Princess Margaret. Pa zis dirizan Amerikin napa a-lez pu bizin dir sa. Zot amerde.

Sa premye vot la, kot mazorite dimunn dan lemond finn an realite refiz vot ar U.S.A. ti fer Nasyon Zini, 2 Mars 2022. Sa ti apre set zur lager. Invazyon Larisi, rapel, ti lanse le 24 Fevriye.

Apre sa vot la, pandan 3 semenn, Leta Zini ek tu so masinnri propagann – sirtu CNN li, li "lebra propagann" kote militer pu USA – zot tu finn ale-mem lannwit lizur ar so "breaking news" kot atak Larisi, atak Putin, dekrir li kuma "fu", "kriminel deger", "pa ti devet Prezidan", etc, e promuvwar Guvernman nasyonalist Ikrenn su Zelensky, sirtu kasyet Ikrenn so bann batayon fasist (Azov, C14 osi koni kuma S14, The Right Sector, an totalite apel par ansyin nom pu fasist depi lepok Hitler "Freikorps"), kasyet lefet ki Zelensky pe azir kuma enn espes azan pu expansyon OTAN, e pu lavant zarm USA. Zot sir zot propagann pu marse pu gayn plis "dimunn" ar zot.

Alor, ariv 24 Mars, U.S.A. ki li fer? Li propoz enn dezyem Rezolisyon divan Nasyon Zini.

Sann kut la, li sir li pu gayn buku plis pei, e petet mem "gran mazorite" dimunn lor planet ar li, e li pu kapav dir "wadire linanimite" ar nu kont Larisi (li truv zis blan-nwar, li) pu de-vre.

Alor, Lamerik amenn enn 2yem rezolisyon. Me, li finn dekuyone.

Anplas 141 anfaver rezolisyon USA, li finn gayn 140. Pa zis enn pei ki finn sanz so vot, vot kont USA. 5 finn sanze depi sutenir

KLEPTOKRAT E DANZERE

Rezim Putin dan Larisi

laliyn USA, ziska pa sutenir. Anmemtan, 4 finn sanze dan lot sans, setadir pu sutenir Leta Zini pu premye fwa. Alor, Leta Zini finn gayn enn pei mwins apre 3 semenn propagann konstan. Me, anterm nomb dimunn reprezante, li finn amelyor so skor. Apepre 235 milyon finn sutenir laliyn Loksidan pu premye fwa, e 35 milyon finn sanze depi sutenir ziska pa sutenir. Me, tuzur enn gran mazorite dimunn lor planet pa finn vot anfaver Rezolisyon Amerikin.

Sa re-repete, kan li amenn enn Rezolisyon divan Lasanble Zeneral 7 Avril pu expilse Larisi depi Konsey Drwa Imin Nasyon Zini. Sann kut la, USA pa gayn mem 140 pei ar li. Li gayn zis 93 pei vot so rezolisyon. E tuzur sa lespri inperialist napa konpran kifer.

Konklizyon

Ena tuzur, apre sa baraz propagann militer lor televizyon, ankor enn mazorite imin lor bul later ki napa finn dakor avek pozisyon USA, UK ek so Linyon Eropyin. Zot pozisyon pli niyanse. Dayer Reprezantan Sid Afrik ti mem prezant enn lot Rezolisyon net.

Anpasan, Guvernman Moris finn vot anfaver rezolisyon kont Larisi dan tuletrwa vot.


Nu, dan LALIT, nu osi, nu anfaver ki Larisi retir tu so trup, e aret sa invazyon la.

Me, dan LALIT, nu pa bet.

Nu kone ki deryer Ikrenn ena OTAN, e deryer OTAN ena USA, e deryer USA ena so lizzinn armaman: so konplex-indistriyel-militer-medya. Alor nerport ki rezolisyon ki niye sa realite la, li farfeli. Li pa pe truv seki divan lizye tu dimunn.

Ala, kifer nu ekrir sa lartik la. Li enn realiti-check. ■

LY ek LC



Kan Prezidan Gorbachev ti pe gid Linyon Sovyetik dan so proses liberalizasyon dan 1991, ti ena 2 tandans ki ti pe milite pu sanzman anmemtan. Dan LALIT, nu ti diskit sa buku, e ekrir buku lartik lor la alepok.

ENN tandans ti pe al ver liberalizasyon ekonomik, setadir privatizasyon masif tu sa imans infra-strikfir Larisi la, pu etablis enn sistem kapitalis an-reg laba. Sa ti apel "perestroika". Li ti ule dir "restrikfirasyon". Anfet li ti seki FMI-Labank Mondyal ti pe prekonize partu, setadir depi bann lane 1980-90.

Lot tandans la ti enn muv, sirtu dan klas travayer Larisi, pu plis liberte-mem, plis demokrasi – tusala san privatizasyon, san "liberalizasyon ekonomik" ki Loksidan ti pe rod inpoze. Sa 2yem tandans ver demokratizasyon ek ver laliberte ti apel "glasnost". Li ti ule dir sirtu zafer kuma plis "liberte dexpressyon" ubiyin "luvertir pu diskit politik", plis liberte pu organize politikman.

Nu finn truv pa zis "glasnost" finn kompletman perdi, me sa "perestroika" perse, vinn enn kapitalism debride net. Kumadir seki pli pir dan neo-liberalism finn pran kontrol dan Larisi, e dan buku so ansyin Republik ek so ansyin alye dan Pak Varsovi.

Kan manb ase sinnyor dan Parti Kominist dan Parlman Larisi sey fer enn espes ku-deta kont Gorbachev, e ku la finn perdi, Yeltsin vinn opuvwar, avek sutin publik Leta Zini. Depi lerla-mem li vinn Prezidan, e kumans azir par dekre. Li demantel Parti Kominis e Linyon Sovyetik kumans dezintegre.

Depi lerla, Larisi kumans gayn apelasyon "kleptokrasi", setadir "reyn par voler", me pli gran voler ti anfet bann kapitalist dan Leta Zini ek Lerop. Seki apel bann "oligark" finn kokin – e kasyet dan konpayni ofshor – 200

milyar \$ US depi lepep Larisi. Tu sa "kapital" ki ti nasionalize ti dibyin lepep Linyon Sovyetik, enn bon parti pu lepep Larisi, ti vinn propriete prive enn ase tipti poyne milyarder, ki finn re-vann zot aksyon ar milyarder Oksidental ki finn re-vann li ankor. Oligark Larisi, ki zordi su sanksyon Oksidental akoz lager Larisi kont Ikrenn, zot reprezant sa priz puvwar par bann voras-mem ki finn privatiz dibyin komin kree pandan 70 an, apre revolisyen klas travayer dan Larisi an Oktob 1917. Sa reyn birokratik brital, ki apel "Stalinism" (apartir 1924), li finn dire, ziska sa muvman otur Gorbachev pu sa 2 kalite sanzman – enn ver kapitalism debride (perestroika), lot ver plis liberte pu lamas travayer (glasnost), me kot Perestroika asir puvwar pu enn klas kapitalist emerzan otur Yeltsin.

Anmemtan, tu sa dezord ekonomik la finn favoriz tu kalite muvman nasyonalist de-drwat dan Larisi li-mem osi byin ki dan tu sa lezot Republik ki ti konstitiye USSR, osi byin ki dan bann ansyin manb Pak Varsovi, inkliir Ikrenn. Kumsa ki buku Republik ki ti form parti Linyon Sovyetik finn deklar Lindepandans. Sa dezintegrasyon Linyon Sovyetik la, ti arive anmemtan ki Gorbachev ti donn parol, e sa parol la finn garde, pu demantel Pak de Varsovi (ki ti met dibut 7 an apre NATO pu bare kont agresyon depi NATO) lor kondisyon ki NATO napa expand "enn pus" ver Lest.

Zordi, se Putin ki finn reyne, depi lan 2000. Yeltsin, ki ti'nn vinn enn sular total, e ti ena ka koripsyon kont li ek so fami, ti kareman nom Putin, sef servis sekre KGB, kuma so sikseser. E li finn res o-puvwar depi lerla mem. Li ti swiv dan mem politik ki Yeltsin. So premye travay, pas enn lalwa ki dir Yeltsin ek so fami pa pu gayn okenn ka kont zot pu koripsyon.


Ki Exakteman USA pe Vize?

Putin reyne avek enn represyon brital kont klas travayer, e kont lapres. So reyn finn vreman prodir enn form kapitalism neo-liberal e diktater. Otur-de-li, ena enn grup lider militer byin for, byin nasyonalist, ki finn erit enn arsenal nikleer egal, ubyin mem pli gran, ki pu Leta Zini. Ena osi enn grup oligark, milyarder mafya, ki sutenir li.

Larisi so invazyon Ikrenn, li form parti enn “defans” kont expansyon NATO, ki reprezent, dapre Putin, enn menas existansyel pu Larisi. Putin ena, li vre, nostalzi pu lanpir Larisi imans lepok Tzar e plitar Linyon Sovyetik, avek enn Pak Varsovi ki ti pe ranforsi li. Me, so invazyon, li form parti enn muv defansiv ki tu latet-pansan dan Loksidan ti predir.

Alor, kan LALIT pran pozisyon nu kumans sak fwa par dir Larisi bizin retir li, e nu azute, sak fwa, ki OTAN bizin aret so expansyon, bat retret. Li importan pu terminn sa lager la, ki tu dimunn kumans panse dan enn fason rasyonel. Sa 2 demand la, zot pu aret sa lager la e eparyn lepep Ikrenn depi sa sufrans li pe traverse. Li pu anmemtan neseser pu tom dakor lor enn prosesis demokratik, dapre enn taymtebl, pu Larisi ek Ikrenn negosye frontyer ant Ikrenn ek Larisi, apre anexasyon Krime par Larisi e apre Larisi finn rekonet “lindepandans” sa 2 provins Ikrenn dan Lest Ikrenn. Me, bizin enn sese-defe tutswit. ■

LC



Escher, Sketch Batiman

Guvernman Joe Biden pe viz kat zafer kan li provok Larisi pu invayir Ikrenn, an lord priorite:

1. *Fer Ikrenn totalman depandan lor USA*, e lor OTAN, e kumsa gayn kontrol lor larises Ikrenn, e gayn enn nuvo pyetater pli pre ankor ar Larisi pu ki OTAN kapav reprezent enn menas konstan kont e nerport ki Guvernman Ikrenn e nerport ki Guvernman Larisi. Anmemtan, Leta Zini pe viz pu:

2. *Fatig Leta Larisi ar enn long lager*, ranplas guvernman Putin osi vit ki posib, me pa avan ki finn afebli Larisi sifizaman pu ki Leta Zini kapav met enn so bann maryonet amplas. Anmemtan, pe viz pu:

3. *Afebli pei Lerop*, e Linyon Eropyin, sirtu Lalmayn ek Lafrans ki tro “deklar mari” dapre USA, par fer zot depandan lor USA (pu zarm ek lenerzi, de prodwi pu ki USA pe rod kliyan aktyelman.) E USA viz pli divan:

4. *Sey izol konpetiter USA Lasinn*, par rwinn Larisi, enn kote, e donn lexamp ki arive si enn pei pa sumet, lot kote.

Pu fer tusala, li pe sakrifye lepep Ikrenn. Sa, li pa enn pozisyon defandab.

Alor, pandan 8-an avan invazyon Larisi, Leta Zini e so CIA finn antrenn pa zis Larne Ikrenn, e so bann solda pu fer “loperasyon spesyal”, me zot finn osi antrenn batayon notwar fasist dan Ikrenn, ki asterla finn integre dan larne regilye Ikrenn. Zot finn furni enn lager sivil dan Les Ikrenn kot 14,000 dimunn finn mor. Leta Ikrenn finn sennwich ant CIA ek lextrem drwat fasist, ki USA finn anfet “nuri” depi lepok zis apre lamor Hitler kan USA pe rod “kontenir” so alye-ki-pe-vinn-lennmi a-lepok, setadir Linyon Sovyetik, e lepep Ikrenn pe bizin depann lor CIA ek grup fasist pu defann zot. E dez-an avan invazyon Larisi, Prezidan Zelensky, ki ti enn akter komik

profesyonel, ant-ot pu so rol dan enn long seri TV apel “*Serviter Lepep*”, e apre ki li ti fini koni kuma Prezidan Ikrenn lor lekran, finn poz kandida dan enn nuvo parti li met dibut apel, u pa pu krwar, “*Serviter Lepep*”. Li finn finanse par bann oligark Ikrenn, inkir par enn ki ti ena koneksyon mafya notwar ki finn osi finans bann batayon fasist, enn nome Kolomoisky.

CIA ti pe fer tu sa antrenman la dan kad ki Ikrenn pu zwenn OTAN. Kimanyer sa finn viim posib? Apre ki CIA, Anbasader USA alepok, Joe Biden (ansarz okip Ikrenn alepok li ti Vis-Prezidan), e Mme Nuland (asterla tuzur enn Su Sekrete Deta), ansam ar bann grup fasist kuma Right Sector ek Svoboda, finn organiz enn ku-deta kont Prezidan eli, a lepok, ki ti res 2-an so manda. Li ti’nn eli lor baz ki li pu re-met langaz Ris kuma enn langaz ofisyel, e li ti pe al ver aksepte vir ledo ar Lerop, negosye enn trete ar Larisi pu led pu tir Ikrenn dan kriz ekonomik.

Depi sa ku-deta la, malgre warning sever depi tu kalite gran gran exper Amerikin (depi Henry Kissinger ziska seki sef CIA zordi, Burns), Biden finn provok Larisi par anonse pu pran Ikrenn dan OTAN. Tu sa exper la finn dir “Napa fer sa, Mr. Biden, Larisi pu invayir.” Guvernman Lalmayn ek Lafrans pa ti tro-tro dakor, nonpli.

Me, Biden persiste. Etan done, Leta Zini fini organiz enn “revolisyon kuler” ek so ku-deta. Lerop fini kumans admet Ikrenn. E le 1 Septam, Joe Biden anonse, malgre retisans Lalmayn ek Lafrans, ki Ikrenn pu rant dan OTAN antan ki enn partner avek “enhanced opportunity”.

La, ki Putin finn kumans prepare pu donn enn dernye Warning Klas IV. Li mobiliz so latrup, li plede tuzur.

Me, Biden finn persiste.

Li orib. Ala get fondman immoral pozisyon Biden:

1. Li byin kone, si anonse pu pran Ikrenn dan NATO, Putin pu atake.

2. Li byin kone, e li-mem li finn dir li, Lamerik napa pu avoy solda “boots on the ground” – pa pu riske lavi Amerikin, pu riske zis lavi Ikrenyin – e anplis, USA pa pu furni zarm lur (e.g. pu desann avyon Larisi lor Ikrenn) ki riske zistifye Larisi servi zarm nikleer, akoz lexistans so pei menase (so “laliyn ruz” piblik), alor lager nikleer, sa osi, Biden pare pu riske.

3. Li byin kone ki larne Ikrenn pa kapav ranport enn viktwar tusel kont larne Larisi.

4. Li byin kontan li pe vann armaman Amerikin ar Ikrenn e ar tu pei Lerop dan OTAN, etan done lindistri USA li dan difikilte apre lafin brit lager kont Afghanistan 6 mwa apenn avan, kot kontra ek tennder finn sek enn ku.

5. Li byin kone li kapav fye lor stasyon TV kuma CNN e lor lapres meynstrim Amerikin pu vinn so “lebra propagann”, pu glorifye nasyonalism extrem dan Ikrenn pu sey fer fas enn tel lenmni deger kuma larne Larisi.


6. Li byin kone fason protez lintere Ikrenn ek so lindepandans se pu Ikrenn donn parol kumkwa li pu res “neut” vizavi OTAN, “neut” vizavi integrasyon dan Larisi ubiyin Lerop.

7. Li byin kone ki li pe ankuraz Ikrenn rant dan enn pyez istorik, kot li pu sibir sufrans ek larwinn.

8. E li finn fer li, kanmem.

9. Asterla, li ena pu kontiyne servi tu sa zenom ant 18 ek 60 an ki pa gayn drwa kit Ikrenn, e tu sa bann vye dimunn ek dimunn andikape ki pa kapav kit Ikrenn, kuma “manze kanon” pu kanon Larne Larisi.

10. E li ena pu prolonz sa lager la osi lontan ki posib, alor kontiyne sakrifye lepep Ikrenn pu so 4 bi la o. ■



IKRENN: Fasism gayn terin avek sutyin U.S.A.

Dan lager, akote larne regilye Ikrenyin, e mem andan dan so larne regilye, ena plizyer grup organize ki pe opoz invazyon Larisi, me lor enn baz kareman *nasyonalist e fasist*. Ena parti politik, ena grup arme parmi. Sertin ladan finn gayn sutyin militer ek finansye depi Leta Zini ek Kanada depi plizyer lane. An 2013, zis avan “Revolisyon Oranz”, pandan tantativ lextrem drwat fasist pu pran puvwar, Senater McCain, ansyin kandida Republikin eleksyon prezidansyel dan USA, ti ena rankont avek Tyanhbok, lider Parti Sosyal Nasyonal Ikrenn (Svoboda), parti fasis ki inspir li depi Nazism. Sis mwa plitar, McCain ek 2 lezot Senater Republikin Tom Cotton ek John Barasso al vizit kan lantrennman enn milis fasist apel “Dnipro-1” dan Ikrenn e ti rann zot omaz piblikman. Alor neonazism finn gayn sutyin Leta USA depi McCain ziska Biden.

Ena lezot grup arme neo-Nazi dan Ikrenn. Ena “C14” koni parski zot ti fer pogrom inkli asasina kont dimunn Roma (Zitan) dan Ikrenn. “Batayon Azov” finn vinn koni mondyalman aster e tu medya meynstriym ti rekonet ki zot ena for tandans fasist, mem si asterla zot propaz video siyne “Azov Battalion”. Dapre rapor Amnesty Internasyonal, li enn batayon ki pratik tortir, vyol, asasina. Batayon Azov ek lezot grup similer finn integre dan larne ek dan lapolis regilye Ikrenn. Sa depandans Ikrenn lor batayon fasist ti kumans arive depi 2014 kan guvernman Ikrenn ti realize ki so arme tro feb. Lerla enn seksyon kapitalis dominan, koni kuma “oligarsi”, ti kumans finans larne piblik ek milis prive kuma Batayon Azov.

Ziska larne Ikrenn antye finn vinn su ezemoni nasyonalist, e ase suvan neo-fasist: zot slogan se, “Glwar a Ikrenn” – enn slogan asosye avek sovinism nasyonalist laba.

Manb Azov mars-marse avek sinbol Nazi kuma SS, Swastika, latrap lulu, lor zot iniform. Zot lider dir “Nu misyon istorik se pu diriz Ras Blan lemond dan Krwazad final pu sirvi”. Batayon Azov pa zis gayn sutyin Leta Ikrenn, zot gayn sutyin e treyning USA ek Kanada. Zot gayn sutyin depi dyaspora Ikrenn dan USA ek dan lezot pei inperialist. Ena medya ase fiyab meynstrim ki finn rapporte Batayon Azov ena enn inite klandestin ki rekrit neo-Nazi partu dan lemond pu vinn lager dan Ikrenn. E zot antrenn neo-Nazi kote militer pu ki ena selil similer dan lezot prop pei. Zot byin resanble seki USA ti provoke atraver so invazyon kan Mujahidin, Al-Qaeda ek ISIS, enn apre lot, finn rekrute depi partu dan lemond dan bann batayon fasizant, parey. Setadir zot riske vinn enn sant antrennman militer mondal terorist, e sann kut la, anplas integris, plito pir fasist. Me US ek lezot pei inperialist pa pu apel Batayon Azov enn organizasyon “terorist”. Zot swazir pu truv li kuma enn larne “liberasyon” depi Larisi.

LALIT, nu kont Larisi so invazyon Ikrenn. Nu opoz sa lager la. Me, nu sertennman pa sutenir enn Leta Ikrenn dan lekel neo-nazism pe gayn terin. E nu sertennman pa sutenir OTAN ki pe alimant sa lager la, e kot lepep Ikrenn pe sufer otan.

Kuma inn ariv ziska la istorikman?

Muvman fasist dan Ikrenn, sirtu dan kote Lwes Ikrenn, ti kumanse dan bann lane 1930 lepok lamonte Hitler, e ti ranforsi an 1941 kan, dan Lager Lalmayn Nazi kont Linyon Sovyetik, larne Nazi ti reysi repus larne Sovyetik e demar lokipasyon Ikrenn. Avek sutyin aktif muvman fasist Ikrenyin, sirtu paramiliter Ikranyin OUN (Organizasyon Nasyonalist

Ikrenn) ek UPA (Larme Insirzan Ikrenn), larme Nazi finn masakre 1.5 milyon dimunn. Parmi ti ena dimunn vize dan kominote Zwif, kominis, Zitan, rezistan anti-fasist. Dan Babyn Yar dan Kyiv, zot ti fiziy pre 34,000 dimunn dan lespas 2 zur. Kan lager finn fini an 1945, Linyon Sovyetik su Stalin finn prefer met blam pu atrosite pandan lokipasyon lor rezim Nazi dan Lalmayn avek lespwar ki zot pu gayn konpansasyon pu domaz. Alor perpetrator atrosite su reyn fasist finn reysi evit kondanasyon publik. Sirtu ki, apre lager termine, CIA finn sutenir muvman fasist Ikrenn akoz li ti truv li anti-kominist, e Lager Frwad ti pe pran nesans. Par exanp, Batayon Nachtigal, ki ti form parti OUN, e ki ti dirize par enn notwar apel Bandera, pu zot kapav kontiyn atak militer kont Linyon Sovyetik, ti benefisyen enn lobi Ikrenyen extrem drwat inpe meynstrim e osi avek plizyer ex-Nazi byin etabli dan USA, e ki ti ena sutyin differan ladministrasyon Repiblikin.

Apre disolisyon Linyon Sovyetik dan bann lane 1990, muvman fasist, avek sutyin Leta Zini ek lezot pei impérialis, tuzur gayn terin lib pu propaze, parski sa kuran fasist finn res la-mem, inpi pu krim-deger ek zenosid. Sa kuran finn e pe kontinye existe lor letan.

An 2010, rezim Ikrenn vinn plank plizyer gran-gran stati sa bann kolaborater fasist Ikrenyen kuma Bandera dan plas publik. Mem dan landrwa kuma Babi Yar kot finn ena asasina-de-mas avek konplisite organizasyon fasist kuma OUN ek UPA, finn eriz stati Bandera. An 2015, Leta Zini finn kontiyn sutyin finansye ek led militer pu lorganizasyon kuma Batayon Azov. Pentagon ti mem fer sanz enn lalwa pu retir enn kloz ki ti pu anpes sa kalite sutyin la.

Ena enn intervyu avek Russ Bellant oter liv *Seven Decades of Nazi Collaboration: America's Dirty Little Ukraine Secret* ki exposz sutyin USA a muvman

fasist Ikrenn, ki kapav lir lor internet. Intervyu ti fer par Paul H. Rosenberg ki ti pe ekrir pu Al

Jazeera e ki enn redakter an-sef Random Lengths News. ■
RL

Oportunism Oligark Ikrenn

Ena buku koze lor "oligark Larisi" dan lapres internasyonal. Sirtu avek sanksyon USA, UK ek Lerop kont oligark Larisi ki zot konsider pros ar Prezidan Putin. Atraver sanksyon infoze lor Larisi, Loksidan pe friz zot assets, zot kas dan labank, e pe fer lanket lor zot. Ena byin mwins koze lor "oligark Ikrenn", sirtu bann ki pe sutenir Zelensky, ek sutenir Leta Zini ek so bann alye dan OTAN. Purtan "oligark" Larisi, li finn forme dan mem fason ki dan Ikrenn. Savedir, apre disolisyon Linyon Sovyetik kan li kumans kas but-but, dimunn andan dan laparey deta ek pros ar puwar finn met dibut konpayni kapitalis byin boner dan prosesis privatizasyon masif lekonomi, e ti gayn faver imans depi Leta. Pa ti ena sistem kapitalis ant 1917 ek 1990. Alor, klas kapitalis finn forme byin vit apre 1990 avek sutyin leta, kumadir enn imans "burzwazi deta". Kapitalis ki finn ariv posed lindistri ki ti monopol leta avan finn vinn byin pwisan. Zot mem ki apel "oligark".

An 2016, propriete posede par 10 oligark pli ris dan Ikrenn, zot tusel, ti ekivo a 16% GDP Ikrenn. Zot ena buku kontrol gro lindistri lur metalirzi, lindistri petrolye, nitrat ek amonyak, sekter lenerzi, konstriksyon navir, lindistri loto. E plizyer ant zot kontrol konpayni medya. Parey Trump, ki enn gran biznesmenn, ena ansysin Prezidan Ikrenn ki koni kuma oligark kuma Poroshenko. Ena buku depite dan Parlman ki depi 1990 koni akoz zot zom tel ubuin tel oligark.

Prezidan aktyel Ikrenn Zelensky ti vinn opuvwar atraver so popilarite dan enn fim apel "Serviter Lepep" ki exposz sa lyin pros ant rezim ek oligark (gran kapitalist), manyer ki kapitalis finn akapar assets ek fon publik. Me, li enn la-ironi ki Zelensky, limem, so nuvo parti politik ti ena baking enn oligark apel Kolomoiski ki enn gran bayer-de-fon milis fasist dan Ikrenn. Kolomoiski ti expoze kan dimunn aprann ki li ti pe rod denasyonaliz enn labank ki ti pu li avan, e finn nasyonalize apre ki al dekuver ki li ek so konpayni ti pe devaliz labank la.

Kan Prezidan Zelensky eli, lerla al dekuver ki pa zis li ena sutyin Kolomoiski, me li ti parmi gran aksyoner bwat prodiksyon televizyon ki ti prodir sa seri fim la, e li finn nom plizyer so bann direkter dan laparey Leta. Inpe semenn avan li eli, enn so koleg dan so konpayni finn "aste" so aksyon, me apre eleksyon, zot finn maniganse pu asire ki li kontiyn gayn so par dividenn tudmem! Li ti prezant li mem kom enn gran "Serviter Lepep" ki pu balye frod ek koripsyon. Me, dan Pandora Papers, deor lane dernyer apre so eleksyon, li finn expoze kuma enn dimunn ki ena kont ofshor ek imobilye, li-mem. Sa finn fer so popilarite zis avan lager deklare tonbe anba 30%.

Ena enn seksyon oligark Ikrenn ki ti ena lyin komersyal plis pros avek Larisi. Seki pli koni se Novinsky, kapitalis byin pwisan dan sekter metalirzi. Li ti parmi bann ki ti propoz ki uver negosyasyon avek Larisi pu aret lager an Fevriye. Me lofansiv USA ek so alye dan OTAN telman for ki oligark, mem seki ti pros avek Larisi kuma Novinsky pe zordi proklam zot sutyin a USA ek so OTAN pu evit asarnman kont zot, e permet zot sirvi antan ki kapitalis.

Zis klas travayer Ikrenn e klas travayer lemond antye ki ena lintere ek lafors potansyel pu aret lager. Dan Ikrenn, sistem kapitalis finn devaliz dibyin publik depi 1990, e finn kree kondisyon intern pu lager aktyel. ■
RL

“Oligark”

Kan Larisi inn anvayir Ikrenn, medya pro-burzwa dan Lwes inn abriti enn kut, inn komans koz enn koze lor lakel zot pa abitye tro-tro reflesi – zot inn komans koz lor bann “Oligark”. “Oligark Larisi” isi, “Oligark Larisi” laba.

E kan zot inn fer sa, san fer par expre, zot inn atir latansyon lor dimansyon deklas dan sa konfli global la, konfli pli larz ki lintere sa 2 pei, Larisi ek Ikrenn. Tu sa oligark Amerikin ki prodir zarm pu tu pei OTAN, finn mank kontra apre lager kont Afganistann arete brit 6 mwa desela. E sa lager la reponn zot bezwin pu kontra. Me, li danzere akoz sa 2 faksyon (OTAN ek Larisi) posed e kontrol plis ki 90% zarm nikleer.

Mi-Avril, tu lapres Oksidental pe koze lor lefet ki Lalmayn inn sezi enn yach vo \$900 milyon enn oligark Larisi apel Alisher Usmanov. Sa egal a Rs39 milyar ubyin plis ki enn-tyer GDP Moris! Zis so bato! (Lalmayn sezi li, me pa dir ki li pu fer ar li.)

Dan Larisi, “oligark” enn term ki zot-mem zot servi pu gran patron, sirtu kan zot pe dekrir patron ki ena linflyans lor lapolitik. Alor, u tann koze “Prezidan Putin ek so bann kamarad Oligark”. Ena enn 150 par la “oligark” milyarder dan Larisi. Deswit kan lager large, USA ek Lerop inn met sanksyon pa zis lor Putin ek so Minis ek depite, me osi lor enn seri “Oligark”.

Anu get listwar resan. Apre ki Linyon Sovyetik inn kase an 1991, kan pe de-nasyonalize lepok neo-liberal dan Lwes, ti ena enn lekurs ant sertin o-fonksyoner koronpi dan Larisi pu ramas otan propriete prive (amizir li privatize) ki posib. Zot ti byin plase, byin informe, byin konekte ar Prezidan alepok Yeltsin lerla Putin, e zot ti sezi lokazyon vinn kapitalist enn sel ku. Seki zot finn fer se akerir enn lantrepriz nasyonalize pu enn som modik ar larzan prete, lerla re-vann li pu enn fortinn. Preske tu ladan ti gayn sa kapital insyal,

sa lonn la, depi bankye dan Lwes. E, atraver seki zot inn gayne dan sa kao otur lefondreman Linyon Sovyetik e sa liberalizasyon debride dan enn klima piyaz, zot inn resi plas zot dan pozisyon pu akimil buku kapital enn sel kut. Literalman, zot leve milyarder enn gramatin. Alor tu sa milyarder la ki apel “oligark Larisi”. Me, anfet zot zis bann manb dan enn form debride enn “burzwazi deta” ki ti gayn *windfall-gains* akoz privatizasyon enn imans lekonomi ki ti nasyonalize, setadir lekonomi Sovyetik, dan lekel zot ti byin-plase pu sezi lokazyon.

E, rapel, Ikrenn ek Larisi pa zis vwazin. Zot tulde ti ansam dan Linyon Sovyetik, enn sel leta – pli avan, ti mem ena enn lepok kan Kyiv ti kapital Larisi – alor zot ti partaz enn mem burzwazi istorik nesan dan lepok reyn feodal Tzar. E sa-mem zafer privatizasyon debride inn arive dan Ikrenn mem lepok ki li arive dan Larisi. Anfet, Ikrenn ti koni kuma pei avek plis koripsyon dan lemond, e kot li ena buku gran oligark mafia, parey kuma dan Larisi.

Dan Lerop ek Leta Zini, Ikrenn ti ena enn repitasyon sirtu pu kantite koripsyon ki gangrenn so bann instans publik. Ni Lerop ni OTAN ti kapav konsider pran Ikrenn kuma potansyel manb. Joe Biden so garson apel Hunter Biden finn devwal kimanyer li finn fer enn ta kas Ikrenn dan enn konpayni apel Burisma, zis akoz li piti so papa. Prezidan Trump ti anfet impich akoz li ti pe servi menas gard larzan led a Ikrenn kuma santaz pu gayn prev lor koripsyon garson Joe Biden. Kumsa ki tu dimunn ti konn Ikrenn. Alor, koripsyon Ikrenn ti notwar, mem si asterla medya oksidental kasyet sa.

E an Oktob 2021, “Pandora Papers” finn devwal lefet ki Prezidan Ikrenn Zelensky, ki ti eli lor baz so program kont oligark Ikrenn ki kasyet zot dibyin dan labank ofshor, ti ena larzan dan Ofshor, li-mem. Li

ti osi finanse par enn biznesmenn ki paret ti lom-de-pay pu oligark Ikrenn notwar, Kolomoysky, ki ti anfet su sanksyon USA.

Tusala pu dir ki skandal laba, dan Ikrenn, otur “oligark” li parey kuma dan Larisi. Zis avan lager, malgre ki Zelensky ti eli an 2019 par enn gran pursantaz vot, so popilarite ti bese ziska 30% akoz tu sa skandal otur so investisman dan ofshor ek “real-esteyt” dan Lond.

Nu kapav dir ki sa nuvo burzwazi deta post-sovyetik dan tulede peyi inn kraz travayer ansam, e ziska linvazyon an 2022, sertin Oligark de-kote ti ankor tuzur pe mem suvan azir ansam ekonomikman (apar konfli ant faksyon).

Term “oligark” dan Moris

Dan Moris, sa term “oligark” la li pa nuvo ditu. Dan premye eleksyon zeneral ki ti ena Moris, an 1886 (enn eleksyon avek sifraz byin restrin), ti anfet ena enn parti politik ki ti apel *Les Oligarques* ki ti reprezent lintere proprieter tablisman. E zot ti pe servi sa term la avek fyerte e li ankor servi parfwa zordi pu fer referans a proprieter tablisman. Suvan dimunn tuzur refer a “oligarsi sikriyer”. Kont zot, ti ena bann “*Démocrates*”, ki ti sirtu klas bann kad, profesyonel, byin ti-proprieter later.

Zordi seki drol, se dan Leta Zini ek Lwes an zeneral, kan zot koz *oligark* zot pe koz milyarder Larisi sirtu, e parfwa pli rarman Ikrenn. Me, kapitalist milyarder dan, dizon, Leta Zini, ki zot apel li? Enn antreprenier? Enn anplwayer? Seki drol, se pli gran labank ofshor, zot pa truv dan pei kuma Panama, Ship, Lil Virz, Moris, me zot truv dan Leta Zini Lamerik li-mem. E pli buku ofshor laba, zot truv dan Leta kot Biden eli, Delaware. Me, zot pa koz *Oligark*.

Kapav USA pu sezi tu sa larzan “oligark” Larisi ki zot finn friz pu li? Kuma USA finn fer ar “fon suvrin” Afganistann, ki li finn kareman kokin. Pa zis travay “oligark” sa, me plito travay enn bann pirat mem. ■

GH

Doktrinn Monroe

Kan Larisi finn averti lemond antye ki li santi li “menase” par expansyon san-ses depi lane 2000 sa lalyans pirman militer apel OTAN, sirtu kan OTAN pe anserkle Larisi, koste pli pre, pli pre, ar so frontyer, li vo lapenn omwin ekut seki Larisi pe dir.

Get map lor kuvertir par deryer nu Revi, kot dir “Pei Manb Lotan”. Li montre sa anserkleman la. Li enn anserkleman *militier*. Abe kont kisannla? Kont Larisi. Bizin omwin ekut seki Prezidan Putin ek so Minis Zafer Etranzer dir. Me, Leta Zini pa ule tann parle.

Leta Zini prefer sakrifye lepep Ikrenn. Li prefer “infliz duler” (pu sit Prezidan Biden, “*inflict pain*” kuma enn sadik) lor Larisi, furni zarm “mortel” (sitasyon depi Biden, “*lethal weapons*”).

E kan Leta Zini pa ekut Larisi, nu tann tu dimunn ki ena enn fib moral dan zot lekor, partu dan lemond, lev lavwa avek rezon, e dir, “Abe, ki Leta Zini dir, li, asterla lor so *Doktrinn Monroe*?”

Doktrinn Monroe vedir Leta Zini finn eriz pu limem, “ledrwa” – moral sipa imoral – evins tu siyn enn posib prezans enn lot pwisans depi dan *totalite kontinan Amerikin*. Sa vedir, okenn lot pwisans mondyal pa gayn drwa tus Lamerik Dinor, Lamerik Disid, Lamerik Santral, e tu so pei dan Karaib, osi. Leta Zini napa


toler okenn prezans militer, ubuin mem nerport ki posib, fitir prezans militer. Si li dut lemwin prezans, li invayir, vir Guvernman dan enn ku-deta sanglan. Swa kuma kan Leta Zini ti fer enn invazyon rate dan Kiba an 1961, e Kiba fer apel a Linyon Sovyetik pu ed li militerman, lerla Leta Zini menas lager nikleer. Kifer? Akoz li santi li menase. Akoz pe tro koste ar so frontyer. Mem kan li, li ti invayir Kiba dan *Bay of Pigs*, enn invazyon ki ti sufer defet.

Anfet, Leta Zini finn organiz, ubuin sey organiz, ku-deta dan Shile, Larzantinn, Bolivi, Kiba, Kosta Rika, Nicaragua, Paraguay, Panama, Guatemala, Republik Dominikin, e Haiti. An tu, 41 fwa, Leta Zini finn intervenir *militerman* pu inpoz enn lot kalite rezim lor lepep Lamerik Latinn. Alor, Leta Zini bizin santi so “sekirite” asire, li.

Ena enn pwin santral dan tu sistem moralite: tu konsiyen etik lor konportman individu ubuin pei aplik parey pu tu dimunn dan sirkonstans similer. Sa-mem baz tu panse eklere dan lemond. Napena de pwa e de mezir dan moralite politik.

Alor, Leta Zini, li ena enn moralite pu li – inkriste dan so Doktrinn Monroe – e enn lot ki li aplike kont lezot pwisans.

Ena zis 2 pei dan lemond ki posed 90% zarm nikleer, Leta Zini



Arthur Young, The Brains

ek Larisi. Enn ladan, an-okirans Larisi, pe dir depi lane 2000, e li dir li pli for depi lane 2014, ki li santi li menase par expansyon Leta Zini ek so OTAN otur so pei. Larisi ti fini met so laliy ruz: OTAN fode napa vinn dan Ikrenn, instal so misil, lor “mo frontyer”, Larisi inn averti. Pu USA, ondire sa ekivalans moral ki li, USA, dir, “Larisi, napa vinn met misil lor mo frontyer ar Lamexik!” Pa zis dan Larzantinn ubuin Shili, Iwin depi Leta Zini, me lor so frontyer.

Leta Zini, ki li fer kan Larisi donn sa warning la? Li al delavan, li fer sa-mem. Le 1 Septam 2021, USA ek Guvernman Ikrenn tir enn kominike ofisyel kot zot anonse ki Ikrenn pe zwenn OTAN e USA pe deza antrenn so militer.

Doktrinn Monroe aplike zis pu Leta Zini. Ala mank vizyon sa siperpwisans Leta Zini. Ala mank moralite filozofik sa pei inperyalist Leta Zini. Ala mank etik de-baz imin par lidschip Leta Zini. Li grav. So propagann, kimanyer li marse? Li difisil mazine.

Me, klerman dan Tyer Mond li pa marse. Dimunn konn reflesi. Telman li pa marse ki Leta Zini pa futi gayn enn mazorite pei vot ar li dan Lasamble Zeneral Nasyon Zini pu sispann Larisi depi Konsey Drwa Imin UN. Larisi merit sispansyon, me ipokrizi Leta Zini li tro evidan. Li froli rizib pu zis vot

Biden ek Oligark Ikrenn

An Oktob 2021, *New York Post* ti publie e-mel ki devwal kimanyer, kan Joe Biden ti Vis-Prezidan USA, li ti met presyon pu Ikrenn lisansye enn Prosekiter ki ti pe fer lanket lor konpayni Burisma, kot so garson, Hunter Biden, ti enn manb Bord. Dapre *New York Post*, Vis-Prezidan ti menas pu pa donn “garanti lonn” US pu enn milyar dolar si pa defalke sa prosekiter la. An 2014-15, Hunter Biden, dapre enn e-mel, ti prezant top sef konpayni Burisma a so papa. Ena e-mel kot sef Burisma dimann Hunter Biden servi so “linfliyans” pu intervenir dan faver konpayni Burisma. Zlochevsky, propriyeter konpayni Burisma, ti Minis dan kabine Azarov an 2014, lepok Yanukovych ti Prezidan. Tusa pu dir ki Biden ek so garson pa gayn okenn traka pu travay avek “oligark koronpi” – anfet kapitalis pa ezite pu servi koripsyon kan li dan so lintere. Li zis kan li pa dan so lintere ki US amenn bel krwazad kont frot ek koripsyon. ■

enn tel rezolisyon kumsi-ryin-ete. E li explik kifer tu dimunn partu kote dan Tyer Mond, kriye “ipokrit!”, e preske riye, si li pa ti osi trazik pu lepep Ikrenn, pu truv sa kalite ipokrizi Leta Zini (ek so OTAN) la.

Ala enn apersi lor listwar Doktrinn Monroe.

Si u pe zwe kart ek u anvi zve kokin pu gayne tultan, li pratik si u ena enn kart ki kapav pran ninport ki valer. Lerla, depandan sityasyon, u servi li kuma enn lerwa-ker, enn 10-tref ubiyin enn 2-karo. Leta USA ena enn espes kart mazik ki li servi dan politik etranzer ki apel Doktrinn Monroe. Se enn seri prinsip, prononse an 1823 (200 banane desela) ki permet li anpes lezot Leta komet inzerans okenn par dan kontinan Amerikin me anmemtan donn li possibilite pu li, li komet inzerans.

Doktrinn Monroe apel kumsa parski se Prezidan Leta Zini, James Monroe, ki finn met dibut sa politik Zafer Etranzer dan so diskur divan Kongre an Desam 1823. Sa lepop la, laplipar pei Latino-Ameriken ti pe finalman ranport zot lindepandans depi pei Lerop. Doktrinn Monroe deklar (san konsilte kikseswa byensir) ki Eropyin nepli pu ena linfliyans ekonomik, ideolozik ek politik lor Lamerik an antye, Sid, Nor, Sant plis Karaib.

USA finn servi sa Doktrinn kuma so kart mazik: li servi kart la kan sa aranz li e parfwa li inyor so lexistans. Avan 1870, USA ti kuma enn pwisans ki zis kapav zape san mordé. Par exanp, letan UK intervenir dan Beliz ek dan Falklands, USA pa reazir. Se parski, dan enn premye tan, avan li devlop so armada militer, li ti depann buku lor laflot Britanik pu kontrol Losean Atlantik.

An 1870 Doktrinn Monroe komans servi kuma enn kart ki permet inzerans. Pu met enn term a kolonizasyon Lespayn dan Sin Domeng, Leta Zini tant enn invazyon ki pa marse. An 1895, par vwa diplomatik, USA intervenir dan dispit ant UK ek Venezuela lor enn teritwar ki apel Guyana Esequiba. An 1898, USA servi so lafors arme pu konbat Lespayn dan lager Lindepandans Kiba. Li defann lezot Leta Lamerik Latin kont pwisans Eroopeen.

An 1904 Prezidan Roosevelt azut enn but (Koroler) dan Doktrinn Monroe: asterla, USA kapav intervenir dan ninport ki pei Lamerik si li konsidere li pe mal azir. Ala kuma Leta Zini sanz so interpretasyon doktrinn pu azir kuma gran-frer ki ena drwa koriz bann pli tipti lor so kontinan. Li akord limem enn “devwar moral” pu inzer dan enn lot pei.


Intervansyon pu asir viktar bann Alye dan 2em Ger Mondyal pu donn USA lokazyon zwe enn pli gran rol ankor. Asterla li finn deklar li “Sover Lemond antye”. Pandan Lager Frwad, ankor enn fwa, Leta Zini fer apel a Doktrinn Monroe kuma kart joker. Olye konsider ranversman puvvar dan Nicaragua, Kiba ubiyin Shile, kuma rezulta enn organizasyon volonter klas travayer deryer enn program revolisyoner, Leta Zini truv bann evennman kuma “intervansyon Larisi” lor “so” kontinan pu li. Lor nom Doktrinn Monroe, Leta Zini finans milis ek rezim pu kontre swadizan “menas komunist”. Dan plizir pei Sid Amerik, zot fini truv kler: kan Leta Zini Lamerik koz “prezervasyon lintere Amerikin”, li pe konfond so prop lintere antan ki Leta Zini Amerikin, avek lintere totalite pei Latino-Amerikin.

Pli resaman, Prezidan Trump finn resistit sa mem doktrinn la, pu kombat Lasinn so linfliyans ekonomik lor kontinan Amerikin. So Sekrete Deta Mike Pompeo ti mem menas intervansyon dan Venezuela kot zot konsidere ki ena minmiz Larisi ek Liran.

Lor 200 banane, li enn doktrinn ki byen aranzan pu Leta Zini. Li fer kumadir so 700 baz militer lor teritwar etranze pa existe, pa zenn personn, me byen vit, li fite pu al intervenir letan li konsider ki li zene par enn lot larme ki li truv enn danze pu li. Tank so sfer linfliyans inpoze lor lemond antye (ki li par fim Hollywood uswa teknolozi informatik Silicon Valley) li reysi traverse. Me, zordi kan ena lezot pwisans, kuma Larisi ubiyin Lasinn, mem Lind ubiyin Brezil, sa ipokrizi la, li nepli tolerab.

Me Leta Zini tuzur pretann ki li kapav interpret ninport ki evennman kuma enn menas pu “Lamerik” gras-a so kart mazik Doktrinn Monroe. Lerla sa donn enn vwal de lezitimite pu USA intervenir ilegal, kan e kot li anvi. Si, Lakur Internasyonal ICJ truv Leta Zini kupab, kuma dan ka Nicaragua, li avoy promne. ■

JY



A. Abraham Walkowitz, Kont lager ek fasism

EXPANSYON OTAN

Le 4 Avril 1949, Minis Zafer Etranzer 12 pei ti siyn enn Trete militär apel “*North Atlantic Treaty*” (alepok alyas “*Trete Washington*”) dan Washington, D.C.

Bi sa trete la sete pu anpes Linyon Sovyetik expans. Rapel ki Linyon Sovyetik ti alye ar UK ek USA dan Lager kont Lalmayn-Litali-Zapon setadir kont lalyans fasist. Linyon Sovyetik (USSR), malgre tu seki Hollywood montre, ti anfet veritab vinker sa lager kont fasism la. USSR ti ena enn rol eroik ladan. Li ti perdi 25 milyon lavi dan sa lager la, e anfet Lasinn finn perdi 18 milyon lavi dan sa lager la. Par kont, USA ti perdi 400,000 ek UK 380,000. Zis pu rapel nu-mem laverite pert lavi-imenn pandan Dezyem Ger Mondyal (WWII).

Alor, kan WWII fini, ena larme Lokipasyon Britanik, Amerikin ek Linyon Sovyetik, enn akote lot, dan enn Lerop an-rwinn. Lamerik finn met dibut enn dub stratezi. Seki apel “Plan Marshal”, so lipye ekonomik, an 1948. Sa ti enn program investisman Amerikin avek enn som \$15 milyar pu rebatir lekonomi Lerop devaste par lager. E sa kapital la ti bizin proteksyon militer. Alor, li ti vinn enn katalist kle dan formasyon NATO, sa lalyans pirman militer ant USA (ek Kanada) ek enn parti pei dan Lerop. Plan Marshal ek NATO ti modle pu anpes linflyans Sovyetik buz ankor plis a Lwes, me sirtu, osi importan, pu anpes ranplasman bann rezim kapitalist afebli par devlopman enn seri nuvo Leta kot kapitalism finn sufer defet. Rapel ki bann “Rezistan” dan Lafrans, Lalmayn, Litali, par exanp, ti ena lidership alabaz bann Parti Kominis e Parti Sosyalis – alor Plan Marshal ek NATO ti la pu domin Lerp Delwes.

Pu sit parol so premye Sekreter-Zeneral, Lord Ismay, depi websayt kartye zeneral OTAN: OTAN inn met dibut pu “gard Linyon Sovyetik *awt*, Amerikin *inn* ek

Alman *ater*” (*NATO was formed to “keep the Soviet Union out, the Americans in, and the Germans down.”*). Zordi avek rol OTAN dan konfli Larisi-Ikrenn, Lamerik pe kontinye so politik pu rod gard Larisi *andeor*, Lamerik *andan* ek Lerop, sirtu Lalmayn, *ater*, enn Lerop amare ekonomikman ek militerman avek Lamerik.

Alor, NATO, mem li militer, li osi “politik”, e so politik se pu protez investisman Amerikin. Zordi mem, Prezidan Biden ek so bann Sekreter Deta Blinken ek Nuland pe tuzur vant zot investisman \$5 milyar dan Ikrenn kuma zistikasyon zot prezans. Prezidan Biden so prop garson ena tu kalite biznes inpe lus dan Ikrenn depi lepok avan, kan so papa ti ansarz sa rezyon la. E remarke ki USA ule NATO dan Ikrenn pu azir kuma garan sa investisman la.

Ala bann manb fondater seki zordi koni par 2 nom an Kreol: OTAN ek NATO:

Belzik (1949)
Dannmark (1949)
Island (1949)
Kanada (1949)
Lafrans (1949)
Laoland (1949)
Litali (1949)
Lixenburg (1949)
Norvez (1949)
Portigal (1949)
UK (1949)
USA, Leta Zini (1949).

Dan prosenn 40 an, OTAN finn expansi inpe, setadir enn pei par deseni, an mwayenn:

Lagres (1952)
Latirki (1952)
Lalmayn Delwes (1955)
Lespayn (1982)
Lalmayn Inifye (1990)

Lerla li res fix pu pre 20 an. E, kan Lager Frwad fini an 1991, OTAN ti sipoze kareman disud.

Me, apartir 1999, pandan enn peryod 20 an, setadir 1999 a 2020, OTAN met so masinnri militer, so zom militer, dan 14 nuvo pei. Li kareman expansi. E kot li expansi?

Li expansi tutotur Larisi. Pwint tu misil lor Larisi. Kimanyer sa finn arrive?

1990-91 – Kan Linyon Sovyetik pe disbenn, pei NATO, USA par labus George H W Bush so Sekreter Deta James Baker, ti fer serman zot pa pu expansi “mem enn sel pus ver Lest”. Enn seri memo ki finn deklasifye, osi byin ki Minit bann reynion, pruv sa. Sa langazman formel la, li ti enn konpreansyon an-komin etabli. Tu dimunn ki ti swiv politik sa lepok la, rapel sa.

Sa langazman la ti implik 2 promes.

Premye langazman formel: NATO pa instale dan pei ki ti dan Pak Varsovi, ki Prezidan Larisi Gorbachev ti pe ofer pu disbenn e ki li finn disbenn, lor sa kondisyon la, setadir ki OTAN pa expansi. Ladan ti ena Linyon Sovyetik, Lalbani, Bilgari, Czechoslovakia, Lalmayn Deles, Laongri, Poloyen ek Rumani (Albania ti fini retir li an 1968).

Dezyem langazman formel ti ki NATO napa pu al instal li-mem dan Republik ki ti form parti Linyon Sovyetik li-mem, setadir leswivan: Larisi, Ikrenn, Lazarzi, Byelaris, Uzbekistann, Armeni, Azerbaijan, Kazakstann, Kirgistann, Moldovi, Turkmenistann, Tajikistann, Latvi, Lituanie ek Estoni.

Alala. Ki OTAN finn al fer? Li finn al instal li-mem, enn apre lot, dan pei swivan:

Republik Czech (1999) – enn but Czechoslovakia
Laongri (1999)
Poloyen (1999)
Bilgari (2004)
Estoni (2004)
Latvi (2004)
Lituanie (2004)
Rumani (2004)
Slovaki (2004)
Sloveni (2004)
Lalbani (2009)
Kroasi (2009)
Montenegro (2017)
Masedwann Dinor (2020)

E asterla, li pe rod gayn Lazorzi ek Ikrenn.

E, ena presyon lor Laswed ek Finnland pu zot zwenn NATO, sa pu ankor anserkle Larisi depi Lenor.

Kan le 1 Septam lane dernyer, dan enn “Lakor Konzwin” USA-Ikrenn, sa 2 pei la anonse an ekri kumkwa, “Nu [USA] ena lintansyon kontinye nu treyning avanse ar Ikrenn e nu exersis militer dan kad stati Ikrenn kuma enn ‘partner OTAN, avek lokazyon amelyore’”, lerla Prezidan Putin finn exprim so lakoler. E kan li pe fer so exersis militer anyel dan so prop pei an Zanvye 2022, li finn kumans menase: retir sa zafer kumkwa u pu met zarm OTAN dan Ikrenn, zis akote Larisi -- sinon!

Alor, Larisi inn finalman dir, “Ase!” Li finn met enn laliyn ruz.

E lager finn deklanse kumsa. Kisannla a-blame?

Dayer, li fini vinn publik ki CIA pe antrenn militer Ikrenyin (mem batayon fasist parmi) depi 2015 pu prepare pu sa lager la.

Eski Lamerik, ki li-mem dirizan NATO, ankor enn fwa pare pu sakrifye lepep Ikrenn pu li afebli Larisi, parey kuma kudeta formante par CIA an 1949 dan Ikrenn? Byin apre, CIA finn truv sa lavantir 1949 la “mal-futi, mem trazik” (“ill-fated and tragic”).

Sann fwa la, trazedi ki pe inflize lor lepep Ikrenn par gurmandiz Leta Zini, li pu lor enn lesel absoliman orib. E li degize par enn lavval propagann kumkwa zot pe “ed” lepep Ikrenn. Sa lavval la, apre tu sa lager finn termine, pu avanse, e dimunn pu sirman truv pli kler. Ankor enn fwa listwar pu ziz sa lavantir NATO kuma “mal-futi, mem trazik”.

Zize umem. ■

LC, AMJ ek BK

DAN KAD LAGER USA KONT LARISI DAN IKRENN

Lasinn ek Larisi

Avan ki lager dan Ikrenn kumanse

Leta Zini ti pe ale mem ar propagann kont Lasinn. Bann dirizan Amerikin ek zot medya ti pe mem anonse ki Lasinn pre pu invayir Taiwan, ki dayer Lasinn truv pu li. Zot ti mem fann koze ki Lasinn pre pu invayir Lostrali! Kifer Leta Zini azir kumsa? Klerman li pe trakase akoz Lasinn pe etann so linfiyans ekonomik partu dan lemond – Lazi, Lafrik, Lamerik Latinn e ziska viz konkerir pli gro par marse dan Lerop. Me, sirtu depi inpe letan, Lasinn pe konsolid lyin ar Larisi. Alor, Leta Zini trakase.

An 2001 Lasinn ti met dibut OCS (Organizasyon Korperasyon Shanghai) enn lalyans lor sekrite, korperasyon ekonomik, politik ek militer interguvernmantal. OCS so syez dan Shanghai e li regrup Lasinn, Larisi ek plizir pei Lazi. OCS osi koni kuma Pak Shanghai. Anfet lide enn tel lalyans finn emerze apre Dezyem Ger Mondyal, kan Lasinn ti pe devlop enn vizyon relasyon internasional differan ar lord mondal ki Loksidan ti inpoze otur OTAN. Alor Lasinn anmemtan ki li form parti Nasyon Zini, an-paralel ti pe kumans met dibut zerm enn lot lorganizasyon internasional pu asir so expansyon ekonomik.

Alepk so fondasyon OCS ti ena 8 ful manb: Lasinn, Larisi, Kazakstan, Kirgizistan, Tadjikistan, Uzbekistan, Lind, Pakistan. Ena kat manb obzervater: Mongoli, Liran, Afganistann, Bieloris. Anplis ena 6 pei ki zot adezyon an diskisyon: Sri Lanka, Latirki, Kanboj, Nepal, Armeni, Azerbayjan. So lobzektif prinsipal: asir stabilite rezyonal, konbat terrorism, separatism ek

extremism relizye.

OCS pa fonksyon kuma lezot lalyans militer. Dan so Sart, pena okenn mekanis sipra-nasyonal komin anka latak militer kont enn manb, kuma ena dan lartik 5 Sart OTAN (“Enn latak arme kont enn ubuin plis manb dan Lerop uswa Nord Lamerik pu konsidere kuma enn latak kont tu manb ...”). Lot diferans: lapros OCS vizavi adezyon nuvo manb. Depi 2008, Liran finn swete vinn manb OCS. Me ziska ler lasanble OCS finn refiz so adezyon akoz pankor truv enn rezolisyon konfli lor kestyondikleer ant US ek Liran.

Anterm zeografik OCS enn bann pli gran lorganizasyon rezyonal dan lemond: li reprezent 60% rezyon Lerop-Lazi, 40% populasyon mondal. Anterm ekonomik OCS reprezent 35% rezerv sarbon ek 60% iranyom dan lemond. OCS osi reprezent enn kar rezerv petrol mondal ek lalyans rezerv gaz.

OCS enn mayon importan dan Lasinn so proze expansion ekonomik “Larut Laswa”, ki viz pu ogmant e konsolid komers ant Lazi ek Lerop. An 2017 Larisi ek Lasinn finn kree enn fon investisman komin pu fasilit inplementasyon sa proze la. Me Leta Zini finn tultan konsider Lerop kuma form parti “so” zonn linfiyans e so prinsipal alye militer, ki ilistre par lexitans OTAN. Sa lalyans ant Lasinn ek Larisi, 2 pwisans ekonomik mondal, pe fer Lamerik panike. Eski sa li pa enn rezon ki finn fer Lamerik ek OTAN provok Larisi pu invahir Ikrenn? Enn lager ki pu afebli Larisi, enn alye importan pu Lasinn. Lasinn, ki finn depas Zapon kuma segon pwisans ekonomik e zordi pe chalennj lanpir USA, ki li, so kote, ekonomikman an-deklin, mem si li tuzur militerman for. ■

AA



Veritab Moter Lager dan Ikrenn

Nu tu byin preokipe avek lager dan Ikrenn kan nu pe temwayn kuma ankor milyon popilasyon sivil pe vinn refizye akoz lager ki bann pei prodikter zarm pe alimante partu dan lemond: Ikrenn; Yemenn, Lasiri; Lalibi; Palestinn; Taiwan, Afganistann, ... Pei prodikter zarm pa pran enn su traka lor tu sa seri defi divan nu, kriz alimanter, kriz enerzetik, kriz klimatik, kriz saniter ki pe menas sirvi limanite ek planet. Alor li importan, ammemtan fode pa nu perdi devi veritab profiter sa lager Larisi-Ikrenn, tu sa bann gro konpayni marsan zarm.

Lavant Zarm dan pandemi

An 2020, lane an-plin pandemi dan lemond, lobi par gro konpayni armaman dan lemond finn depans otur \$117 milyon zis pu fer lobiyng pu guvernman dan zot pei gard militarism lor azanda. Sa, pu ki zot asire zot kontinye gayn gro-gro kontra pu fabrik ek vann zarm e rekolte profi depi konfli militier. An 2020, ena 21 konpayni finn gayn kontra militier pu enn valer \$332 milyar (332,000,000,000 dolar) ek \$28 milyar (28,000,000,000 dolar) ladan ti al dan prodiksyon zarm nikleer.

Lamerik limem antet parmi 100 konpayni avek pli gro lavant zarm mondal: 41 konpayni Amerikin reprezent 54% (\$285 milyar); 5 konpayni Lasinn avek 13% (\$67 milyar); 26 konpayni Lerop ansam

avek 21% (\$109 milyar), swiv par 9 konpayni dan Larisi avek 5% (\$ 26.4 milyar).

(Surs: Stockholm International Peace Research Institute – SPIRI) ■

KONPLEX MILITER-INDISTRIYEL

Leta Zini Lamerik (USA) li paret enn reyn "demokratik" kot ena enn Haws Reprezantan ek enn Sena eli, plis enn Prezidan eli.

Me, depi Prezidan Eisenhower dan so diskur lafin so manda, finn averti lor danze ki puwar al tom dan lame dan enn "military industrial complex" kot marsan zarm ek politisyin kas fann.

Konpayni	Valer Kontra Zarm	Valer Zarm nikleer
Lockheed Martin (USA)	\$124.5 milyar	\$2.1 milyar
Boeing (USA)	\$50 milyar	\$105 milyon-
General Dynamics (USA)	\$39.4 milyar	\$10.8 milyar
Northrop Grumman (USA)	\$29.1 milyar	\$13.7 milyar
Raytheon Technologies (USA)	\$27.5 milyar	\$450 milyon
BAE Systems (UK)	\$10.8 milyar	\$72.5 milyon

Tab lao donn sink pli gro konpayni zarm dan lemond dapre valer kontra militier zot finn gayne an 2020, montre Lamerik larzman antet:

Sa sink gro konpayni armaman finn gayn kontra zarm pu enn valer total \$290 milyar ek ladan \$27 milyar pu zarm nikleer. BAE


Systems, li sel konpayni dan Lerop ki figir parmi.

Lager Pretex Mont Bidze

Sa konplex militaro-indistriyel pe servi invazyon Ikrenn par Larisi, pu larg enn veritab lekurs zarm.

Linyon Eropein inn anonsé li pu aste ek livre Ikrenn zarm valer €150 milyon. USA finn angaz li pu avoy Ikrenn \$350 milyon dan form led militier, sa vinn azut avek plis ki 90 tonn materyel militier valer \$650 milyon ki Lamerik finn fini livre a Ikrenn.

Lamerik ek NATO inn livre 17,000 armaman anti-tink ek 2,000 misil Stinger. Ena enn koalisyon 25 nasyon ki pe avoy zarm dan Ikrenn, sa inkli Lalmayn, Dannmark, Lafrans, UK, Tirkia, Lostrali ek Kanada. Azute lor sa, ena presyon depi USA pu fer Finnland ek Laswed zwenn dan OTAN e sa de pei finn anons zot pe ogmant zot bidze militier. Finnland ek Lalmayn finn sispann zot politik pu pa furni



zarm a pei ki dan enn zonn konfli militier.

Kuma konfli Ikrenn-Larisi kumanse, Prezidan USA Biden pa finn tarde pu anons 350 milyon dolar an-form led militier a Ikrenn. De-trwa semenn apre, Biden anons enn led pu sekirite Ikrenn de 800 milyon dolar.

Dapre *Stockholm International Peace Research Institute*, pu lane 2020, USA antet avek 39% ek Larisi an katriyem pozisyon avek 3.1% depans militier global. An 2020, USA so bidze militier ti reprezent enn bidze militier \$778 milyar ek Larisi so bidze militier ti \$63 milyar. Kongre Amerikin avek depite Republikin ek Demokrat inn vot bidze 2022, ena \$782 milyar alwe a depans militier lor enn bidze \$1.5 trilyon. Larisi, usi, pu bizin enn ogmantasyon imans dan so bidze militier pu finans so invazyon Ikrenn.

Savedir tu sa bann pei la kan zot pe ankor ogmant zot bidze militier ki deza imans, sa pu fer sa odetriman lezot depans piblik dan faver lamas dimunn.

Lobi marsan zarm dan USA responsab pu gard enn azanda militarist plito ki negosasyon. Kuma zot fer sa? Lindistri zarm dan Lamerik fer sa atraver: eli Demokrat ek Republikin ki posed aksyon dan konpayni zarm; eli ki syez lor bord bann konpayni zarm; distribiye travay dan lindistri armaman fann-fane partu lor teritwar Lamerik. Kumsa kan ena pu pran desizyon lor eski pu al ver negosasyon olye konfli militier, sa afekte profi marsan zarm, diminye dividenn aksyoner e menas lanplwa dan lindistri armaman, ki asontur met presyon lor bann eli akoz zot bann mandan riske perdi travay. Ala kuma marsan zarm opere e amar vot bann eli dan Lamerik pu pus anfaver enn azanda militarism.

Alor, gro ogmantasyon profi lindistri armaman ek konplex militaro-industriel depann lor pus pu enn azanda militarist pu ogmant depans militier.



Desin Escher

Trwa fason konfli Ikrenn-Larisi pu buste komers bann marsan zarm USA: livrezon zarm USA a Ikrenn; ogmantasyon bidze militier Lamerik ek ogmantasyon bidze militier dan Lerop.

Alor ena enn lalit politik konstan pu amene pu limit puvwar ek linflians lindistri armaman e pu fors bann guverman diminye drastikman zot bidze militier e pu plito investi dan prodiksyon manze, dan sistem lasante iniversel gratis, e dan lenerzi renuvlab pu permet planet sulfle e limanite siriv. Bizin rann li ilegal pu bann

eli ena aksyon dan lindistri zarm e asiz lor bord bann konpayni zarm. Bizin ena devlopman produktif pu protez lanplwa pu ki nepli depann lor marsan lager pu kree travay.

Pu aret lager inperyalist, bizin elimin tu surs ki alimant lager – kuma ferm baz militier etranze, demantel tu bann lalyans militier kuma OTAN ek konverti lindistri zarm a lindistri pusov planet! ■

AMJ ek BK

*Surs: ICAN (International campaign to Abolish Nuclear Weapons) *Complicit: 2020 Global Nuclear Weapons Spending*, June 2020.*

INVAZYON IKRENN PAR LARISI

Menas Konfli Nikleer

Kan Larisi inn invayir Ikrenn le 24 Fevriye 2022, Prezidan Larisi Vladimir Putin inn anonsé ki li pe met so arsenal nikleer lor “*high alert*” savedir an-eta pu servi zarm nikleer.

Zarm nikleer reprezent menas destrikson masif e menas lavi lor planet. Enn bom nikleer so pwisans destrikter buku-buku plis ki bom atomik ki USA ti large lor Hiroshima ek Nagasaki, de laval ek so populasyon sivil dan Zapon an Ut 1945 dan lafin Dezyem Ger Mondyal (WWII). Malgre sa, ena nef pei dan lemond ki posed plis ki 13,000 bom nikleer, e plizir pei finn kontinye depanse pu mintenir e devlop zot arsenal. Dapre ICAN, an 2020, sa nef leta-zarm-nikleer finn depans plis ki US\$73 milyar (apepre Rs 3 trilyon - Rs3,000,000,000,000) lor zot arsenal nikleer. Nu pe truve komye pe depanse lor zarm masif pu amenn destrikson imin ek lavi lor bul later tandi ki dan samem lane la lemond pe fer fas a pandemi Koronaviris kot finn ena plis ki 6 milyon dese e pena ase mwayin pu asir akse iniversel a swin lasante pu tu imin dan lemond.

Bann sif lor grander arsenal nikleer sak pei e zot depans militier pu mintenir sa arsenal nikleer pa ditu transparan. Nu finn baz nu lor sif furni par ICAN (*International Campaign to Abolish Nuclear Weapons*), Pri Nobel Lape 2017.

Arsenal Zarm Nikleer dan Lemond

Ala enn tab ki montre arsenal nikleer dan lemond.

Pandan lager ki lkenn, finanse e arme par USA pe amene kont Larisi, tultan ena danze ki li baskil dan enn lager nikleer.

Rapel ki Leta Zini finn deza larg 2 bom nikleer, lor Hiroshima ek Nagasaki.

Sa, li ti dan enn moman kot li ule terminn enn lager san met ankor bot lor later.

Riske swa Larisi, swa Leta Zini, truv li dan enn tel pozisyon plitar dan sa lager la.

Leta Posed Zarm Nikleer	Nonb Bom Nikleer par pei	Bidze Zarm Nikleer US\$ (2020)
Larisi (Russia)	6,255	8.1 milyar
Lamerik (United States)	5,550	37.4 milyar
Lasinn (China)	350	10.1 milyar
Lafrans (France)	290	5.7 milyar
Gran Bretayn (United Kingdom)	225	6.2 milyar
Pakistann (Pakistan)	165	1 milyar
Lenn (India)	156	2.4 milyar
Israel (Israel)	90	1.1 milyar
Nor Kore (North Korea)	45	0.7 milyar

Sa nef pei dan lemond ki bann leta-zarm-nikleer, Larisi, USA, UK, Lafrans, Lasinn, Lenn, Pakistann, Israel ek Nor Kore, ansam zot posed otur 13,000 bom nikleer. Larisi ek Lamerik posed plis ki 90% sa arsenal nikleer mondyal. Tab lao donn enn estimasyon komye bom nikleer sakenn sa nef pei la posede. Sa nef pei la finn depans otur US\$73 milyar lor zot arsenal nikleer (US\$ 73,000,000,000).

Ex-URSS ti ena enn 3,200 bom nikleer stratezik deplwaye dan lkenn (1,240), Kazakstann (1,410) ek Belaris (81). Zot ti su kontrol URSS parey kuma bann bom nikleer Lamerik deplwaye dan Lerop zordi zot su kontrol US. An 1992, apre implosion URSS, tu arsenal nikleer ex-URSS inn transfere a Larisi.

Kanada ti eberz bonb nikleer USA lor so teritwar antan ki manb NATO pandan Lager Frwad. An 1984, finn retir tu zarm nikleer stasyone lor so teritwar.

Lagres ti eberz bom nikleer USA lor so teritwar antan ki enn manb NATO. USA finn retir bann dernye bom nikleer an 2001.

Lafrans, ant 1960 ek 1996, ti fer 210 test nikleer dan so koloni Lalzeri ek Polinezi Fransez.

Israel, li enn leta Aparteid e anmemtan li enn leta nikleer bandi, ki posed 90 bom nikleer. Li pa

ni konfirme ni nye ki li ena zarm nikleer. Ena "Vela Incident" an 1979, Israel ansam avek Sid Afrik Aparteid ti fer enn test nikleer dan Losean Indyin ant Sid Lafrik ek Antartik (Get websay LALIT "*The South Atlantic Flash*" – *Hidden Israeli Nuclear Test* by Leonard Weiss pibliye le 16.06.2014). USA inn fer kover-ep pu maske prev sa insidan la depi piblik. Ziska zordi Leta Zini konplis avek Israel pu pa divilge so arsenal nikleer akoz ena enn lalwa dan Leta Zini ki anpes li donn led militer a pei ki ena zarm

nikleer.

Rezim Aparteid Sid Afrik, avek konivans Lafrans ek Israel, ti'nn devlop zarm nikleer. An 1996, Guvernman Sid Afrik post-Aparteid par lavwa Nelson Mandela, kan ANC vinn opuvvar, finn anfet demantel so arsenal zarm nikleer. Sid Afrik li sel pei ki ti ena kapasite zarm nikleer e finn volonterman demantel so arsenal nikleer. Sa li ti fer an-esanz pu tu pei siyn Trete Pelindaba.

27 Leta ki "enndors" posesyon e itilizasyon Zarm Nikleer

25 pei NATO uswa Partner NATO (ar USA):

Albani	Lostrali
Bilgari	Montenegro
Dannmark	Nor Masedoni
Estoni	Norvez
Island	Poloyn
Kanada	Portugal
Kroasi	Republik Czech
Lagres	Rumani
Laongri	Sid Kore ek
Latvia	Slovaki
Lespayn	Sloveni
Litwani	Zapon
Lixanburg	

plis 2 pei dan CSTO (ar Larisi):

Armeni Belaris.



Eskalad Armaman Nikleer

Avek lager dan Ikrenn, pe ena enn lekurs armaman, inkli nuklear.

Vis-Premye Minis Poloyen pe dimann vinn anba lezel Lamerik so armaman nuklear, pe dimann US depilway bom nuklear lor so teritwar.

Sid Kore so nuvo prezidan inn fer enn reket similer a Lamerik.

Lalmayn pe ranplas so laflot bombardye Tornado avek 35 bombardye Amerikin F-35 ki kapav sarye bom nuklear.

An 2021 UK finn anonsé li pu agrandi so arsenal nuklear olye diminye dapre plan. Asterla li pu ogmant li par 40% setadir 180 pu vinn 260 bom nuklear. An 2020 so depans lor zarm nuklear ti US\$6.2 miliyar.

Parkont, ena enn developman interesan dan Belzik: an Zanye sa lane la, 66 depite dan Parlman Belz ti pran enn vot anfaver eliminne prezans bom nuklear USA lor zot teritwar e pu Belzik zwenn Trete pu eliminne zarm nuklear. 74 ti kont setadir enn diferans 8 depite.

Zordi, nu pa kone kot bom nuklear deplwaye. Zot kapav lor sumarin, lor navir, e lor sa 700 baz USA etranze partu dan lemond ki inkli lor baz Diego Garcia.

Lafrik bizin vinn enn zonn san zarm nuklear kuma Trete Pelindaba dir. Bizin ferm baz militer-nuklear lor Diego. Lemond antye bizin vinn enn zonn san baz nuklear. Sel fason nu pu asire ki pena enn aksidan nuklear e ki okenn Leta pa menas pu servi zarm nuklear dan enn konfli militär.

AMJ & BK

Trete lor Zarm Nikleer

Sa lartik la li konpil enn seri trete pu rezir zarm nuklear.

Trete Non-Proliferasyon Nikleer 1970 (NPT)

Trete NPT la klasifye lemond ant enn kote, Leta-Zarm-Nikleer (USA, Larisi, Lasinn, Lafrans ek UK) ek leres lemond kuma Leta-Pena-Zarm-Nikleer. An 1970, ti ena sink pei ki ti ena, me ariv 2022 ena nef pei. Lenn, Pakistan, Israel ek Nor Kore inn devlop arsenal zarm nuklear. Sa, malgre sa sink Leta-Zarm-Nikleer antanki sinyater Trete ti tom dakor pu pena proliferasyon nuklear e zot pa ed okenn lezot pei akerir zarm nuklear. Israel, Lenn ek Pakistann zame pa finn siyn Trete NPT e an 2003 Nor Kore finn retir li kuma enn sinyater Trete la.

An 1996, Belaris zwenn Ikrenn ek Kazakstann pu transfer tu arsenal nuklear Ex-URSS depi lor zot teritwar ar Larisi ek lerla tule trwa pei vinn sinyater Trete NPT.

Leta Moris ti siyn Trete an Ziyet 1968 and ratifye li an Avril 1969.

Trete lor Zarm Nikleer Porte Intermedyer 1987 (INF)

Trete INF ti sinye 8 Desam 1987 e ti rant anviger an Zin 1988. Su sa Trete la, USA ek URSS tom dakor pe eliminne tu zot misil krwazyer ek misil balistik ki ti kapav al lor enn distans ant 500 km a 5,500 km. Ariv Zin 1991, tulede pei ti konplet rediksyon dapre Trete e zot fini detrir 2,692 misil. Sa

Trete interdiksyon lor misil-porte-intermedyer ti lor enn dire ilimite. Me, USA ek Larisi, sakenn ti pe akiz lot la komkwa pa pe komplay avek Trete.

An Ut 2019, apre enn preavi par Prezidan Trump, USA formelman retir li depi Trete INF.

Trete Interdiksyon Total Test Nikleer 1996 (CTBT)

Trete CTBT viz pu interdi tu test nuklear, gran kuma tipti, lao ek anba sifas later. Li met dibut enn sistem mondyal avek stasyon sistemik pu monitor ler, dilo ek later pu kapte sinal si zame ena kit explosion nuklear.

44 pei ki posed kit kalite kapasite nuklear ti oblige siyne e ratifye pu Trete la rant anviger: Bangladesh, Belzik, Bilgari, Brezil, Chili, Finland, Ikrenn, Israel, Kanada, Kongo, Lafrans, Lalmayn, Lalzeri, Lamexik, Laoland, Laongri, Larisi, Larzantinn, Lasinn, Laswed, Laswis, Lenn, Lespagn, Lezip, Lindonezi, Liran, Litali, Lostrali, Lotris, Nor Kore, Norvez, Pakistann, Peru, Poloyen, Rumani, Sid Afrik, Sid Kore, Slovaki, Tirkia, UK, USA, Vietnam, Zapon.

Plis ki 25-an apre, malgre 185 Leta fini sinye e 172 Leta fini ratifye lor 196 Leta Manb, Trete la tuzur pankor rant anviger. Kifer? Parmi sa 44 pei ki oblige siyne e ratifye, Nor Kore, Lenn ek Pakistann parmi trwa pei ki tuzur pankor ni sinye, ni ratifye e ena Lasinn, Lezip, Liran, Israel, USA parmi sink pei ki finn sinye me tuzur pankor ratifye.

Li grav ki Republik Moris, plis ki 25-an apre, tuzur tom parmi 11 pei ki pankor ni sinye ni ratifye.

Trete lor Interdiksyon Zarm Nikleer 2017 (TPNW)

Li ti adopte dan Nasyon Zini le 7 Ziyet 2017 par 122-1-1 setadir enn larz mazorite 122 Leta anfaver, Laoland ti sel leta kont e Singapore ti sel leta pu absténir. Trete finn

Pei Lerop azir kuma Baz Nuklear pu eberz Bom USA

Sink pei dan Lerop, Belzik, Lalmayn, Litali, Laoland ek Latirki, azir kuma baz pu eberz bom nuklear Amerikin lor zot teritwar. Tab anba donn enn estimasyon komye bom nuklear sakenn sa sink pei la eberze:

Leta Eberz Zarm Nikleer

Latirki (Turkey)	50
Litali (Italy)	40
Belzik (Belgium)	20
Lalmayn (Germany)	20
Laoland (Netherlands)	20

Komye Bom Nikeer pu USA ena lor so Teritwar

rant anviger le 22 Ziyet 2021 e ena 86 Leta fini sinye. Okenn pei ki posed zarm nikleer ubyin eberz zarm nikleer uswa dakor pu servi zarm nikleer pa prezan dan votman exsepte Laoland ek Singapur pankor ni sinye ni ratifye Trete la.

Tantativ USA pu sabot TPNW: Lamerik sel pei dan lemond ki finn larg de bom atomik lor lavil Hiroshima ek Nagasaki dan Zapon kot plis ki 200,000 sivil finn mor an Ut 1945. Zapon ti pei ki finn sibir sa atak militer-nikleer USA lafin WWII. Malgre sa, an Fevriye 2017, enn mwa avan kumansman negosyasyon lor *Trete pu Eliminn Zarm Nikleer*, Prezidan Trump ek Premye Minis Zapon siyn enn deklarasyon komin lor langazman ferm USA pu defann Zapon militerman, avek zarm konvansyonel ek nikleer. An 2017, enn semenn avan adopsyon TPNW, Prezidan Trump siyn enn mem kalite deklarasyon komin avek Sid Kore. Lamerik finn aktivman fer kanpayn pu bann pei pu pa vot anfaver sa Trete e inn mem fer kanpayn pu pei ki finn fini ratifye pu retir zot ratifikasyon pu anpes ariv 50 pei sinyater e kumsa anpes Trete la rant anviger.

Dapre enn sit-web ase serye, nuclearweaponsbanmonitor.org, Republik Moris malgre li ti parmi 122 pei ki finn vot anfaver sa Trete la an 2017, Leta Moris pankor ni sinye, ni ratifye, ni adere. LALIT depi lafin 2020 vini mem, nu pe denons Guvernman akoz li pankor ratifye, ubyin mem siyn sa Trete la. Bizin siyne tutswit! Sa pu ranforsi demand pu ferm baz militer-nikleer Amerikin lor Diego Garcia.

Lakor lor Kontrol lor Zarm Nikleer Stratezik

Trete Misil Anti-Balistik (ABM): An Zin 2002, USA inilateralman retir li depi Trete ABM.

Trete Pu Rediksyon Zarm Stratezik 1991 (START I)

Trete operasyonel, e finn expire an Desam 2009.

Trete Pu Rediksyon Zarm Stratezik 1993 (START II)

Pa rant anviger akoz USA inn retir li depi Trete Misil Anti-Balistik an 2002.

Nuovo START ant USA ek Larisi an Avril 2010, inn rant anviger an Fevriye 2011. An Fevriye 2021, USA ek Larisi inn tom dakor pu extenn li pu ankor 5-an, kuma text Trete permet, ziska Fevriye 2026.

Lezot Trete Rezyonal pu Dekret bann Zonn San Zarm Nikleer

Trete pu enn Lamerik Latin San Zarm Nikleer 1967 osi koni kuma Treaty Tlatelolco

Rant anviger an Oktob 2002. Sa Trete lamem ki finn servi kuma enn baz pu lezot trete pu deklar diferan zonn san zarm nikleer dan lemond.

33 pei dan Lamerik Latin ek Karaib inn sinye ek ratifye: Antigua ek Barbad, Larzantinn, Bahamas, Barbados, Beliz, Bolivi, Brezil, Chili, Kolombi, Kosta Rika, Dominika, Republik Dominikenn, Ekwador, El Salvador, Grenada, Gwatemala, Guyana, Hayti, Hondiras, Zamaik, Lamexik, Nikaragwa, Panama, Paragway, Peru, St Kit & Nevis, St Lisi, St Vinsan & Grenadinn, Surinam, Trinidad & Tabago, Urugway ek Venezwela.

Trete pu Pasifik San Zarm Nikleer 1985 osi koni kuma Trete Rarotonga
Rant anviger an 1986. Li kuver rezyon apartir lakot Wes Lostrali ziska Zonn San Zarm Nikleer Lamerik Latin. Lasinn ek Pei dan CIS* finn siyne. An 1996, USA, Lafrans ek UK finn osi siyne.

Trete pu Lafrik San Zarm Nikleer 1996 osi koni kuma Trete Pelindaba

Trete Pelindaba li enn zutu importan dan nu lalit politik pu ferm baz militer-nikleer USA lor Diego-Chagos. Li finn rant anviger an 2009. 52 pei mam Linyon Afrikin lor 53 pei mam inn siyne. Sink pei nikleer USA, Lafrans, UK, Lasinn ek Federasyon Larisi finn angaz zot pu korpere ek zot finn siyn de

protokol atase avek trete la. Purtan UK-USA pe mintenir enn baz militer-nikleer lor Diego dan leker Losean Indyin.

Pelindaba, li nom landrwa kot arsenal nikleer Rezim Aparteid ti ete. Avek so demantelman an 1994 su premye guvernman ANC post-aparteid, Pelindaba vinn sinbol sa sanzman pu fini avek fabrikasyon zarm nikleer dan Sid Afrik. Anesanz, tu pei dan UN ti dakor pu met dibut sa Trete la pu ki pena okenn zarm nikleer dan Lafrik antye. Kumsa li gayn so nom: "Trete Pelindaba". Sa-mem nu dir li enn eritaz anver lape mondyal delapar tu dimunn ki finn lite pu fini sistem aparteid dan Sid Afrik.

Trete pu Sid-Est Lazi San Zarm Nikleer 1995 osi koni kuma Trete Bangkok

Rant anviger an 1997.

Leta Sinyater Trete: Bruney, Indonezi, Kamboj, Laos, Malezi, Myannmar, Filipinn, Singapur, Tayland ek Vyetnam

Trete pu Lazi Santral San Zarm Nikleer 2006 (CANWFZ - Central Asian Nuclear-Weapon-Free Zone Treaty).

Ti rant anviger Mars 2009. Kazakstann, Kirzigistann, Tajikistann, Tirkmenistann, Uzbekistann.

Israel blok Trete pu enn Mwayin Oryan kuma enn Zonn san Zarm Nikleer

Leta Israel, limem veritab obstak pu fer Mwayin Oryan vinn enn Zonn San Zarm Nikleer. Israel ena zarm-nikleer me li azir kuma enn leta-bandi, li refiz konfirme uswa demanti ki li posed bom nikleer. Alor, Israel pa permet okenn verifikasiyon lor so arsenal.

Trete ar Liran

Joint Comprehensive Plan of Action (JCPOA) ant Liran ek Lasinn, Lafrans, Lalmayn, UK ek USA ti fer an 2015. Konsey Sekirite Nasyon Zini ti enndors sa Lakor la. Israel pe opoz sa lakor la.

Liran pa posed zarm nikleer; parkont Israel ena buku. Liran enn sinyater Trete Non-Proliferasyon

Baz militer USA dan lemond

Zarm Nikleer (NPT, *Treaty on the Non-Proliferation of Nuclear Weapons*); parkont Israel pa enn sinyater. Liran permet inspeksyon so fasilité nikleer par International Atomic Energy Agency (IAEA); Israel pa permet. Liran sutenir demars pu enn Mwayin Oryan san Zarm Nikleer, Israel non. Alor kot Israel sape pu gayn tupe pu opoz lakor avek Liran?

Malgre Liran ti komplay avek Lakor dapre IAEA, Lamerik su Trump inilateralman retir li depi JCPOA an Me 2018 e re-inpoz sanksyon lor Liran. Fevriye 2021, apre eleksyon Biden, negosyasyon inn rekumanse. Me, konfli dan Ikrenn inn blok devlopman dan negosyasyon. Lalit kontinye.

Li finn enn long lalit pu ariv gayn diferan trete lor zarm nikleer. Sa bann trete la zot res zuti importan dan lalit pu elimininn zarm nikleer lor planet. Me, selman artikilasyon lalit politik dan sak pei ansam avek enn lalit global ki ena potansyel pu elimininn tu zarm nikleer lor bul later. Zarm nikleer reprezent enn menas pu tu lavi lor planet.

Li nu devwar isi dan Moris pu fer ferm sa baz militer nikleer Diego Garcia, saparti Republik Moris. Trete Pelindaba pu enn Lafrik San Zarm Nikleer ek Trete lor Interdiksyon Zarm Nikleer, zot bann zuti importan dan lalwa internasional pu expoz krim impérialist USA ek UK e met zot lor defansiv. Nu bizin met presyon lor guvernman e usi lor tu parti politik pu pran pozisyon pu Republik Moris tutswit siyn ek ratifye Trete pu interdi test nikleer (CPBT) ek Trete pu elimininn zarm nikleer (TPNW) e pu apiy demand pu ferm baz USA lor Diego Garcia enn fwa. ■

AMS & BK

Not: CIS - *Commonwealth of Independent States* forme an 1991 ek ena 12 pei mam: Armeni, Azerbayjann, Belaris, Ikrenn, Kazakstann, Kirgizstann, Lazorzi, Larisi, Moldavi, Tajikistann, Turkmenistann, ek Uzbekistann

Baz militer USA dan pei OTAN ki pe permet Ikrenn fer fas militerman kont larme Larisi. Baz militer finn tultan itilize kuma tranplin pu fer lager, pu permet bann lanpir asir zot dominasyon e etann zot kontrol lor lemond. Diferan lanpir dan listwar finn apiy lor enn sistem fortres (baz militer) andeor zot teritwar pu inpoz zot reyn. Par exanp lanpir Romin, alepok ti pe pran su so proteksyon bann pei ki ti fer fas agresyon depi pei vwazin pli pwisan. Relasyon ant Lotorite Rom ek so proteze ti baze lor bann Trete kot pei su so proteksyon ti konserv zot stati inisyal independan ek suverin.

Anretur zot ti sed enn porsyon zot terin pu batir fortres kot larme Romin ti stasyone, pu asir sekirite lanpir osi byin ki pu so proteze. Sa ti permet lanpir Romin gayn kontrol lor imans teritwar so ansyin alye ki odepas ti proteze par sa sistem baz militer. Anplis lotorite Rom ti pe delibereman anexe tu ansyin teritwar so lennmi ki li ti konkerir dan lager. Tu sa teritwar la ti pe form parti lanpir Romin, e kumsa permet li etablis so sipremasi politik.

Parey dan 19yem syek, Langleter antan ki prinsipal pwisans kapitalist, ti kontrol e guvern enn vast lanpir kolonyal atraver enn sistem mondal baz militer. Sa sistem la ti konsiste an kat rezo baz lor kulwar maritim domine par pwisans naval Britanik depi Mediterane ziska Lind; depi Lafrik Disid, Lextrem Oryan ek Pasifik; depi Lamerik dinor ek Karaib ek depi Lwes Lafrik. Apre Dezyem Ger Mondyal lanpir Britanik finn efrondre e Lamerik finn ranplas li kuma pwisans dominan lekonomi kapitalis atraver enn rezo instalasyon ek baz militer dan enn santenn pei ek rezyon.

Zordi mem apre ki Lamerik finn bizin ferm enn santenn baz militer



Picasso, Kolomb Lape

dan Lirak ek Afganistann, li tuzur mintenir enn rezo 800 baz militer dan plis ki 70 pei. Lamerik ena plizir baz militer mazer dan Lerop: li ena 119 baz dan Lalmayn, 44 dan Litali, 25 dan UK, 21 Portugal, 13 Latirki, 11 Belzik. Grand Bretayn so kote ena 145 baz militer dan 42 pei. Larisi ena 36 baz dan enn dizenn pei. Lasinn ena sink baz andeor so teritwar. Anfet Lamerik ena 3 fwa plis baz militer ki tu lezot pei kombine.

Leta Zini sel pei ki diviz lemond an bann komandman (leta-mazor) militer dirize par diferan zeneral, amiral ek so kontinzan solda. Zis Lamerik ki ena baz militer lor preske tu kontinan. E Lamerik azir kumadir ninport ki pei ubiyin rezyon form parti integran so prop teritwar, mem si pei-la plizir milye kilomet depi so lakot, mem li separe par enn imans losean. Kuma li pe fer ar so bato deger dan Lamer Sid Lasinn.

Leta Zini ki dikte so lalwa lor bann pei ki akeyir so baz uswa fasilité militer administratif lor zot teritwar. Par exanp, lefet Leta Zini dispoz bann fasilité militer dan Laoland, sa permet li gayn akse Laoland so pli gran laeropor, Schipol, e so pli gran lepor, Rotterdam pu debark zarm ek lezot materyel san bizin pas par servis ladwann Olande. Anplis tu pilot konpayni aeryin olande

KLM bizin siyn enn kontra ki inkilir enn kloz kot, dan ka lager, zot tu bizin pran zot direktiv pa depi guvernman Laoland me depi larme deler Amerikin.

Enn lemond militarize

Zordi nu anplin dan enn lepok mondyalizasyon militarize. Fode pa ki agresyon militer Larisi kont Ikrenn maske lefet ki ena plis ki 50 konfli arme dan lemond, e pre lamwatye lor kontinan Lafrik. Tusa konfli la, inkilir dan Ikrenn, zot lye ar globalizasyon kapitalis. Leta Zini pli gran promoter lekurs pu prodiksyon ek depans armaman e prinsipal instigater konfli militer. Dapre sif SIPRI (Linstiti international Resers lor lape baze Stockholm), an 2020, depans militer mondyal finn ariv 2000 milyar dolar. Sa li reprezant enn ogmantasyon pre 80% depi 1995. An 2020 depans militer Leta Zini tusel ti reprezant pre 40% seki pu lemond antye e pu bann pei OTAN li ti environ 60%. An 2019 bidze militer Leta Zini ti \$616 milyar, an 2022 li vinn \$715 milyar. Bidze militer pei Lerop fer enn total \$378 milyar. Tuzur dapre SIPRI pandan dernye deseni bidze militer Lerop de Lwes finn ogmante par 8,5%, 31% dan pei Lerop Santral ek 74% dan Lerop Oryantal (ki inkilir Laongri, Poloyn, Moldavi, Repiblik Tchek, Rumani, Slovaki, Ikrenn). Laplipar sa larzan la servi pu finans bann baz ubiyin instalasyon militer.

Bizin demantel e ferm tu baz militer etranze

Baz militer reprezant kolonn vertebral laparey militer US ek OTAN. Zot finn servi pu ranvers guvernman eli uswa pu donn Lamerik plis misk pu fer presyon lor latab negosyasyon. Buku parmi 300 intervansyon militer uswa invazyon US dernye syek finn posib parski US ena baz militer dan rezyon stratezik ki permet li sutenir sa bann loperasyon militer la. Li pa etonan ki sa rezo baz militer konsidere kuma enn menas pu sekirite nasyonal par tu pei ki

pa dan kan US uswa OTAN. E li osi reprezant enn menas pu tu klas travayer dan US ek dan pei OTAN. Sa menas konstan pe kontribye pu alimant sa foli konpetisyon dan prodiksyon zarm deplizanpli destiktif.

Tu sa rezo baz militer form parti integral preparasyon pu lager. Baz US-UK lor Diego Garcia, ki form parti teritwar Repiblik Moris, kuma ruling Lakur La Hay, zizman ITLOS e vot Lasanble Nasyon Zini finn demonstre, finn itilize kuma laranp lansman pu latak militer e bombardman lezot pei kuma Lirak, Afganistann. San Lamerik so baz militer dan Latirki, Lalmayn, dan pei Mwayin Oryan ek lor Diego pena invazyon Lirak.

Baz Diego finn osi servi pu stokaz zarm nikleer e pu servising sumarin nikleer an vyolasyon Trete Pelindaba pu enn Lafrik san Zarm Nikleer. Anplis Diego enn mayon dan sistem rezo sirveyans "Echelon" (osi koni kuma "Five Eyes") ki impérialis US servi pu intersepte, espyonn ek monitor

konteni mesaz emel, portab ek lezot sirkilasyon data dan lemond.

Lemond pe travers enn lepok byin grav. Ena menas lager nikleer. Leta Zini ek so lebra militarist, OTAN, pe alimant lager ant Ikrenn ek Larisi. Sanksyon ekonomik san presedan ki Lamerik ek pei OTAN pe infoze kont Larisi pe provok kriz lenerzi e pe menas kree enn kriz alimanter mondyal. San kont konsekans kriz lekonomi kapitalism, dereglementasyon klimatik ek ekolozik akselere. Zordi ena tu ingredyan pu enn dezast ki riske antrenn extinksyon limanite. Pu anpes lager e kal lamonte militarism bizin demantel e ferm tu baz militer etranze. Anmemtan ena nesesite konpran pli byin sa dezord mondyalizasyon kapitalist pu repran lalit internasionalist. Ena nesesite pu klas travayer ek tu grup oprime dan lemond organize e azir lor baz enn program pu sosyalism, avan li tro tar. ■

AA



Poster Anti Lager, Fer lamizik pa Lager

Lefe lor Lenerzi

Dub lefe lager Ikrenn ek sanksyon kont Larisi finn ena enn gran lefe lor pri prodwi petrolye. Sa swiv ogmantasyon dan pri ki finn ena avek pandemi Kovid. Depresyasyon valer Rupi osi finn kontribiye a ogmantasyon pri. Ant 2020 ek Fevriye 2022, savedir zis 2 an, 4 fwa enn deryer lot, pri karbiran finn ogmante par 40%.

Lager Ikrenn ek sanksyon kont Larisi li differan avek lezot faktor. Li pu ena lefe lor sekter lenerzi onivo mondal. Kontrol ek marse lenerzi li enn parmi bann koz lager, e li osi pu afekte sekter lenerzi onivo global. Anu explike. Larisi ti enn furniser prinsipal gaz naturel ek prodwi petrolye pu Lerop avan lager. Kan lager finn deklanse, avek sanksyon kont Larisi, Lerop finn bizin sey rod lot furniser prodwi petrolye. Sa finn kontribiye dan ogmantasyon pri partu dan lemond.

Gaz naturel likid, enn prodwi ki pa ti telman prize avan finn vinn santral dan sekter lenerzi. Sa pe sanz profil sekter lenerzi an-antye. Akoz problem karbonn avek sarbone akoz danze aksidan nikleer si fer santral nikleer pu prodiksyon lenerzi, Lerop ti swazir pu fye lor rezerv petrolye ek gaz Larisi pu so lindistri rule, pu prodiksyon elektrisite e pu sofaz lakaz dimunn kan fer fre. Ariv 2020, Lerop ti import 30% so prodwi petrolye ek 57% so gaz naturel depi Larisi. Gaz naturel ki Lerop importe depi Larisi anparti pas atraver teritwar Ikrenn kot Larisi pey Ikrenn enn fiz tranzit, leres pas par payp-laynn *Nord Stream 1* ki relye Larisi ek Lalmayn lor enn distans 1200 km. Ena osi payp-laynn ki relye Latirki ek Belaris. Trwa lor kat payp-laynn kontrole par Larisi.

Enn lot payp-laynn *Nord Stream 2* ant Larisi ek Lalmayn finn fini instale an 2021, me so operasyon finn friz par guvernman Alman swit a presyon depi US ek Lerop. Alor leta Alman, li perdan avek sityasyon lager US-OTAN kont Larisi.

Payp-laynn Nord Stream 2 finane a 50% par konpayni Deta Larisi Gazprom e leres par konpanyi Franse Shell ek Engie. Avan ki reysi gayn desizyon, lager Ikrenn fini anklanse. Eski sa li enn parmi bann koz lager? Dan lepase resan, Larisi finn ankonfli permanan avek Ikrenn lor gaz ki tranzite laba. Larisi finn akiz Ikrenn pe kokin so gaz e Ikrenn tultan pe demanti e pe inpoz enn pli gran fre pasaz lor Larisi.

Kan get lintere kapitalis lenerzi dan lezot pei, truve ki zot ena lintere kas sa laranzman komersyal la. US, par examp, an 2015 pa ti ena terminal ki permet exportasyon so gaz naturel. Asterla li ena 7 terminal pu exportasyon e ena enn duzenn an-santye. Prezidan US Biden finn dir li pu akseler prosesis la.

Pu prepar tu infrastruktur pu ki gaz naturel buze depi enn pei a enn lot pa fasil. Bizin konstrir enn payplaynn – enn rezo tiyo. E bizin rapel

ki gaz naturel, li enn fosil fyuel, li pa renuvlab, mem si li mwini polian ki lezot fosil fyuel. Seki anfet sanze, se ki grup kapitalis plis profite depi sa shiftaz dan politik kote lenerzi. Top 5 exportater prodwi petrolye: Larabi Saudi, Larisi, Irak, US ek Emira (UAE). Zot kuver 50% marse mondal. Top 5 exportater gaz naturel: Katar, Lostrali, US, Larisi ek Malezi zot kuver 70% marse mondal pu gaz naturel. Fini truve kimanyer kapitalis sekter lenerzi dan Leta Zini sirtu profite direkteman depi sanksyon kont Larisi.

Kontrerman a lezot prodwi, pu rod lezot sur karbiran, li dimann letan, investisman ek fon. Seplay gaz ek petrol pu diminye, e sa pu ena enn linpak global lor sa 2 item la.

Se lamas dimunn antye lemond ki pu sarye fardo e pey pli ser pu politik ek stratezi ki guvernman pro-kapitalis deside pu swazir. ■

RL ek RK



LAGER LARISI –IKRENN PLIS SANKSYON KONT LARISI

Lefe lor Manze

Lager Larisi-Ikrenn depi le 24 Fevriye pe amenn destrikson e anmemtan amenn deplasman par milyon dimunn dan Ikrenn depi zot plas ki zot pe viv ek travay. Kote Larisi, sanksyon ki USA ek pei Europein finn inpoze finn blok lasenn distribisyon ek exportasyon alimanter. Larisi ek Ikrenn, se bann gro prodiakter dible, may ek lezot sereal. Kan zot anger, sa pu afekte prodiksyon e lasenn distribisyon alimanter dan lemond ki pu ena lefe, asontur, lor bann pei vilnerab. Sa de pei la ansam reprezent 30% prodiksyon dible pu fer lafarinn ek tulede reprezent prodiksyon 50% delwil fler soley. Dapre FAO, avan lager, Ikrenn ek Larisi ti prevwar pu export 6 milyon ek 8 milyon tonn dible sakenn ant Mars a Zin 2022.

Sa pa paret pu posib asterla. Lager reprezent enn obstak e pu ralanti prodiksyon manze dan sa de pei. Pu ena osi pirturbasyon lasenn distribisyon e destrikson mwayin transport dan Ikrenn e sanksyon ki pei OTAN finn inpoze lor Larisi.

Donk tu pei ki depann lor importasyon manze depi sa de pei pu dan gro problem aprovizyon-man alimanter. Me sa lager la pe osi afekte usi lezot pei dan lemond, etan done ki bann lezot pei prodiakter pu gard stok e limit zot exportasyon. Pu ena mankman, tukur.

Ena omwin enn sinkantenn pei dan lemond ki pu plis afekte, sirtu dan Nord Lafrik ek Mwayenn Oryan ki depann plis ki 50% lor Larisi ek Ikrenn pu zot importasyon

dible. Kote Lerop ek Lazi, ena pli-
zyer pei ki depann lor fertilizan
depi Larisi pu zot plantasyon.
Deza ena enn mank fertilizan
e sa mank la kapav kontinye
ziska lane prosenn, kot riske rat
sezon plante e sa pu amenn enn
bes drastik dan prodiksyon alimanter
onivo sa bann pei la.

Tu sa bann faktor la ena potansyel
pu amenn enn kriz alimanter ki pu
tus tu pei dan lemond.

Kan ena kriz alimanter, se
travayer ek dimunn mizer antye
lemond ki pu pey konsekans avek
ogmantasyon pri ek mank manze
dan labutik ek sipermarse. Dan le
pase an 2007-2008, kriz alimanter
ti debus lor lemet ek manifestasyon
kan dimunn pa ti ena manze.

Nu pe rant dan enn kriz alimanter
global ki, si pa truv mwayin
a-tan pu asire ki tu dimunn ena
manze, e dan enn pri kapav peye,
nu kapav debus lor enn kriz sosyal
grav. Dayer dan Moris nu deza
pe truv lakoler ki pe exprime kan
dimunn pe desann dan lari.

Lager Larisi-Ikrenn pa kone a ki
pwin pu agrave e komye letan li pu
dire. Dan Moris nu byin vilnerab
akoz nu depann lor importasyon
manze debaz. Malgre nu pa import
buku depi Larisi ek Ikrenn, nu
lezot surs aprovizzonnman pu
afekte par mankman zeneralize.

An Ziyet lane dernye, Minis
Lagrikiltir Maneesh Gobin dan so
diskur pu *Food Systems Summit*
UN, finn rekonet ki Moris import
75% nu prodwi alimanter e li dir
ki konpayni etranzer pe fer piyaz
lor gran lesel resurs pwason dan
zonn ekonomik Republik Moris.
Me Minis Gobin pa anons ki
desizyon guvernman pu pran pu
lans prodiksyon alimanter lor
gran lesel pu asir nu suvrennte
alimanter, nonpli li pa anons kan
guvernman pu aret donn sa bann
mem konpayni la permi lapes.
Guvernman MSM mank kuraz
politik pu fors tablisman plant
manze lor gran superfisi later agri-
kol ki zot finn monopolize pandan
plizyer syek.

Onivo LALIT nu pu kontiyn nu

kanpayn pu tablisman aret betonn
later agrikol pu ranz vila delix pu
milyoner etranze. Dan sa sitiasyon
irzans alimanter, guvernman biz-
in fors tablisman pu utiliz enn
tyer sipersi later kann ubuin
utiliz sistem antreliyn prodiksyon
alimanter lor gran esel. Bizin
ena osi lizinn transformasyon ek

prezervasyon. LALIT dir ki bizin
met dibut enn lindistri lapes ki
sutenab lor nu siperfisi 2.4 Milyon
kilomet kare lamer.

Sa pu diminye nu dependans
lor manze importe e an anmemtan
sa pu kree anplwa permanan e
amenn deviz. ■

RK

DOLAR KUMA ENN ZARM PU U.S.A.

Dolar US li enn zarm ekonomik dan lame Leta Zini pu kontre tu so
adverser. Dernyerman avek invasyon Larisi dan Ikrenn, Amerikin inn
servi \$ US kuma enn zarm kont Larisi. Dolar US ena trwa itilite prinsipal,
e premye li suvan an-kontradiksyon avek lot de:

1. Li larzan ordiner pu tranzaksyon dan USA, kuma Rupi ete pu Moris.
2. Leres lemond servi \$US kuma enn rezerv. Ena buku pei, konpayni ek
individu, ki ena stok dolar, parski li enn deviz ki ti sekirizan par rapor a so
stabilite ek so valer, a mwayen term; avan sa, lingo lor ti ena sa fonksyon
la. Zordi \$US pe ariv so dat expirasyon pu sa fonksyon la.
3. Lot itilite, dolar servi pu regle trazaksyon komersyal onivo internasional
(enn deviz ki ti konsidere pli apropriye pu fer tranzaksyon, e dan buku ka,
mem kan servi lezot deviz, pe servi li par referans a to-desanz dolar); sa
tilite la, li osi ,pe ariv so dat expirasyon.

Depi bann lane 1970, lefet ki trazaksyon prodwi petrolye fer an Dolar
(Petrodolar), samem labaz valer Dolar US internasionalman.

SWIFT, enn rezo komunikasyon baze dan Belzik, li kontrol, e li valid,
laplipar tranzaksyon mondyal. Li ti kre pu fasilit komers san okenn
inzerans politik. Asterla, nu truve ki atraver sanksyon infoze par Lamerik
lor enn grup pei kuma Larisi, Liran, Lasinn, e inn mem menas Lind, zot
pe blok SWIFT, ki li osi li fonksyonn an dolar kuma referans.

Kuma nu'nn truve dan lepase, Lamerik, kan li bat retret depi Afganistann
apre 20 an lokipasyon ilegal, li finn kareman konfiske fon nasyonal
Afganistann ki ti depoze an-bonn-e-di-form dan labank Amerikin. USA
finn osi konfiske lamwatye rezerv Larisi, e rezerv Venezwela. Ondire
USA pe azir kuma enn pirat lor lamer lontan. Li zis rode, pran pu li.
Sirman tu sa oligark Larisi la, li pu sezi zot dibyin ek zot Dolar US, osi.

Konsekans eksklizyon Larisi depi SWIFT, finn amenn plizyer
destabilizasyon dan komers prodwi petrolye e lezot trazaksyon;

* Larisi finn fer deklarasyon ki pei Lerop pu bizin pey petrol an Rub
Larisi.

* Larisi finn kree enn nuvo platform avek Lind pu vann petrol e kontiyn
lezot tranzaksyon ant zot 2 pei an Rub ek Rupi Indyin.

* Larisi, dezyem prodikter petrol, pe negosye ar Lasinn, ki pli gran
konsomater petrol, pu pa servi dolar.

Sa pu antrenn emerzans PetroRub e pu riske degringol PetroDolar.

Anmemtan, Larabi Saudiit ek Lasinn zot an purparle lor kestyion vann
petrol an 'Yuan'. Sa paret pe konkretize.

Seki arive, se USA pe pli andet li ar lezot pei (30 trilyon US\$) e li
zis kareman inprim *Dolar* pu peye. Li pa sutenab. Alor, li kumans sezi
larzan.

Fode pa nu blyie ki valer Dolar li ti liye ar kantite lingo lor ki USA
posede, e ti liye ar prodiksyon. Me asterla so labaz li zis konfyans. E
nepli ena konfyans ar li.

Sa bann rezon la pe ogmant risk ekrulman Dolar e so reyn inipoler. ■

RR ek SR

Sanksyon Ekonomik ek so Lefe

Ki ete enn sanksyon ekonomik? Nu lir ki USA ek Lerop inn aplik “sanksyon ekonomik” lor Larisi dan kad so lager kont Ikrenn, mem avan invazyon. Sanksyon viz Leta Larisi, so gran konpayni, so top dirizan, so oligark. Me, ki li ete, *sanksyon?*

Kan nu koz sanksyon, nu pans sa 60-an sanksyon ekonomik ki finn infoze par Lamerik lor Kiba. Enn gran pei finn aplik sanksyon lor enn tipti pei akoz li pa dakor ar so sistem ekonomik?

Sanksyon ki “legal” dapre lalwa internasyonal

Dapre sapit VII Sart Nasyon Zini, Konsey Sekirite Nasyon Zini li kapav pran aksyon miltilateral pu rezon swivan: pu restor lape internasyonal, pu sutenir tranzisyon rezim-politik, pu anpes sanzman anti-konstitusyonel, pu are terorism, pu protez drwa imin e pu anpes proliferasyon nikleer. Dapre lartik 41, enn sanksyon li enn mezir ki pran diferan form pu atenn sa kalite bi la. Ena 7 kalite sanksyon: sanksyon komersyal ki anpes importasyon-exportasyon vizavi pei sible, sanksyon finansye ki konsern reskriksyon lor sirkilasyon larzan, sanksyon transportasyon marsandiz ek vwayaz dimunn, sanksyon militer atraver anbargo zarm, sanksyon diplomatik ki revok viza diplomat ek lider politik, ek sanskyon kiltirel ki anpes partisipasyon atlet e artis dan konpetisyon e evennman internasyonal.

Larisi finn sibir totalite tu sa kalite sanksyon la depi lager kont Ikrenn. Sertin depi avan 2014.

Pa zis Larisi ki sibir sanksyon. Depi Dezyem Ger Mondyal, aplikasyon sanksyon finn ogmante, sirtu li enn zarm servi par Leta Zini. Ziska zordi Konsey Sekirite Nasyon Zini finn tom dakor avek aplikasyon 30 sanksyon rezim. Setadir, zot ti parfetman legal dapre lalwa internasyonal. Ala lalist: kont rezim “UDI” dan Rhodesia (Zimbabwe),

kont Sid Afrik apartheid, Yugoslavia, Haiti, Lirak, Angola, Rwanda, Sierra Leone, Somali, Eritrea, Etiopi, Liberia, DRC, Kot Divwar, Sudan, Lebanon, Kore di Nor, Iran, Libi, Guinea-Bisau, Sant Republik Afrikin, Yemen, Mali. Nasyon Zini finn usi sible bann grup kuma ISIL (Da’esh), Al-Qaida ek Taliban pu aplik sanksyon.



Sa bann sanksyon Konsey Sekirite UN, nu kapav konsidere kuma sanksyon “legal”.

Pli resan sanksyon kont Larisi, ti an mwa Avril, e li ti anfet legal dan sans ki li fini vote par Lasanble Zeneral Nasyon Zini, me pa strikteman “legal” akoz li pa ti vote par Konsey Sekirite, kot Larisi ena drwa veto, osi byin ki Lasinn. Me, pankor ena enn rapor lor lanket kont sa alegasyon kont Larisi pu krim deger la. Klerman ena dimunn finn truve mor, ena ena siyn tortir, me li pa evidan kisannla inn tuy zot, e dan ki sirkonstans. Sa-mem ena lakur. E sirman pu sa rezon la, zis enn minorite pei Nasyon Zini finn anfet vote pu Rezolisyon pu sispann Larisi dan Konsey Drwa Imin. 93 lor 193. Plis ti absténir ubyin pa vote, ubyin vot kont. Anfet 24 pei ti vot kont expilson Larisi. Me, dizon, li ena enn eleman legalite.

Me, kan Konsey Sekirite pa implike, li kapav poz problem. Li riske agrav divizyon parmi manb militerman for dan Nasyon Zini. Li riske intansifye konfrontasyon ant sa 2 pei la, e ant USA (ki pe arm Ikrenn) ek Larisi.

Fode pa osi, nu blyi ki mem prinsip lor lekel deside pu aplik sanksyon, li oblize parey pu tu

dimunn. Pa kapav ena enn “lalwa internasyonal” pu Larisi, e lerla ena enn lot “lalwa internasyonal” mwin sever kan ena pu get krim par UK ek USA, par examp. Zot dirizan ek dirizan zot alye pros zot “kupab” krim terib dan Afghanistann, Yugoslavi, Yemenn, Palestinn, Lirak, Lwes-Sahara, pu nom sertin. Pa finn ena aksyon kont zot.

Depi kumansman 2022 finn ena politik “sanksyon preventif” ki finn aplike kont Larisi avan mem invazyon militer. An Feviye *House of Representatives* Lamerik pas bil pu sispann relasyon komersyal avek Larisi apre ki Zelensky fer lapel a Kongre. Anfet finn ena sanksyon ekonomik ki ti kumanse 8-an desela an 2014, kan lepep Krime ti fer sulevman e Larisi finn anexe sa teritwar Ikrenn la. Sa ti dan enn lepok kot bann batayon notwar dan Ikrenn ti pe asasinn par milye dimunn (14,000 par la) Risofonn dan Donbas. Prezidan Obama ale-pok ti anons restriksyon lor vwayaz ek blokaz rises bann individu Larisi ki zot dekret responsab intervansyon militer dan Krime.

Valer di-zur bann Leta ki alye pu sanksyon Larisi zot leswivan: pei setler-koloni (USA, UK, Ostrali, Kanada, Nuvel Zeland) ek pei Lerop. Lerla, zot finn reysi rekrit Zapon ek Sid Kore.

Ena 27 peyi Eropyin dan NATO ki, ansam, pe blok sertin labank Larisi atraver blok sistem SWIFT ki implik enn rezo 11,000 institusyon finansye dan 200 pei ki permet flwidite komers e investisman global.

Kisannla afekte?

Dan Larisi, enn pei 146 milyon dimunn, ena 72 milyon ki travayer aktiv, e pre 2 milyon san anplwa. Lamwatye travayer dan Larisi travay dan sekter servis, lot lamwatye, 30% dan lindistri e leres travayer dan lagrikiltir. Nu pa sir a ki pwin sanksyon pe afekte seki pwisan dan Larisi, ubyin seki dan klas travayer. Seki paret vre, se

Muvman Anti-Lager

Guvernman Larisi, finn atas so larzan (Rub) ar valer lor. Alor, sa pe azir, pur-lemoman, pu stabiliz valer Rub e lekonomi Larisi.

Antuka, kan enn pei pwisan kuma USA, ubyin enn lalyans militer kuma OTAN deside pu aplik sanksyon ekonomik – zis akoz zot for – li riske vinn dominer, kuma dan ka sanksyon kont Kiba.

Apepre plis ki 600 konpayni finn sispann zot investisman dan Larisi. Klerman sa pu riske destabiliz so lekonomi.

Me, ena lefe kontrer.

Ena lefe non-intansyone.

Larisi ansam ar Ikrenn prodir 30% dible pu lafarinn, e osi may. Buku pei mizer depann lor sa manze debaz la. E so labsans – si sanksyon ek lager kontinye – depi marse mondal, pu fer pri monte kuma zame finn truve, e peniri pu afekte pei mizer, e dimunn mizer dan tu pei. Kote dilwil komestib, Larisi ek Ikrenn prodir plis ki 50% delwil fler soley. Sa vedir, si lager ek sanksyon persiste, pu ena peniri. Anplis, Larisi li prodir laplipar tule 4 kalite fertilizan dan lemond. E si sanksyon kontinye rekolt danre alimanter partu pu afekte dan lavenir.

FAO, *Food and Agricultural Organizasyon Nasyon Zini*, finn averti ki, si lager ek sanksyon kontinye, 500 milyon dimunn pa pu ena manze, nu usi ladan dan kontinan Afrikin.

Seki sir e sertin, se bann sanksyon, zot suvan, kuma dan sa ka la, mezir inilateral ki infoze san okenn konsiltasyon avek kominote internasional e ki pa finn otorize par Nasyon Zini.

Dan Lirak (1990-2003) sanksyon USA-UK ti fer buku, buku dega. Dapre estimasyon syantifik *British Medical Journal* enn milyon dimunn finn mor akoz lager-ek-sanksyon. Sanksyon ek lager ti sifi pu sanz rezim. Me, ki kalite sanksyon ek lager pu neseser pu sanz enn rezim osi pwisan ki rezim Putin? ■

Kifer nu kont lager, e kont sa lager la? Antan ki imin? Antan ki militan sosyalist? Antan ki manb enn parti revolisyoner? Antan ki travayer? Antanki klas travayer? Antan ki fam? Antan ki etidyan? Sa lartik la pu get baz muvman anti-lager.

Bi sa lartik la se pu reponn ketyon dimunn ki ti dimande kan nu ti pe distribiye trak, eski nu kapav aret lager.

Antan ki enn parti revolisyoner Marxis, LALIT finn, depi so nesans, ena lor nu azanda politik pu anpes lager, enn sistem barbar ki tuzur servi dan sistem kapitalism pu regle bann dezakor. Rosa Luxemburg so parol, “Sosyalism ubyin barbar?” pli vre ki zame. Nu pe get divan nu lizye, posibilité enn sityasyon ireversib. Nu ena swa divan nu: swa nu fer transizyon irzan ver sosyalism (kot klas travayer partu dan lemond aktivman konbat impérialism e so metod lager) ubyin nu pu sibir regresyon ver barbari (dezolasyon, dezenerasyon, destrikson limanite, par tu kalite zarm, inkil zarm nikleer). Akoz samem dan trak LALIT ki finn sirkile an Mars 2022, nu finn fer apel a klas travayer pu repran lafors dan lalit de klas dan sak pei e dan tu pei. Apre 2 mwa lager ant Larisi ek OTAN

via Ikrenn, mobilizasyon anti-lager pe devlope partu dan lemond. Klas travayer Larisi, malgre enn Guvernman otoriter, pu bizin organiz li ase pu li met lord ar Putin. Valer-dizur ena anviron 13,000 manifestan anti-lager ki finn arete akoz zot finn manifeste dan 140 rezyon Larisi.


Represyon

Lopozisyon dan Larisi ti deza byin reprime avan lager. Lider Lopozyon ferme. Parlman Larisi, Duma, finn pas lalwa pli represif. Lamann ziska Rs11milyon ek prizon ziska 15an kan konteste lager. Malgre risk anprizonnan, malgre kapav perdi travay e lavi, ki anfet pus bann militan anti-lager kontinye azir? Zot dir se enn devwar an-komin pu aret lager e protez lavi. Pena okenn vinker dan lager modern, nu tu perdan. Ena enn sel Later pu nu tu viv. Nu truv sa dan deklarasyon komin bann syantis ek etidyan Larisi ki rekonet sufrans ki pe infliz lor lepep Ikrenyin.

Dan Ikrenn, parti politik degos finn interdi par Guvernman. Ena dimunn ki “tret” ki fizye. Ena piyer, ki atase lor poto dan lavil.

Kreativite

Depi ena lager, ena santiman ek lorganizasyon kont lager. Dan lepop kolonizasyon, lepep oprime



finn organize pu opoz invazyon. Dan bann gran lager dan Lerop, par milyon dimunn finn organize pu dir “Non a lager!” Enn bann pli gran muvman kont lager dan Lamerik pran nesans dan lager USA kont Vietnam. Depi 1964 ti ena enn komite ki ti apel Draft Resisters, ki fer apel pu dimunn vinn obzekter konsyans, dimann solda dezerte, renons travay kuma solda e mem met bann ka lakur pu konteste konksripsyong parski li ti vinn kler ki se zenn dan klas travayer, pa lezot, ki ti pe sakrifye lor fron. Muvman vinn byin gran ariv 1968, avek 7 milyon aktivis kont lager. Dan kumansman protestasyon ti pasifik, me kan Guvernman pa sanz so politik pu aret masak, aktivis kont lager kumans nuvo form dezobeyans sivil, la-grev, gerila e boykot.

Enn stratezi kle vinn rezistans atraver kanpayn pu dir, “Non, nu pa pu al travay kuma solda dan lager?”

Dan listwar, petet pli gran refi lager ti kan klas travayer Larisi an 1917 aret Premye Ger Mondyal par fer enn revolisyon kont Guvernman.

Form ki lalit anti-lager kapav pran?

Dabor, kan ena lager, pena lager, bizin tultan pe mobilize lor 2 pwin kle: fermfir tu baz militer etranze, kuma enn metod anpes lager avan-mem li kumanse. Sa mars de-per avek fermfir lizinn armaman, ans-

am ar negosyasyon trete pu anpes prodir e vann armaman. Pu sa rezon la, LALIT tultan pran oserye nu responsabilite pu fer ferm sa baz Diego la, pu anpes tu navir de-ger rant dan okenn larad dan pei.

Answit, akoz laplipar lager zordi-zur, zot inpilsyon sorti dan las-waf sistem kapitalist pu kontra ek tennder an-permanans. Akoz sistem kapitalist, li balot konsta-man depi enn kriz ekonomik a lot, sak fwa ena kriz, patron kapitalis met presyon lor politisyen pu servi komann dan lizinn armaman kuma fason met-amars pei so lindistri lur, an zeneral. Burzwazi diferan pei vinn an-konpetisyon, e kumsa lager kumans vinn inevitab. Alor, lal-it kont sistem kapitalis, li reprezent enn lalit kont lager.


Kan lager kumanse, ena buku fas-on pu proteste. Dan Litali, par eg-zanp, travayer finn refiz met zarm NATO dan avyon pu avoy dan pei vwazin Ikrenn. Lepok lager Vietnam, ena aktivist anti-lager finn osi al dan bann lizinn zarm pu aret u sey blok prodiksyon. Me, kan lager la vinn dan u prop pei, ena enn Leta Dirzans, kot tu form protestasyon vinn ilegal, e suvan ena exekisyon anplas-anplas.

Dan LALIT nu aksyon kont lager li viz pu dabor konpran lager la, nu-mem – so koz, e kimanyer kapav ede pu aret li – e pu inifye lezot lorganizasyon dan nerport ki fason ki ede pu aret lager. Par ex-anp, nu liye slogan “Lager non!” ar

“Ferm baz USA lor Diego Garcia” – sa nu kapav ede pu fer. Nu viz evit lager nikleer. Anmemtan, nu liye sa ar nu lezot travay kont lager. Nu ti met dibut enn fron apel KAL, Komite Anti-Lager lepok premye lager USA kont Lirak, 1990. Gro travay internasyonalist ki LALIT ti osi fer an 2004, se, ansam avek Grup Refizye Chagos, nu ti pran par e pran laparol dan Konferans NO U.S BASES dan Mumbai, e plitar LALIT dan Quito, Ekwador. Kum-sa nu finn reysi met Diego Garcia lor azanda kuma enn baz militer prioriter pu amenn kanpayn. Kumsa nu ti ede pu fer ferm baz Vieques, Puerto Rico ek Manta, Ekwador. An 2016, nu ti prezan dan enn reynion internasyonal kont lager. Nu finn fer 2 Konferans internasyonal lor kes-tyon Diego Garcia an 2006 ek 2010.

Nu anmemtan pe partisip dan bann regrupman internasyonal otur demand ki NATO aret expansyon e okontrer viz demantel li. Nu truve ki alalong, se klas travayer parti dan lemond ki kapav, kuma travayer Larisi (inklir Ikrenn a lepok) ti fer an 1917, kan zot ti aret enn gran lager. Nu gran chalennj se organize pu ferm baz militer, ferm lizinn armaman, aplik bann trete anti zarm nikleer, fonn tu zarm ki’nn prodwir dan lemond.

Ala enn Deklarasyon kont Lager prepare par *International Workers’ Committee* ek so lezot aderen. LALIT finn adere, e finn siyne formelman:



IWC

INTERNATIONAL
WORKERS COMMITTEE

AGAINST WAR AND EXPLOITATION
FOR A WORKER'S INTERNATIONAL

Emergency International Meeting
Against War
3 April 2022

*"Workers of the world, workers' organisations, oppressed people,
let us unite against war and exploitation!"*

We – workers, young people, militants of the workers' and democratic movements from 47 countries and all continents – take up the words of Jean Jaurès, the historic figure of international socialism, on the eve of the outbreak of the 1914 war: "*Capitalism carries war like a cloud carries a storm.*"

This formulation is more relevant than ever. Wars are ravaging all the continents. Tens of millions of people have been driven out of their countries. Entire countries are in ruins. Famine is expanding across the globe. We declare without the slightest hesitation: These ongoing wars, and the destruction and barbarism that they unleash against workers and peoples, are the very fruit of the capitalist system based on the private ownership of the means of production and of its decay. It is a system which, in order to reap ever greater profits, shrinks from no aggression.

The war unleashed by order of President Putin on 24 February 2022 in Ukraine is no exception to the rule. Nothing can justify this intervention. This is why we are for stopping this intervention, for an immediate ceasefire, and for the withdrawal of Russian troops from Ukraine.

Yet, we cannot ignore the fact that the major capitalist powers – led by the Biden administration in the United States, the European Union, and the capitalist countries that make it up, in particular Germany, France and Great Britain – who did everything yesterday to provoke this conflict are today doing everything to stoke and fan the flames.

Tens of thousands of troops are massed by NATO on the Russian border, and their numbers are being reinforced week after week. NATO and its member countries are offering Ukraine permanent over-armament and a veritable air shield on its border. In fact, NATO, the United States, and the European Union are co-belligerents. That is why we combine the demand for the "withdrawal of Russian troops" with the demand for the "withdrawal of U.S. and NATO troops from Europe", the "withdrawal of all foreign occupation troops from all countries of the world", the "lifting of sanctions", the "end to all imperialist and neo-colonialist interventions", and the "dismantling of NATO".

The current wars reflect the ever-growing appetites of the major capitalist powers, who make no secret of their desire – led by Biden – to plunder the wealth of the whole world that still escapes them, and to control the world economy even more closely. These are the pretexts for the skyrocketing increases of military budgets, to the detriment of the needs of the peoples. Wars abroad combine with the war "at home" that capitalist governments wage against the workers in their own countries.

This war is the final link in the chain of wars that have been ravaging all the continents for several decades, always fomented by the capitalist and imperialist powers, always paid for with the blood and misery of the peoples themselves. The map of wars most often overlaps with the map of the wealth of the subsoil of the countries concerned. This is why we call for the withdrawal of all occupying troops from the countries where they are present.

The workers have no interests in common with the multinationals and the capitalist classes of the different countries. They have no interests in common with their own governments.

We call on all workers and youth, on activists of all origins in the workers' movement and on workers' organisations to reject any form of national unity / "sacred union" with the warmongering governments, with the multinationals and the capitalists who provoke wars.

The only unity that is consistent with the cause of peace and social justice is the unity of the workers and peoples of the world.

Down with war, down with exploitation!

Workers of the world, workers' organisations, oppressed peoples, let us unite against war and exploitation, to impose peace in the interests of humanity!

This appeal was launched at the initiative of the International Workers Committee (IWC), which is organising a World Conference Against War and Exploitation, for a Workers' International and an International Conference of Working Women in Paris on 29 and 30 October 2002.



Afghanistan: Left Radical of Afghanistan (LRA).

Algeria: Nadia Yessah, former Deputy of the Workers Party (PT); Samir Laribi, member of the secretariat of the Socialist Workers Party (PST) in a personal capacity; Abdelkader Bentaleb, on behalf of the Organising Committee of Internationalist Socialists (COSI); Khalid Daim, former member of the OST and co-founder of the PT, member of its control commission; Fodil H., on behalf of the Youth Circle for Socialism (CJS), trade unionist in the Transport Federation UGTA; Houria A., internationalist labour activist, first delegate to the Working Women's International Conference; Ali Y., labour activist; Amar Lounas, labour activist; Amélie H., labour activist; Aziz R. labour activist teacher; Azzedine A., internationalist labour activist; Chafik Amara, labour activist; Farid H., labour activist, technician; Farid Touil, labour activist, trade unionist in technical studies; Fawzi H., labour activist; Hacène F., labour activist, unemployed; Hadj F., labour and human rights activist; Hafid H., trade unionist; Hamza A., labour activist; Hassina B., student; Kamel A., trade unionist; Larbi B., student; Mohand H., anti-imperialist activist; Nadia Sabry, labour activist, journalist; Omar A., labour activist, teacher; Rachid Belfadel, labour activist; Ryad R., teacher trade unionist; Samia D., student; Sofiane E., labour activist; Tarek H., internationalist labour activist, teacher; Wahiba S., student; Samir Aberkane, labour activist, co-founder of RAJ (Youth Action Forum).

Argentina: Ricardo Sonny Martínez, journalist, writer, former head of Radio Nacional Argentina at Bariloche, correspondent of Télam news agency.

Azania/South Africa: Ashraf Jooma; Mandlenkosi ka Phangwa; Scelo Mthembu; Azikiwe Zweni, (Azanian section of the OCFRI); Thabo Mocuminyane; Bongani Mazibuko; Gertude Lebunda on behalf of the National Unemployed People's Forum (SA); Mphutlane wa Bofelo, member of the Black Consciousness Movement United (BCMU); Shaheen Khan, Socialist Revolutionary Workers Party Central Committee Member.

Bangladesh: Ahad Mohammed Fayez Hossain, General Secretary of the Bangladesh Workers Trade Union Federation; Sumi Khan, human rights activist; Amlan Dewanjee, Democratic Workers Party; Baddrudduja Chowdhury, Democratic Workers Party.

Belarus: Youri Glouchakov, labour activist.

Belgium: Gaëtan Coucke, trade unionist, education sector; Olivier Hormann, federal public administration trade unionist; Roberto Giarocco, Unity Committee (Eenheidscomité); Serge Monsieur, President CGSP-VLR Vivaqua.

Benin: Assogba Mahoussi Innocent, teacher, trade unionist; Kounouhou Gbeyitin Marcel, Deputy Secretary General of the Union of Human Healthcare Workers of Benin (SYNTRASESH).

Brazil: Tomaz Wonghon, Former President of the National Federation of Education Workers CNTE); Pedro Jacobs, head of the Trade Union Nucleus 39 of CPERS/RS (in personal capacity); Anísio Garcez Homem, activist of the Workers Party (PT).

Burkina Faso: Adama Coulibaly, on behalf of the PanAfrican Patriotic Alternative/Burkindi.

Burundi: Richard Hatungimana, President of the Party of Workers and Democracy (PTD-TWUNGURUNANI).

Canada: B. Ross Ashley, correspondent of the IWC; Paul Nkuzimana.

Chile: Maritza Bastias Parra, political secretariat of the Independent Movement for the People's Rights (MIDP); Sixto Iturra, member of the political secretariat of the MIDP.

China: Zi Yu; Apo Leong; an activist in Beijing; Haige.

Democratic Republic of Congo (RDC): Patrick Basimise Mupe ; Lucien Faradja Mbinga; Gustave Kizenga, on behalf of the Committee for the Democratic and Independent Party of Workers and Peasants.

Ecuador: Pierina Torres, Movimiento Alfaro Vive Carajo; Guillermo Santana, member of Movimiento Alfaro Vive Carajo.

France: Jean-Pierre Barrois, anti-war activist; Jacqueline Berrut, trade unionist social worker; Maria-Begonia Chambonnet, hospital worker, trade unionist; Jérémie Daire, Federation of Revolutionary Youth (FJR); Melchior de Rochebrune (FJR) Dominique Ferré, POID; Olivier Doriane, POID; Daniel Gluckstein, POID National Secretary, Coordinator of the International Workers Committee against War and Exploitation, For a Workers' International; Georgick Guellaën, Cherbourg; Alexandre Herzog, local administration worker trade unionist; Marie Horville, teacher trade unionist; Myriam Hossain, municipal employee trade unionist, childcare; Christel Keiser, POID National Secretary, in charge of the Working Women's Commission; Charles Menet, trade unionist, metal industry; Jean-Francois Paty, postal worker, trade unionist; Mahel Pierot-Guimbaud (FJR);

Germany: Peter Saalmüller, SPD activist (Idstein), Ver.di trade unionist; J.S., Ver.di (Leipzig); Norbert Müller, Ver.di trade unionist (Frankfurt); Claudius Naumann, chair of the council of shop stewards of Berlin's Free University, spokesperson of the Ver.di local branch, member of the Committee for a Workers Party and of Internationalist Socialist Group (ISG), German section of the Fourth International (OCRF); Anna Schuster, Ver.di, shop steward, Committee for a Workers Party; Gudrun Hintermeier, trade unionist IG Metall, Sömmerda trades Council; Peter Hintermeier, trade unionist IG Metall, chair of the DGB trades council of Sömmerda; Klaus Schüller, member of the National Bureau of AfA (SPD, worker committee), trade unionist EVG, member of the IWC follow-up committee; H.-W. Schuster, Ver.di trade unionist, shop steward, Internationalist Socialist Group (ISG); Andreas Gangl, trade unionist Ver.di, strike committee member.

Ghana: Explo Nani-Kofi, "Moving Africa"

Great Britain: Ian Hodson, National President, BFAWU (pers. cap); Steve Hedley, Senior Deputy General Secretary, RMT (personal capacity); Jane Doolan, UNISON NEC member (pers. cap.); Rebecca Brookman UNISON NEC member (pers cap.); Mike Calvert, Branch Secretary, Islington UNISON (pers. cap.); Stefan Cholewka, Rochdale Me-



tropolitan Trades Council, Greater Manchester (pers. cap.); Jo Rust, Secretary, King's Lynn & District Trades Council and Independent Borough Councillor in King's Lynn (pers. cap.); Charles Charalambous, Former President, Torbay & South Devon Trades Union Council, Editor Labour Internationalist; Paul Filby, Liverpool, Blacklist Support Group (pers. cap.); Nick Phillips, Unite member, London (pers. cap.); Henry Mott, Unite member (pers. cap.); Ann Green, British Pensioner Magazine (pers. cap.); Margaret K. Taylor, Treasurer, Rochdale Metropolitan Borough Trades Council (pers. cap.); Doreen McNally, Liverpool Unite Community branch and former spokesperson, Women of the Waterfront (pers. cap.); Nigel Singh, trade unionist; Antony Rimmer, Liverpool 47 Surcharged Councillor, Merseyside Pensioners Association, trade unionist (CWU and Unite) (pers. cap.); Noeleen Grattan Hornsey and Wood Green CLP; Fiona Monkman Chairperson, Islington UNISON (pers cap); Audrey White, Merseyside Pensioners Association, Liverpool Against the war (pers. cap.); Sam Gorst, Independent Liverpool City Councillor, Councillors for Peace (pers. cap.).

Greece: Dimitris Veliziotis, barrister; Lenia Chrisikopoulou, artist; Maryse Le Lohe, pensioner, Athens; Pantelis Kokkinopoulos, General practionner, former municipal councillor; Eleni Pierropoulou, unemployed; Isaia Karachalioú; Andreas Guhl, OCRFI member; Sotiria Lioni, unemployed.

Guatemala: Lidia Ángela Santos, teacher.

Hungary: Judit Somi, working-class activist.

India: Nambiath Vasudevan, coordinator of the International Workers Committee Against War and Exploitation, for a Workers' International; Fahad Ahmad, Senior Research Fellow School of Social Work, Tata Institute of Social Sciences (Mumbai); Sabina Martins (Goa); Subhas Naik Jorge, Spark; Cheruvathoor Denzil, Spark; Franklyn Dsouza, Spark; Gausuddin Shaikh, Spark.

Indonesia: Dian Septi Trisnanti, Indonesia Unity Labour Federation (FSBPI).

Italy: Luigi Brandellero, worker, *Tribuna Libera* editorial board; Marina Boscaino, activist for democratic and social rights, Rome; Valeria Busicchia, teacher, activist; Rita Campione, NO to Regionalisation Lombardy Committee (pers cap); Alessandra Cigna, teacher, shop steward and trade union executive committee member; Giovanni Cocchi, Bologna; Ugo Croce, *Tribuna Libera* editorial board; Loretta Deluca, teacher, Rifondazione Comunista activist, Leinì (Turin); Dario Granaglia, worker shop steward and member of the executive board of the FIOM-CGIL trade union; Daniele Grego, teacher, trade union activist, Turin; Monica Grilli, teacher, shop steward and trade union executive committee member; Gianni Guglieri, worker, shop steward and trade union executive board member, Turin; Andrea Monasterolo, worker, trade union activist; Agata Pantella, teacher, Turin; Alberto Pian, teacher, shop steward and trade union executive committee member; Daniela Pez, member of the regional secretariat Friuli Venezia Giulia of Sinistra Italiana (pers cap); Claudia Poggio, teacher; Acqui Terme (Alessandria); Fabrizio Prestipino, teacher, *Tribuna Libera* editorial board; Betty Rainieri, shop steward and member of the trade union executive, Turin; Teresa Silvestri,

teacher, Turin; Elena Troglia, teacher, Turin; Emanuele Ungheri, Catane; Lorenzo Varaldo, school headmaster, monthly coordinator *Tribuna Libera*; Vanna Ventre, teacher, monthly editor of *Tribuna Libera*.

Korea: Jung Sikhwa, trade unionist; Sang Soo Ha, trade unionist.

Mexico: María de Lourdes Díaz Cruz, LULA - National Movement for Petroleum Transformation; Israel Cervantes, Bajío workers' center; Rosemberg Pérez García, Central struggle committee, Section 40 of the National Coordination of Education workers; Marisela Ortega Domínguez, MORENA activist; Elvira Catalina Aguilar Álvarez, Partido del Trabajo; Catalina Miranda, Section 37 of the National Union of Education Workers; Jorge Manuel Arcia Nájera, retired, Section 7 SNTE-CNTE; Russell Aguilar, retired, Section 7 SNTE-CNTE; Jesús Casillas Arredondo, International Youth Alliance for Socialism; Fernando Márquez Duarte, trade union activist, UAW local 2865; Liliana Plumeda Aguilar, Internationalist Communist League (LCI-CORCI); Abel Salazar Castellanos, LCI-CORCI; Juan Carlos Vargas Reyes, Nueva Central de Trabajadores (New Workers Central); Jesús Rangel Ontiveros, Political Organisation of Workers and People, OPT (Baja California); Raúl Calleja Lacorti, Section 502 of the National Union of Healthcare Workers; Carlos Niebla, UNTA-BC; Marco Rojo, UNTA-BC; Raúl Ramos Sánchez, Workers' Center, Baja California; Emma Monserrat García, student; Cristina Itzel Ramírez Camea, maquiladora worker; Muriel Ernesto Gómez Alvarado, Central struggle Council Local 40 of the National Coordination of Education Workers; Gilberto Montes Vázquez, Political Organisation of the Workers and People and workers, OPT (Chiapas); Fernando Serrano Monroy, General Secretary of the Independent Union of the Colegio de Bachilleres workers (Chiapas) (SITAACOBACH); Angel Alvarez Orozco, SITAACOBACH; Fernando Aguilar Palacios, Organising Secretary of the SITAACOBACH; Irma Moran Ojeda, activist for the defence of water (Mexicali); Jesús Adolfo Calleja Lacorti; Daniel Gómez Meza, Section 40 of the National Coordination of Education Workers.

Morocco: Fadoua Idrissi, teacher, unionist; Mohamed Dahak, retired teacher, Union and Human Rights activist; Smail Jbari, member of the administrative committee of the Moroccan Workers' Youth, (JOM/UMT); Y. Malik, on behalf of the editorial board of Tribune des Travailleurs; Habil Bourass, student.

Pakistan: Akbar Khan, General Secretary of the National Federation of Bank Employees; Taimur Rehman, General Secretary of PMKP; Rubina Jamil, general Secretary of the All Pakistan Trade Union Federation, APTUF; M. Ilyas; Nasir Gulzar; Haroon Younas; Mian Khalid, Railway workers union workshops; Samina Fayyaz, APTUF women's commission; Malik Humayun, General Secretary, local employees Federation; Anwer Gujjar, President APTUF; Yasir Gulzar.

Palestine: Naji El Khatib, President of the Secular Palestine association.

Peru: Shabbir Shah, General Secretary of the single union of agrifood industry workers Peru; Roberto Alvarado Rubiños, Editor of Páginas Libres; César Augusto Huamán Escudero;



César Salinas Mejía, former union leader of mine workers; Henry Torres Gallarday, internationalist socialist group, *El Organizador* newspaper.

Philippines: Partido Manggagawa (Workers Party); Randy Miranda, Head, National Organizing Department Executive Committee, Workers Party.

Portugal: Raquel Varela, history academic and researcher of the labour movement; José Casimiro, labour activist, Left Bloc (BE); João Mota, retired clinic Secretary; António Cardoso, Viana do Castelo; Ana Sofia Cortes, BE activist, public sector worker; Victor Pinto, linguist, O Trabalho activist; Adriano Zilhão, O Trabalho and BE activist; José Santana Henriques, O Trabalho and BE activist; Frederico Rodrigues, youth activist; Bento Correia, labour activist, BE; Manuel Carlos Silva, University professor and sociologist, Braga; Pedro Vicente, architect; Pedro Carvalho, leader of the union of the north region teachers, Viana do Castelo.

Romania: Constantin Cretan, mining trade unionist.

Russia: Group of OCRI supporters.

Serbia: Jacim Milunovic, labor activist.

Spanish State: Reme Martin, activist of the Movement of Retired Workers (MPEH) and trade unionist LAB.

Sri Lanka: Dasantha Jayalath, Former Assistant Secretary of the Ansell branch of the Free Trade Zones and General Services Employees Union; Saman Mudunko-tuwage.

Sweden: Nadezhda Bravo Cladera. Switzerland: Ali Korkmaz, industrial unionist; Dogan Fennibay, industrial unionist; Jean-Philippe Faure, worker activist; Marzia Fiastri, teacher unionist; Michel Zimmermann, worker activist.

Syria: Faraj Bayrarakdar.


Togo: Lawson Messan, national Secretary of PADET/L'Emancipation.

Turkey: Mehmet Sadi Ozansü, leader of the IKEP (Workers Party).

United States: Donna Dewitt*, President Emerita (ret), South Carolina AFL-CIO; Desirée Rojas*, President, Sacramento Chapter, Labor Council for Latin American Advancement (AFL-CIO), Sacramento, California; Sean McMahon, Immigrant rights activist; Rodger Scott*, Past President, AFT 2121 San Francisco, CA; Nnamdi Lumumba, State Organizer, Ujima People's Progress Party (Maryland); Petros Bein, Maryland; Lita Blanc*, Past President, United Educators of San Francisco; Marlena Santoyo, Philadelphia Federation of Teachers; Alan Benjamin, Socialist Organizer National Organizing Committee; Connie White*, Member, Continuations Committee of Labor & Community for an Independent Party (LCIP); Michael Carano, Teamsters Local 348, retired Tallmadge, Ohio; Mya Shone; Socialist Organizer National Organizing Committee; David Walters*, IBEW 1245 Retired, Pacifica, CA; Dan Kaplan*, Executive Secretary, retired, AFT Local 1493, Berkeley, CA. (* for id. only).

This appeal was launched at the initiative of the International Workers Committee (IWC), which is organising a World Conference Against War and Exploitation, for a Workers' International and an International Conference of Working Women in Paris on 29 and 30 October 2002.

PEI KI POSED ZARM NIKLEER (Enn estimasyon 2021)



Arms Control Association

PEI MANB LOTAN - Nuvo manb an ble fonse

